

1 Reyes

Ihuehuejyo David

¹ Ya huehuejixtoya Tanahuatijquet David. Huan masque quiyoyontiyayaj huan cuali quitaquentiyayaj, amo mototoniliyaya. ² Huajca itequipanojcahua quiilhuijque: “Monequi tijtemose se ichpocat ma mitzpalehuiqui huan ma mitzmocuitahuiqui. Yaya huelis cochis mohuaya huan mitztotonilis.” Huan Tanahuatijquet David quinilhui para quena.

³ Huan quitemojque se ichpocat yejyectzi ipan nochí tali Israel. Huan quipantijque se cati itoca Abisag ten altepet Sunem huan quihuicaque campa Tanahuatijquet David. ⁴ Huan Abisag nelía eliyaya se ichpocat yejyectzi, huan yaya pejqui quitaquentía nopa tanahuatijquet huan quimocuitahuía, pero David amo quema quiixmatqui.

Adonías quinejqui mochihuas tanahuatijquet

⁵ Huajca Adonías, icone David ica isihua Haguit, motananqui huan mosisisi ica itata huan quiijto: “Na nielis nitanahuatijquet huan nitequitis quej ipataca notata.” Huajca Adonías mocuili miyac tatehuijca carrojme huan miyac tacame cati nemiyayaj cahuajtipa huan 50 tacame cati san ixinejnemiyayaj para motalose iixpa. ⁶ Quema moscalti Adonías, itata amo quema quitalnamicti, yon amo quema quiilhui para amo cuali cati quichihuayaya. Huan Adonías elqui nelía

yejyectzi huan elqui teipa ejquet ten Absalón.
⁷ Huan Adonías quicamanalhui Joab, ica ne Sarvia, huan nojquiya quicamanalhui nopa totajtzi Abiatar. Huan inijuanti quisencajque se camanali ihuaya huan quijtojque para quipalehuisquíaj para mochihuas tanahuatijquet. ⁸ Pero sequij amo mosejcotilijque inihuaya. Mocajqui ica David nopa totajtzi Sadoc, Benaía ica ne Joiada, nopa tajtolpanextijquet Natán, Simei, Rei huan nochí isoldados David cati más temachme. Nochi ni tacame mocajque ihuaya David.

⁹ Huan Adonías yajqui ipan nopa tepet campa nopa hueyi tet cati itoca Zohelet cati eltoc nechca nopa ameli cati itoca Rogel. Huan nopona quinmicti pilborrego jtzitzi huan torojme cati más tojtomahuaque huan quichijqui se hueyi tacualisti. Quinnnotzqui ma hualaca nochí ica ne hua Tanahuatijquet David, pampa inijuanti iicnihua. Huan nojquiya quinnotzqui nochí tacame ipan tali Judá cati quihiucayabaj tequiticayot ipan itanahuatilis itata. ¹⁰ Pero Adonías amo quinnotzqui nopa tajtolpanextijquet Natán, yon Benaía, yon isoldados David cati más temachme, yon iicni cati itoca Salomón. ¹¹ Teipa Natán quicamanalhuito Betsabé, inana Salomón, huan quihui:

—¿Amo timomacatoc cuenta para Adonías, ica ne David ica nopa sihuat Haguit, mochijtoc tanahuatijquet huan David amo quimati? ¹² Para amo timiquis huan nojquiya para tijmanahuis inemilis motelpoca Salomón, xijtacaquili cati nimitzilhuis para tijchihuas. ¹³ Xiya nimantzi ximopanextiti iixpa Tanahuatijquet David huan xiquilhui: ‘Noteco, ¿amo ta techilhui para tocone

Salomón teipa tanahuatis quema ya tamis motequi ta? ¿Amo tiquijtojtoc para yaya mosehuis ipan mosiya cati yejyectzi quej mopataca? Huajca ¿para ten ama mochijtoc tanahuatijquet motelpoca Adonías?¹⁴ Quej nopa xiquilhuiti huan quema noja tijcamanalhuía, na niyas motepotzco huan nicalaquití huan niquilhuis para melahuac cati ta tiquilhuía.

¹⁵ Huajca Betsabé calaquito campa icuarto ihuehue, nopa tanahuatijquet. Huan David ya eliyaya nelhuehuentzi huan nopa ichpocat Abisag, cati ehua Sunem, quitequipanohuayaya. ¹⁶ Huan Betsabé mohuijtzonqui hasta talchi iixpa huan David quitatzintoquili:

—¿Taya tijnequi?

¹⁷ Huan Betsabé quiilhui:

—Noteco, ta tijtestigojquetzqui TOTECO Dios para tocone, Salomón, elís tanahuatijquet quej mopataca huan tanahuatis ipan mosiya yejyectzi quema ta tijcahuas motequiticayo. ¹⁸ Pero ama mocone Adonías ya mochijtoc tanahuatijquet huan ta amo tijmati. ¹⁹ Ya quinmictijtoc torojme, becerros huan miyaqui borregojme cati más tojtomahuaque. Quichijtoc se hueyi tacualisti huan quinnotztoc nochí moconehua. Nojquiya quinnotztoc nopa totajtzi Abiatar huan Joab cati quinyacana mosoldados, pero amo quinnotztoc totelpoca Salomón. ²⁰ Huajca ama, noteco, nochí israelitame san mitzchiyaj para titeyolmelahuas ajquiya elís tanahuatijquet quej mopataca huan mosehuis ipan mosiya quema tijcrajtehuas motequiticayo. ²¹ Sinta amo teno tijchihuas

ama, teipa quema timquis, techmictise na huan motelpoca Salomón quej tielisquíaj titemictiani.

²² Huan quema Betsabé noja quicamanal-huiyaya David, se itequipanojca quiilhui para ajisco tajtolpanextijquet Natán. ²³ Huajca calaquito huan mohuijtzonqui hasta talchi iixpa nopa tanahuatijquet. ²⁴ Huan quiijto:

—Noteco huan notanahuatijca, ¿nelía tiqijtojtoc para motelpoca Adonías elis tanahuatijquet quema tijcajtehuas motequiticayo huan para yaya mosehuis ipan mosiya yejyectzi para tanahuatis? ²⁵ Ama yaya quinmictijtoc miyac torojme, becerros huan borregojme cati tomahuaque. Huan quinnotzqui mocone hua huan motayacanca ten mosoldados huan nojquiya quinotzqui Abiatar, nopa totajtzi. Huan nopena nochí tacuaj huan taij huan cuatzajtzij: ‘¡Ma itzto miyac tonali totanahuatijca Adonías!’ ²⁶ Pero na amo technotztoque. Yon amo quinotztoque totajtzi Sadoc, yon Benaía, icone Joiada, yon motelpoca Salomón. ²⁷ Amo nijneltoca para ta tijchijtoc ni huihuiyot. Amo tijchihuasquía se tamanti quej ni huan amo techilhuis, na cati nimitzpalehuía. Monequisquía achtohui techyolmelahuasquía tojuanti cati timotequipanojcahua ajquiya tijnequisquía ma mocahua quej mopataca ipan motequi quema tijcajtehuas motequiticayo.

David quitali Salomón para tanahuatis

²⁸ Huajca Tanahuatijquet David tanahuati sempa ma quinotzatij isihua, Betsabé. Huan Betsabé ajisco huan moquetzqui iixpa. ²⁹ Huan

Tanahuatijquet David quitestigojquetzqui TOTECO huan quijto:

—Nijtestigojquetza TOTECO cati techmaquixti-jtoc ten miyac tequipacholi. ³⁰ Ama ni tonali nijtamichihuas cati ya nijtestigojquetztoc TOTECO toDIOS tiisraelitame para nijchihuas. Ama nijtal is mocone Salomón para mosehuis ipan nosiya huan tanahuatis quej nopataca.

³¹ Huajca Betsabé motancauquetzqui huan monhujtzonqui hasta talchi iixpa David para quitascamatis huan quijto:

—Nimitztascamati miyac, Tanahuatijquet David. ¡Xiitzto miyac tonali, noteco!

³² Huan Tanahuatijquet David quijto:

—Xijnotzatij nopa totajtzi Sadoc, huan nopa tajtolpanextijquet Natán huan Benaía cati icone Joiada.

Huan injuanti ajsicoj huan moixnextitoj iixpa Tanahuatijquet David. ³³ Huan quinilhui:

—Xijtejcoltica ipan nomula nocone Salomón, huan nochí amojuanti huan notequipanojcahua xijhuicaca hasta altepet Gihón. ³⁴ Huan nopona monequi amojuanti, titotajtzi Sadoc huan titajtolpanextijquet Natán, xijzonaltica ica aceite nocone Salomón huan xijtequitalica para elis tanahuatijquet ipan nochí ni tali Israel. Teipa xijpitzaca nopa tapitzali huan xicuatzajtzica: ‘¡Ma itzto miyac tonali totanahuatijca Salomón!’

³⁵ Huan quema sempa anquihualicase nica, anquisehuise ipan nosiya campa nimosehuía huan yaya tanahuatis quej nopataca pampa yaya cati nijtapejpenijtoc ma eli tanahuatijquet ipan ni tali Israel huan tali Judá.

³⁶ Huan Benaía quiilhui Tanahuatijquet David:
 —¡Quej nopa ma eli! Notanahuatijca, TOTECO
 Dios cati tijtequipanohua ma quichihua para quej
 nopa ma eli. ³⁷ TOTECO ma itzto ihuaya Salomón
 quej itztoya mohuaya. Huan TOTECO ma quichi-
 hua para yaya quipiyas noja más hueyi tequit-
 icayot que cati ta tijpixqui, notanahuatijca David.

Salomón mochijqui tanahuatijquet
(1 Cr. 29:22)

³⁸ Huan yajqui nopa totajtzi Sadoc, huan nopa
 tajtolpanextijquet Natán, huan Benaía huan
 itequipanojcahua David cati quimocuitahuiyayaj
 huan quitejcoltijque Salomón ipan imula
 Tanahuatijquet David huan quihuicaque
 nepa Gihón. ³⁹ Huan nopona nopa totajtzi
 Sadoc quicuic ipan nopa yoyon tiopamit nopa
 cuacuajomit cati quipixtoya nopa aceite huan
 nopona quitzonalti Salomón. Huan nochí nopa
 masehualme tapitzque huan cuatzajtzique nochí
 itatoquilijcahua huan quijtoque: “¡Ma itzto
 miyac tonali totanahuatijca Salomón!” ⁴⁰ Huan
 teipa nochí nopa masehualme mocuetque
 altepet Jerusalén ihuaya Salomón huan
 tapitztihuayayaj ica miyac paquilsti. Huan
 tahuejchihuayayaj hasta quimachiliyayaj molinía
 tali pampa nelía tahuel chicahuac cuatzajtziyayaj.

⁴¹ Huan Adonías huan nochí itanotzalhua sanoc
 tantoyaj tacuaj quema quicajque cati tahuejchi-
 huayayaj. Huan Joab quicajqui quipitzayayaj
 tapitzali huan quijto:

—¿Para ten tahuejchihuaj miyac nepa ipan toal-
 tepe?

42 Huan quema noja camanaltiyaya, ajxito Jonatán, icono nopa totajtzi Abiatar, huan Adonías quiilhui:

—Xipano. Ta tise cuali tacat, huelis tijhualica se cuali camanali.

43 Huan Jonatán quinanquili Adonías:

—¡Amo ya nopa! Totanahuatiaca David quitalijtoc Salomón para elis tanahuatijquet.

44 Quinahuati totajtzi Sadoc, tajtolpanextijquet Natán huan Benáia, icono Joiada, huan nochí nopa tacame cati quimocuitahuíaj inemilis Tanahuatijquet David ma quitejcoltica Salomón ipan imula para quinextise yaya tanahuatijquet.

45 Huan nopa totajtzi Sadoc huan nopa tajtolpanextijquet Natán ya quitzonaltijtoque ica aceite huan quitequitalijtoque para elis totanahuatiaca nepa Gihón. Huan ama ya mocuectoque huan tahuel pactoque. Yeca onca miyac tahuejchihualisti ipan toaltepe huan ya nopa anquicactoque.

46 Huan nojquiya Salomón ya mosehuía ipan David isiya cati yejyectzi.

47 Huan nopa tacame cati quipalehuíaj Tanahuatijquet David hualajque para quitiochihuase David huan quiilhuijque: ‘Toteco Dios ma quichihua Salomón noja más hueyi que ta. Huan ma quipiya más hueyi tequiticayot que ta.’ Huan teipa David motancauquetzqui nopona ipan itapech huan quihueyichijqui Toteco Dios.

48

Huan motata quitascamatqui TOTECO cati toDIOS tiisraelitame pampa quema yaya noja itztoya, TOTECO quitapejpeni se para elis tanahuatijquet huan

para mosehuis ipan isiya yejyectzi huan yaya noja huelqui quiita ica iixteyol.

⁴⁹ Huajca nochí itanotzalhua Adonías pejque tahuel momajmatíaj huan nimantzi moquetz-tiquisque huan sesen ten inijuanti yajqui ipan iojhui. ⁵⁰ Huajca Adonías motalojtejqui huan momatatzquilito ipan icuacua nopa taixpamit tiopan calijtic para quimanahuis inemilis pampa qui-imacasiyaya Salomón huan moilhui huelis amo quimictisquía tiopan calijtic. ⁵¹ Huan se tacat quiilhui Salomón:

—Tanahuatijquet Salomón, Adonías mitzimacasi, huan ama momatatzquilijtoc ipan icuacua taixpamit ipan yoyon tiopamit huan chicahuac mitztajtanía xijtestigojquetza Toteco Dios para amo tijmictis.

⁵² Huan Salomón quiijto:

—Sinta quinextía para itztoc cuali tohuaya, amo teno ipantís. Pero sintá mosisinis ica tojuanti, huajca miquis.

⁵³ Huajca Salomón tatitanqui ma quicuitij campa itztoya campa taixpamit. Huan Adonías hualajqui huan motancuaquetzqui iixpa Tanahuatijquet Salomón. Huan Salomón quiilhui: “Ya xiya mochaj.”

2

Itayacapan tanahuatilhua David

¹ Quema monechcahuiyaya nopa tonali para miquis David, quiconsejomacac iconé, Salomón, huan quiilhui: ² “Na ya nimiquis quej pano ica nochí masehualme ipan taltipacti. Ximotetili

huan ximochihua se titacat. ³ Xijtoquili nochitanaahuatilhua TOTECO Dios. Xinejnemi ipan iojhui huan xijchijtinemi nochitati ya quipactía. Xijchihua sesen itanaahuatilhua, ileyes, itamachtilhua huan iejemplos cati quiijcuilo Moisés para nochitatis quisas cuali para ta ica cati tijchihuas huan campa tiyas. ⁴ Huan sinta tijchihuas nochitati ya ni, huajca TOTECO quichihuas cati techtencahuili. Techilhui sinta noconebla huan noixhuihua teipa ehuani nemise cuali iixpa huan quitoquilise ica nochitati iniyolo, huan ica nochitati inialma huan quichihuase san cati melahuac, huajca se noixhui nochipa mosehuis ipan nosiya yejyectzi para tanahuatis ipan ni tali Israel.

⁵ “Ta ya tijmati taya techchihuili Joab cati icona Sarvia. Quinmicti nopa ome huejhueyi taya-canani ten nosoldados. Quimicti Abner cati icona Ner huan Amasa, icona Jeter. Quinmicti quema oncayaya tasehuilisti. Huan yeca ica cati quichijqui, quichijqui ma nesi quej onca se tatehuilisti. Huan inieso quipajqui itzinquechilpica huan itecac. ⁶ Ta tiitztoc se titacat cati talnamiqui, huajca temachti tijmatis taya tijchihuas. Amo xijcahuilis para Joab huehuejmiquis ica paquilsti.

⁷ “Xijpiya hueyi moyolo ica iconehua Barzilai cati ehua tali Galaad. Xiquincahuili ma tacuaca campa momesa mojmosta pampa techpalehuijque miyac quema nicholohuayaya ten moicni Absalón. ⁸ Nojquiya amo xiquelcahua Simei, icona Gera, cati se iteipa ixhui Benjamín huan ehua altepet Bahurim. Yaya techtelchijqui ica camanali cati más fiero quema nicholohuayaya ipan ojti para Mahanaim. Huan teipa quema nimocuetqui,

techseli nepa ipan hueyat Jordán huan nijtes-tigojquetzqui TÓTECO para amo nijmictisquía na.
⁹ Pero masque niquilhui ya nopa, noja quihuica tajtacoli iixpa TÓTECO. Huajca monequi tijmictis huan amo xijtapojpolhui. Ta titalnamiqui huan tijmati cuali taya tijchihuas ica ya. Xijchicahua para ma toyahui ieso huan ma miqui.”

*Mijqui David
(1 Cr. 29:26-30)*

¹⁰ Huan teipa David mijqui huan quitalpachojque ipan Jerusalén ipan nopa colonia cati itoca Ialtepe David. ¹¹ Huan David quinnahuati israelitame 40 xihuit. Chicome xihuit mosehui para tanahuatis ipan altepet Hebrón huan 33 xihuit mosehui ipan altepet Jerusalén.

*Salomón tanahuati ipan Jerusalén
(1 Cr. 29:23-25)*

¹² Huan teipa mosehui Salomón ipan isiya yejyectzi, huan pejqui tanahuatía huan elqui temachti itequiticayo.

Itamiya Adonías huan itatoquilijcahua

¹³ Teipa se tonali hualajqui Adonías, icone Haguít, cati eliyaya seyoc isihua David. Huan quiitaco Betsabé cati eliyaya inana Tanahuatijquet Salomón. Huan Betsabé quiilhui:

—¿Tihualajtoc ica cuali?

Huan Adonías quiilhui:

—Quena, nihualajtoc ica cuali. ¹⁴ San nijnequi techchihuili se favor.

Huan Betsabé quiijto:

—Techihilhui taya tijnequi.

¹⁵ Huan quiijto Adonías:

—Ta tijmati para nochí israelitame quinequiyayaj na ma nieli niinintanahuatijca. Pero nochí mopatac, huan ama nopa tequiticayot quipiya noicni pampa quej nopa quinejqui TOTECO. ¹⁶ Huajca ama san nijnequi nimitztajtanis techchihuili se hueyi favor. Amo techilhui para amo.

Huan Betsabé quiijto:

—Techilhui taya tijnequi.

¹⁷ Huajca Adonías quiilhui:

—Na nijnequi xijtajtani nopa Tanahuatijquet Salomón ma techmaca Abisag para nijchihuas nosihua, nopa ichpocat cati ehua altepet Sunem. Nijmati para yaya amo mitzilhuis, amo, pampa tiinana.

¹⁸ Huan Betsabé quiilhui:

—Cualtitoc, huajca nijtajtanis.

¹⁹ Huajca Betsabé yajqui quicamanalhuito Tanahuatijquet Salomón por Adonías. Huan nopa tanahuatijquet moquetzqui huan quiseli inana ica cuali. Teipa nimantzi mosehui ipan isiya yejyectzi huan tanahuati ma quihualiquilica se siyaj yejyectzi para inana. Huan Betsabé mosehui ica inejmat Salomón. ²⁰ Huan quiilhui:

—Nijnequi nimitztajtanis se favor. Amo techilhui para amo.

Huan Tanahuatijquet Salomón quiijto:

—Techtajtani nochí cati tijnequi, nonana. Amo nimitzilhuis para amo.

²¹ Huan inana quiijto:

—Xijcahuili moicni Adonías ma mosihuajti ica Abisag ten altepet Sunem cati quimocuitahui motata David.

22 Huan Tanahuatijquet Salomón quiilhui inana:

—¿Para ten techtajtanía nopa ichpocat Abisag para Adonías? ¿Amo tijmachilia? Sinta noicni techtajtanía nopa ichpocat cati nochí quiitaj quej elisquía se isihua notata pampa quimocuitahui, huajca eltoc quej techtajtanía ma nijmaca noicni nohueyi tanahuatijcayo para quinahuatis. Tijmati para yaya cati achtohui ejquet huan quinequiyaya tanahuatis quej nopataca. Huan tijmati para Joab huan nopa totajtzi Abiatar ya mosejcotilijque ihuaya.

23 Huajca Tanahuatijquet Salomón quitestigoj-quetzqui TOTECO huan quijito: “Ma Toteco Dios techtatzaculti sinta amo nijchihuas ma miqui Adonías ama ni tonali por ni tamanti cati mitzhuijtoc techtajtaniqui. **24** Yaya TOTECO cati techmacatoc ni tequiticayot huan techsehui ipan isiya yejyectzi notata David para ma nitanahuati. Huan yaya quichijtoc nochaj ma eli se familia ten tanahuatiani ica se nocone cati techtoquilis ipan ni hueyi tequiticayot huan teipa iconehua huan iixhuihua cati tacajtiyasse. Huajca temachti ama ni tonali miquis Adonías.”

25 Huajca Tanahuatijquet Salomón quinahuati Benaía ma quiitzqui Adonías. Huan yaya quiitzqui huan quimicti. **26** Huan teipa Tanahuatijquet Salomón quiilhui nopa totajtzi Abiatar: “¡Xiya mochaj ipan pilaltepetzi Anatot! Quinamiqui nimitzmictisquía nojquiya, pero amo nimitzmictis ama pampa tijhuicac icaxa TOTECO Cati Quipiya Nochi Tanahuatili quema notata itztoya. Nojquiya titaijyohui ihuaya quema

quipanoyaya miyac cuesoli.” ²⁷ Huajca quej nopa Salomón quiqxiti Abiatar ipan itequi huan ayecmo tequitic quej ihueyi totajtzi TOTECO. Huan ica ya nopa tanqui nopa camanali cati TOTECO quijjtojtoya ipan Silo para yon se iixhui totajtzi Elí amo quitamiltisquía itequi quej totajtzi.

²⁸ Huan quema Joab quimatqui para Salomón ya quimictijtoya Adonías, tahuel momajmati. Joab amo quipalehujtoya Absalón, icone David cati achtohui mosisini ihuaya itata, pero quena, Joab quipalehujtoya Adonías quema quinequiyaya mochihuas tanahuatijquet. Huajca Joab matalojtejqui huan yajqui campa itaixpa Toteco ipan nopa yoyon tiopamit huan momatzquili ipan icuacua nopa taixpamit pampa moiilhui huelis amo quimictisquíaj yoyon tiapan calijtic. ²⁹ Huan quimachiltijque Tanahuatijquet Salomón para Joab itztoya campa taixpamit. Huan Salomón quinahuati Benaía ma yahui quitzontamiltiti. ³⁰ Huajca Benaía yajqui campa taixpamit yoyon tiapan calijtic huan quiilhui Joab:

—Totanahuatijca quijjtohua, xiquisa.

Huan Joab quinanquili:

—¡Amo niquisas! ¡Nica nimiquis!

Huajca Benaía quiilhuito Tanahuatijquet Salomón cati quijjito. ³¹ Huan Tanahuatijquet Salomón quiilhui:

—Xijchihua quej yaya quijjtohua. Nopona xijmicti huan teipa xijhuica xijtalpachoti. Huan quej nopa ayecmo nijhuicas tajtacoli na, yon ichaj notata pampa amo tijmictijtoque Joab, pampa

yaya achtohuiya quinmicti cati amo teno quichijtoyaj. ³² Huajca ama TOTECO quicuepilis Joab pampa quinmicti ome tacame cati más cuajcualme huan más xitahuaque que ya. Amo teno ten nopa tamanti quimatiyaya notata hasta teipa. Joab quimicti Abner, icone Ner, cati elqui nopa hueyi tayacanquet ten soldados ipan tali Israel. Huan nojquiya Joab quimicti Amasa, icone Jeter, cati elqui nopa hueyi tayacanquet ten soldados ipan tali Judá. ³³ Huajca Joab huan iixhuihua quihuicase tajtacoli para nochipa por ni ome cati quinmicti. Pero para nochipa ma onca itasehuilis TOTECO ica notata David huan ica nochí iixhuihua teipa ehuani huan ica nochí cati mosehuise para tanahuatise ipan isiya.

³⁴ Huajca Benaía yajqui campa itztoya Joab huan quimicti. Teipa quitalpachojque nechca ichaj ipan nopa huactoc tali campa amo teno eli.

³⁵ Huan Tanahuatijquet Salomón quitali Benaía para ma eli nopa hueyi tayacanquet ten isoldados quej ipataca Joab. Huan para hueyi totajzi, Salomón quitali Sadoc quej ipataca Abiatar.

³⁶ Teipa Salomón tatitanqui ma quinotzatij nopa tacat Simei, cati David quiilhuijtoya ma quimicti huan quiilhui:

—Xijchihua se cali nica ipan altepet Jerusalén huan xiitzto nica, pero amo quema xiquisa ten ni altepet. ³⁷ Pampa sintia tiquisas ten altepet Jerusalén huan tiquixpanos nopa pilatajzi Cedrón, xijmati cuali para timquis huan elis ta motajtacol.

³⁸ Huajca Simei quinanquili nopa tanahuatijquet:

—Cualtitoc. Xitahuac ni tatzacuiltli cati tiquij-tojtoc huan ya nopa nijchihuas.

Huajca Simei mocajqui para itztos miyac tonali nepa ipan Jerusalén.³⁹ Pero quema ya panotoya eyi xihuit, cholojque ome itequipanojcahua cati quincojtoya. Inijuanti cholojque hasta campa itztoya nopa hueyi tanahuatijquet Aquis ipan tali Gat. Huan quiyolmelajque Simei para itequipanojcahua itztoyaj nopona.⁴⁰ Huajca Simei moquetzqui huan quipejpechti iburro huan yajqui tali Gat campa itztoya Tanahuatijquet Aquis para quintemoti itequipanojcahua. Huan quema quinpanti, sempa quinhuicac hasta altepet Jerusalén.⁴¹ Huan quema Salomón quimatqui para quistoya Simei ipan altepet Jerusalén, huan yajqui tali Gat huan ya mocuectoya;⁴² tanahuati ma quinotzatij Simei para ma monexti iixpa. Huan Salomón quilhui:

—¿Amo nimitzchijqui xijtestigojquetza TOTECO para timocahuasquía nochipa ipan ni altepet Jerusalén? ¿Amo niquijto sintia se tonali tiquisasquía para tiyas sejcoyoc, temachti timiquis? Huan ¿amo ta techilhui para xitahuac nopa tatzacuiltli cati nimitzmacac huan san ya nopa tijchihuasquía?⁴³ Huajca ¿para ten tijchijtoc cati tijtestigojquetzqui TOTECO para amo tijchihuas? ¿Para ten amo tijtacaquili cati nimitznahuati?

⁴⁴ Huan nojquiya Salomón quilhui:

—Nijmati tiquelnamiqui nochí nopa fiero tamanti cati tijchihuili notata David. Huajca ama TOTECO mitzcuepilis cati fiero tijchijqui.⁴⁵ Ma TOTECO techtiochihua huan ma quitiochihua

itequiticayo notata huan se iixhui ma quihiyas tequiticayot para nochipa para tanahuatis ipan isiya.

⁴⁶ Huan teipa Tanahuatijquet Salomón quinahuati Benaía ma quiitzqui Simei huan ma quimicti. Huajca quiqxiti huan quimicti. Huan nopa hueyi tequiticayot cati Tanahuatijquet David achtohuiya quipixqui mocajqui temachti imaco Salomón.

3

Salomón mosihuajti ica iichpoca Faraón

¹ Salomón mohuampojchijqui ica nopa Faraón cati eliyaya hueyi tanahuatijquet ipan tali Egipto huan mosihuajti ihuaya se iichpoca. Huan qui-hualicac para ma itzto ipan altepet Jerusalén ipan nopa colonia cati itoca Ialtepe David hasta quema tamisquía quichijchihua nopa hueyi cali para ya huan itiopa TOTECO. Nojquiya más quicualchi-jchihuayaya nopa tepamit cati quiyahualojtoc nopa altepet Jerusalén. ² Ipan nopa tonali nochí israelitame tacajcahuayayaj para TOTECO ipan taixpamit campa hueli ipan huejcapantique te-peme pampa ayemo quiquetztoyaj se tiopamit para TOTECO.

Salomón quitajtani TOTECO ma quimaca tal-namiquilisti

(2 Cr. 1:1-13)

³ Huan Salomón quiicneli TOTECO huan quichi-jqui nochí cati quiilhuijtejqui itata, David para

ma quichihua. Pero Salomón nojquiya monejqui quimacas TOTECO tacajcahualisti huan quittatis copali inintzompac nopa huejcapantique tepeme pampa ayemo oncayaya tiopamit campa quihueyimatise TOTECO.⁴ Nopa tepet cati nochimasehualme más quitequihuijque ten nochisequinoc huejcapantique tepeme itoca eliyaya tepet Gabaón. Huajca nopa Tanahuatijquet yajqui noppo huan quimacac TOTECO se mil tacajcahualisti ipan nopa taixpamit.

⁵ Huan nopa yohuali TOTECO monexti ica Salomón ipan temicti huan Toteco Dios quiilhui: “Techtajtani cati tijnequi huan na nimitzmacas.”

⁶ Huajca Salomón quijito: “Ta tijpixqui nelcuali moyolo ica notata David cati elqui motequipanojca. Miyac tiquicneli pampa nejnenqui xitahuac moixpa, huan quichijqui cati cuali huan san ipan ta motemachi. Huan tijpixtoc hueyi moyolo ica ya hasta ama ni tonal pampa techcahuilijtoc na niicone ma nijtoquili ipan itequi.⁷ Quena, TOTECO Dios, ama techtalijtoc, na niicone, ma nimosehui ipan isiya yejyectzi para nitanahuatis quej ipataca notata David, pero niitztoc quej se conet cati amo quimati catijqui ojti quitoquilis.⁸ Pero nica niitztoc tatajco ten ni israelitame cati ta tiquintapejpenijtoc quej momasehualhua. Huan ini-juanti tahuel miyaqui hasta amo aqui hueli quinpohua.⁹ Huajca techmaca, na nimotequipanojca, talnamiquilisti para huelis niquntajtolxitahuas ica cuali. Xijchihua ma nijmachili cati cuali huan cati amo cuali, pampa amo aqui yon se tacat cati iseltitzi quipiya talnamiquilisti para quinnahuatis moisraelita masehualhua.”

¹⁰ Huan quiyolpacti Toteco pampa Salomón motajtani talnamiquilisti. ¹¹ Huan Toteco Dios quiilhui: “Pampa ta techtajtanjtoc talnamiquilisti para titetajtolxitahuas cuali, huan amo techtajtani para tiitztos miyac tonali, yon amo techtajtani para timoricojchihuas, yon para tiquintanis mocualancaitacahua, ¹² huajca, quena, nimitzmacas hueyi talnamiquilisti. Nimitzmacas se talnamiquilisti cati quipano nochí cati sequinoc quipixtoque hasta ama. Huan quipanos cati quipiyase masehualme teipa. ¹³ Huan nojquiya nimitzmacas cati amo timotajtanijtoc. Nimitzmacas ricojyot huan miyac tatepanitacayot. Amo aqui yon se tanahuatijquet ipan ni taltipacti cati elís quej ta ipan nochí monemilis. ¹⁴ Huan sinta tijtoquilis noojhui huan tijchihuas notanahuatilhua quej quichijqui motata David, huajca na nojquiya nimitzmacas miyac tonali para tiitztos ipan ni taltipacti.”

¹⁵ Huan teipa Salomón isac huan momacac cuenta para temiquiyaya. Huan mocuetqui Jerusalén huan moquetzqui iixpa icaxa TOTECO cati quipiyayaya nopa tanahuatilme cati TOTECO quimacatoya Moisés. Nopona quimacac TOTECO tacajcahualisti tatatili huan tacajcahualisti ten tayoltalili para quitascamatis por nochí cati quiilhuijtoya. Teipa nopona quichijqui se hueyi tacualisti ica ininacayo nopa tapiyalme cati mocajtoyaj imaco huan quinnotzqui nochí itequipanojcahua.

Salomón tetajtolsencajqui xitahuac

¹⁶ Teipa panoc tonali huan hualajque ome ahulinencia sihuame para ma quinsencahuili inincuesol. Huan monexticoj iixpa Tanahuatijquet Salomón. ¹⁷ Huan se ten inijuanti quiijto:

—Noteco, tojuanti tiitztoque tiome san sejco ipan se cali. Huan na nijtacatilti se pilconetzi quema yaya itztoya nohuaya. ¹⁸ Huan ica eyi tonati yaya nojquiya quipixqui se icone quema tiitztoyaj san sejco. Huan tojuanti timocahuaj san sejco huan amo aqui más itztoc tohuaya ipan tochaj. ¹⁹ Pero tayohua mijqui cati ya icone pampa motejqui ipani quema cochtoya. ²⁰ Huan teipa yaya mijquejqui tajco yohual quema nichochtoya huan quitali icone cati mictoc nomaco huan quicuic nocone para coches ihuaya. ²¹ Huan ica ijnaloc quema nimijquejqui para nijchichitis nocone, niquitac para mictoc. Pero quema tanesqui, niquitac para amo na nocone.

²² Huajca nopa seyoc sihuat quiilhui ne seyoc sihuat:

—¡Amo! Ni conet cati yoltoc ya ni na nocone huan nopa conet cati mictoc, ta mocone.

Huan nopa seyoc sihuat sempa quiilhui:

—¡Amo! Ta mocone yaya cati mictoc huan na nocone cati yoltoc.

Quej nopa monajnanquiliyayaj nopa sihuame iixpa nopa tanahuatijquet. ²³ Huajca Tanahuatijquet Salomón moilhui: “Sesen ten inijuanti quiijtohua para nopa conet cati yoltoc iaxca huan nopa conet cati mictoc iaxca ne se.”

²⁴ Huajca Salomón tanahuati:

—Techhualiquilica se macheta.

Huan quihualiquilijque nopa tanahuatijquet se macheta cati oncac tatentili. ²⁵ Teipa Salomón quinahuati itequipanojca:

—Xijtajcotequi nopa pilconetzi cati yoltoc huan xijmaca tajco sesen ten inijuanti.

²⁶ Huajca nopa sihuat cati nelnelía inana nopa pilconetzi cati yoltoc huan tahuel quiicneliyaya cuatzajtzitejqui huan quijto:

—¡Amo, noteco! Xijmaca nopa pilconetzi ne se sihuat huan amo xijmicti.

Pero nopa seyoc sihuat quijto:

—Más cuali ma quimictica huan ma quitajcotequica para amo mitzmacase ta, yon na.

²⁷ Huajca nopa tanahuatijquet quiilhui itequipanojca:

—Amo xijmicti. Xijmaca nopa pilconetzi yaya cati quinequi ma yolto pampa yaya nelía inana.

²⁸ Huan nochí israelitame nimantzi quicajque quenicatza nopa tanahuatijquet quinsencahuilijtoya inincuesol nopa sihuame huan san quitachilijque por cati quichijqui. Huan masehualme quimachilijque para Toteco Dios quimacatoya hueyi talnamiquilisti para tetajtolsencahuas xitahuac.

4

Tacame cati quipalehuijque Salomón

¹ Huajca Salomón elqui tanahuatijquet ten nochí israelitame. ² Huan itayacanca tequipanojcahua cati más quihiucayayaj tequiticayot elque ni tacame:

Azarías cati elqui iconé nopa totajtzi Sadoc,

- ³ Elihoref huan Ahías iconehua Sisa, elque tajcuilohuani ipan tequicali,
 Josafat, icone Ahilud, quiijcuilohuayaya nochi cati panoyaya ipan itequi Tanahuatijquet Salomón,
- ⁴ Benaía, icone Joiada, elqui nopa hueyi tayacanquet ten nochi isoldados Salomón,
 Sadoc huan Abiatar elque itotajtzitzi TOTECO,
- ⁵ Azarías, icone Natán, quipixqui tequiticayot ica nochi gobernadores ipan sesen estado,
 Zabud, icone Natán, elqui itaconsejomacaca huan inelhuampo Salomón,
- ⁶ Ahisar quipixqui imaco nopa hueyi tequicali para quimocuitahuis.
- Huan Adoniram, icone Abda, elqui tayacanquet ten nochi comun tequit.
- ⁷ Salomón quixelo tali Israel ica 12 talme quej elisquía estados huan 12 gobernadores quipiyayayaj tequit; sesen ipan se iestado. Inintequi nopa tequichihuani elqui para quitemose tacualisti para quitamacase nopa tanahuatijquet, ichaj ehuani huan nochi itapalehuijcahua. Sesen tequitiquet ten sesen estado monejqui quintamacas para se metzti ipan sesen xihuit.
- ⁸ Nica eltoc inintoca nopa 12 gobernadores huan canque tequitique:
 Hur quihiucayaya tequit ipan nochi tali Efraín campa tahuel tepeyo.
- ⁹ Decar quihiucayaya tequit campa altepeme Macaz, Saalbim, Bet Semes, Elón huan Bet Hanán.

- ¹⁰ Hesed quihuicayaya tequit ipan altepet Arubot,
Soco huan nochí nopa tali cati itoca Hefer.
- ¹¹ Abinadab mosihuajti ica Tafat, iichpoca
Tanahuatijquet Salomón, huan
quihiucayaya tequit ipan nochí talme Dor.
- ¹² Baana, icone Ahilud, quihiucayaya tequit ipan
altepeme Taanac, Meguido huan ipan
nochí tali Bet Seán cati eltoc inechca nopa
altepet Saretán cati eltoc achi más tatzinta
ten altepet Jezreel. Baana quihiucayaya
tequit ten altepet Bet Seán hasta Abel
Mehola huan hasta Jocmeam.
- ¹³ Geber quihiucayaya tequit ipan tali Galaad
ipan nopa altepet Ramot. Nojquiya
quihiucayaya tequit ipan altepet Jair
cati quihiuica itoca nopa tacat Jair cati
elqui icone Manasés. Nojquiya Geber
quipixtoya imaco nopa altepeme campa
itoca Argob ipan tali Basán. Nopona
oncayaya 60 altepeme ica tepame huan
caltemit cati cuajcuali tasencahuali. Huan
inincaltenhua tachijchihuali ica nopa
teposti cati itoca bronce.
- ¹⁴ Ahinadab, icone Iddo, quihiucayaya tequit ipan
altepet Mahanaim.
- ¹⁵ Ahimaas cati mosihuajti ihuaya seyoc iichpoca
Salomón quihiucayaya tequit ipan nochí
nopa tali Neftalí.
- ¹⁶ Baana, icone Husai, quihiucayaya tequit ipan
nochí tali Aser huan altepet Alot.
- ¹⁷ Josafat, icone Parúa, quihiucayaya tequit ipan
tali Isacar.

- 18** Simei, icone Ela, quihuicayaya tequit ipan tali Benjamín.
- 19** Geber, icone Uri, quihuicayaya tequit ipan tali Galaad, huan nochí campa achtohui eltoya ital Tanahuatijquet Sehón ten nopa amorreos, huan Tanahuatijquet Og cati quihuicac tequit ipan tali Basán. Geber iseltitzi eliyaya gobernador ipan nochí nopa huejhueyi talme.

Italnamiquilis Salomón huan nochí iricojyo

20 Itztoyaj tahuel miyaqui israelitame campa hueli ipan tali Judá huan Israel. Nopa israelitame itztoyaj quej imiyaca xali iteno hueyi at. Huan nochí nopa masehualme nelía paquiyayaj huan quipiyayayaj tahuel miyac tacualisti huan taili. **21** Huan Tanahuatijquet Salomón quipixqui tanahuatili ica nochí tequichihuani ten hueyat Eufrates hasta inintal filisteos campa inepa tali Egipto ica tatzinta. Huan nochí masehualme cati ehuani ipan nopa talme quitaxtahuiyayaj impuestos Salomón huan quitequipanojque nochí inemilis.

22 Para ica panose Salomón, huan ichaj ehuani huan itequipanojcahua, mojmosta monequiyaya quiselise 6 mil 600 litros ten harina cati achi cuali huan 13 mil 200 litros ten harina. **23** Huan majtacti huejhueyi torojme cati quintomajtoque ipan tatzacti, huan 20 torojme cati quintomajtoque campa potrero, huan 100 borregojme o chivojme, huan iyoca miyaqui masame, gacelas huan miyac sequinoc tamantí tapiyalme huan totome tojtomahuaque.

24 Huan Salomón quinnahuatiyaya nochí nopa talme catí eltoyaj ica campa calaqui tonati ten nopa hueyat Eufrates, ten altepet Tifsa hasta Gaza. Huan campa hueli ipan nochí ital oncayaya tasehuilisti huan nochí masehualme itztoyaj cuali.

25 Huan ipan nochí inemilis Tanahuatijquet Salomón nochí israelitame ten tali Dan ica huejcapa hasta Beerseba ica sur quipixque paquilisti huan itztoyaj ica temachili. Amo cana oncayaya tatehuilisti. Huan sesen familia quipixqui ichaj huan imil.

26 Huan Salomón nojquiya quinpixtoya 4 mil calme para icahuayojhua catí quintilanayayaj itatehuijca carrojhua. Huan quinpixtoya 12 mil soldados catí quimatiyayaj tejcoj ipan cahuayo.

27 Huan nochí gobernadores quimacayayaj tacualisti Salomón sesen metzti para nochí catí itztoyaj ipan ichaj, huan quichihuayayaj campeca para amo teno ma quinpolo.

28 Huan nojquiya quihualiquiliyayaj cebada ica nochí ixihuiyo quej monequi para icahuayojhua huan para itapiyalhua catí tamamayayaj. Quihualiquiliyayaj sesen metzti quej quintocarohuayaya huan sesen tamanti quihiucayayaj ipan nopa lugar campa monejqui.

29 Huan Toteco Dios quimacac Salomón miyac talnamiquilisti huan tamachilisti. Quena, italnamiquilis amo aqui hueliyaya quiaxilía pampa eliyaya tahuel talnamiqui.

30 Huan italnamiquilis Salomón quipano nochí talnamijca tacame catí itztoque campa hualquisa tonati huan nochí catí ehuani ipan tali Egipto.

31 Elqui más talnamiqui que Etán ten altepet Ezra huan más talnamiqui

que Hemán, Calcol huan Darda cati eliyayaj iconehua Mahol. Huan nochí masehualme ipan nochí sequinoc talme cati nechca nojquiya quiix-matiyayaj Salomón. ³² Salomón quiijcuilo 3 mil tamachtili huan 1005 huicat. ³³ Huan huelqui tamachtía cuali ten miyac tamanti cuame, masque huejhueyi cuame quej nopa tiocuame ten tali Líbano o nopa pilxihuitzitzí cati moscaltiyaya campa coyontoc tapepecholi. Nojquiya huelqui tamachtía ten miyac tamanti tapiyalme, totome, cohuame huan michime. ³⁴ Huan tanahuatiani ten nochí talme quintitanque inintayacancahua para ma quitacaquilitij italnamiquilis Salomón.

5

Salomón tacuáltali para quichihuas nopa hueyi tiopamit

(2 Cr. 2:1-18)

¹ Tanahuatijquet Hiram ipan tali Tiro nochipa eliyaya inelhuampo Tanahuatijquet David. Huan quema Hiram quimatqui para Salomón eliyaya tanahuatijquet ipan nochí tali Israel, quintitanqui itequipanojcahua ma quilhuitij Salomón para nelpaquiyyaya pampa Salomón mochijtoya tanahuatijquet.

² Huan teipa Salomón quititanili Tanahuatijquet Hiram ni camanali ica itequipanojcahua, quiijto:

³ “Ta tijmati notata David amo huelqui quichijchihua se tiopamit para TOTECO Dios, pampa quipixqui miyac tatehuilisti ica miyac talme cati quiyahualojtoyaj. Amo huelqui quichijchihua se tiopamit hasta

TOTECO quichijqui ma quintani nochicualancaitacahua. ⁴ Pero ama, quena, noTECO Dios techmacatoc tasehuilisti ica nochicualancaitacahua ipan seyoc tali huan notal ehuani nojquiya nochipaquij. ⁵ Huajca ama nimotemacatoc nijchijchihuas se tiopamit campa masehualme quitepanitase itoca TOTECO, pampa quej nopa TOTECO quiilhui notata David ma nijchihua. Pampa TOTECO quiilhui notata para na, niicone, cati yaya quitalisquía para tanahuatis ipan isiya David, na nijchijchihuasquía se tiopamit campa quitepanitase itoca.

⁶ “Huajca ama nimitztajtanía techpalehui ipan ni tequit huan xiquinnahuati motequipanojcahua ma techtzontequilica tiocuame ipan nopa cuatitamit ten tali Líbano. Notequipanojcahua quinpalehuise motequipanojcahua huan na nimitzmacas cati ta techilhuis para xitahuac niquintaxtahuis. Cuali tijmati para amo aqui quimati quema, huan quenicatza cuatequis quej anSidón ehuani.”

⁷ Quema nopa Tanahuatijquet Hiram quicajqui icamanal Salomón, tahuel yolpajqui huan quijito: “¡Tascamatí TOTECO, pampa tijmacatoc David se icona cati tahuel talnamiqui para elis tanahuatijquet ica nochicualancaitacahua ipan seyoc tali huan notal ehuani nojquiya nochipaquij!”

⁸ “Huan Tanahuatijquet Hiram quinanquili Salomón ica ni amacamanali cati ica quiilhui:

“Nijselijtoc nopa camanali cati techtitanili, huan
nijchihuas nochí cati techtajtanía. Nimitz-
macas nochí cuame ten tiocuahuit huan ten
ciprés cati tijnequi.⁹ Notequipanojcahua
huelis quinhuicase nopa cuame ten nopa
cuatitamit Líbano hasta nopa hueyi at. No-
pona quinlpise para quichihuase cuat-
apechti huan yase iixco hueyi at hasta
campa ta techilhuis. Huan nopona quito-
jtomase huan ta tiquinselis huan tiquin-
huicas. Huan huelis techtaxtahuis ica
tacualisti para nochaj ehuani.”

¹⁰ Huajca Tanahuatijquet Hiram quimacac
Salomón nochí cuahuit ten tiocuahuit huan
ten ciprés cati motajtanjtoya. ¹¹ Huan huajca
Salomón quititaniliyaya Tanahuatijquet Hiram
sesen xihuit 4 millones 400 mil litros ten trigo
huan 4 mil 400 litros ten aceite para nochí ichaj
ehuani. ¹² Huan TOTECO quimacac talnamiquili
Salomón quej quilhuijtoya. Huan Tanahuatijquet
Hiram huan Salomón mohuampojchijke huan
quisencajque se camanali san sejco para nochipa
itztose ica cuali se ica seyoc.

Tacame cati tequipanojque ipan Ichaj TOTECO

¹³ Teipa Tanahuatijquet Salomón quintemo 30
mil tacame ten campa hueli ipan nochí tali Is-
rael para quichihuase comun tequit. ¹⁴ Huan
quintitanqui ipan nopa hueyi cuatitamit ipan tali
Líbano. Huan mopatatiyajque 10 mil tacame sesen
metzti. Quej nopa itztoyaj se metzti nepa ipan
Líbano huan ome metzti ipan ininchajchaj. Huan
Adoniram quinyacanqui nopa tacame ipan nopa
tequit. ¹⁵ Nojquiya Salomón quintequimacac

70 mil tacame para tasasacase huan 80 mil cati quitejtequiyayaj tet nopona campa tepeme. ¹⁶ Huan quintequitali 3 mil 300 tayacanani para quitachilise nopa tequit huan quintequimacase sequinoc. ¹⁷ Huan Salomón quinnahuati nopa tacame ma quiquixtica huejhueyi teme ipan tepeme huan ma quintejtequica sesen para monamisque cuali ipan itzinpehualtil nopa tiopamit. Huan nopa teme quisqui tahuel patiyo. ¹⁸ Huan tacame ten altepet Gebal quinpalehuijque inincalchijcahua Salomón huan Hiram para quicualtalise nochí cuame huan teme para nopa tiopamit.

6

Salomón quipehualti nopa tiopamit (2 Cr. 3:1-14)

¹ Quema yahuiyaya para 480 xihuit para TOTECO quinquixtijtoya israelitame ipan tali Egipto, huan yahuiyaya para nahui xihuit para tanahuatis Salomón, ipan metzti ome ipan israelita calendario, nopa metzti cati itoca Zif*, Tanahuatijquet Salomón pejqui quichijchihua nopa hueyi tiopamit para TOTECO. ² Huan nopa tiopamit cati quichijchijqui Tanahuatijquet Salomón para TOTECO quipiyayaya 27 metros ihuehueyaca, huan 9 metros ipatajca huan ihuejcapanca quipiyayaya 13 metros huan tajco. ³ Huan icalixpa nopa tiopamit nojquiya quipiyayaya 9 metros ihuehueyaca, huan 4 metros huan tajco ipatajca. ⁴ Huan quichihuili nopa tiopamit ventanas pajpatahuac ica calijic

* **6:1** 6:1 Ipan abril o mayo ipan tocalendario ten ama.

huan para calteno amo más pajpatahuac.
⁵ Huan yahualtic nopa tiopamit ipan sesen lado ihuehueyaca huan ica iica quichijque pilcuartojtzitzi. Huan tatajco mocajqui nopa cuarto Tatzejtzeloltic huan nopa cuarto cati Más Tatzejtzeloltic. ⁶ Quipixqui eyi pisos ten cuartos cati quiyahualo nopa cuartos Tatzejtzeloltic. Nopa cuartos ipan nopa piso cati más tatzinta quipiyayaya 2 metro huan 25 centímetros ininpatajca. Huan nopa cuartos ipan nopa ompa piso quipiyayaya 2 metro huan 70 centímetros ininpatajca. Huan nopa piso más huejcpa quipiyayaya 3 metro huan 15 centímetros. Huan nopa cuartos motatzquiljtoyaj ipan nopa tepamit ten nopa tiopamit ica cuatetomit ten tiocuahuit cati mosehuijtoya ipan se apechti ten nopa cuartos tatzejtzeloltic cati mocajqui tatajco. Quej nopa quichijque para nopa taquetzalme ma amo calaquica ipan nopa cuartos tatajco cati tatzejtzeloltique.

⁷ Huan nopona campa tepexit campa quiqxintiyajaj tet para quichihuase nopa tiopamit, quitejtequiyayaj sesen tet para monamisque cuali ica cati yas inechca. Huajca quema quihualicaque campa quiquetzase nopa tiopamit, nochí nopa teme ya eltoya senquisa tacualtalilme. Yeca quema quichijchijque nopa tiopamit ayecmo quitequihuijque yon se martillo, yon se cincel, yon se tamanti teposti. ⁸ Huan para calaquise tiopan calijtic quipixqui se caltemit ica sur ica inejmat nopa tiopamit ipan nopa achtohui piso. Huan nojquiya tejcotiyajqui se ascahuasti san quej se tenaquisti para masehualme huelise

ajsise ipan nopa ome piso. Huan seyoc ascahuasti quej nopa yajqui ten nopa ome piso hasta nopa eyi piso cati más huejcapa.

⁹ Huan quema Salomón ya quitamiltijtoya nopa tiopamit, quitzontzajqui ica miyac cuatetomit huan huapalme cati senquisa tiocuahuit. ¹⁰ Huan quej ya niquijto quichijchijqui nopa cuartos cati quiyahualohuayaya nochí nopa tiopamit ipan eyi lados huan quipixqui eyi pisos. Huan ihuejcapanca sesen cuarto ipan sesen piso elqui 2 metros huan 25 centímetros. Huan motatzquilijtoyaj ipan itepa nopa tiopamit ica cuatetomit ten tiocuahuit. ¹¹ Huan se tonali TOTECO quimacac Salomón ni camanali, quiilhui: ¹² “Ama ta tijchijchihua ni tiopamit, huan sintia tijtoquilis notamachtilhua huan tijchihuas cati quijtohua nochí noleyes, huan tijneltucas nochí notanahuatilhua, huajca na nimitzchihuilis nochí cati nijtencahuili motata David para nijchihuas. ¹³ Na nimocahuas para niitztos tatajco israelitame huan amo quema niquincajtehuas pampa amojuanti anomasehualhua.”

Quenicatza nesiyaya tiopan calijtic

¹⁴ Huajca quej nopa Salomón tanqui quichijchihua nopa hueyi tiopamit. ¹⁵ Huan calijtic sesen cuarto quitzajque ítzompac huan ipan itepa ten talchi hasta huejcapa ica huapalme ten tiocuahuit. Huan quej piso quitalijque senquisa huapalme ten ciprés.

¹⁶ Huan nopa cuarto Tatzejzeloltic quixelojque para nopona campa más calijtic mochihuas nopa cuarto cati Más Tatzejzeloltic huan quitzajque

nopa cuarto ica huapali ten tiocuahuit ten talchi hasta huejcapa huan nojquiya san se quichijque itzompac. Huan nopa cuarto cati Más Tatzejzelotic quipiyayaya quej 9 metros ihuehueyaca. ¹⁷ Huan nopa cuarto cati Tatzejzelotic cati tatajco mocajqui ipan tiopamit quipiyayaya 18 metros ihuehueyaca. ¹⁸ Huan nochí tepamit ipan nochí cuartos ipan tiopamit quintzajque nopa tet ica huapalme ten tiocuahuit. Huan nopa huapalme nochí quinyejyecchijtoyaj ica taixcopincayome ten xochit cati cahuantoc huan cuatajciyat. Huan yon se tet amo nesiyaya. ¹⁹ Huan quiyejyectalijque nopa cuarto cati Más Tatzejzelotic cati eltoya calijtic ipan tiopamit para nopona quitalise icaxa TOTECO ica itanahuatilhua. ²⁰ Huan nopa cuarto cati Más Tatzejzelotic huan más calijtic quipiyayaya 9 metros ihuehueyaca, huan 9 metros ipatajca huan 9 metros ihuejcapanca. Huan nopa huapali cati ica quitzactoya nopa tepamit, Salomón quiajalti senquisa ica oro. Huan nojquiya quiajalti nopa taixpamit ten tiocuahuit ica senquisa oro. ²¹ Nojquiya quiajalti ica senquisa oro nochí nopa cuarto Tatzejzelotic. Huan quitzajqui icalte cati calaqui ipan nopa cuarto campa Más Tatzejzelotic ica tepos cadenas cati senquisa oro para amo aqui huelis calaquis san quej hueli. ²² Huajca quitamiixalti nochí tiopan calijtic ica oro. Huan nojquiya nopa taixpamit cati eltoya nechca campa Más Tatzejzelotic quiajalti ica senquisa oro.

²³ Nojquiya nopona campa Más Tatzejzelotic quinchijchijqui ome querubines ten olivo cuahuit. Huan sesen quipixqui 4 metros huan

tajco inihuejcapanca. ²⁴ Huan ieltopal se ilhuicac ejquet elqui 2 metros huan 25 centímetros huan ne se ieltopal nojquiya 2 metros huan 25 centímetros. Huajca ten iyecapa se ieltopal hasta iyecapa ne seyoc ieltopal quema mopatajtoque mochijqui 4 metros huan tajco. ²⁵ Nochi ome nopa querubines elque san se. San se inintachiyalis huan inihuexca huan san se tachijchihuali. ²⁶ Huan inihuejcapanca nochí ome querubines elqui san se tatamachihuali, 4 metros huan tajco. ²⁷ Huan Salomón quintali nopa ome querubines nejnechca se ica seyoc tatajco ipan nopa cuarto campa Más Tatzejzeloltic huan nopa ome quipatajtoyaj nopa nahui inieltapal. Huan iniyecapa inieltapalhua cati quipixtoyaj inica quiajsiyaya sesen tapepecholi. Huan ne sequij inieltapal cati eltoya más ica iniixta moa jsiyayaj tatajco ipan nopa cuarto cati Más Tatzejzeloltic. ²⁸ Huan nojquiya quinijajalti nopa querubines ica oro. ²⁹ Huan ipan nopa tapepecholi campa Tatzejzeloltic huan campa Más Tatzejzeloltic quintejtectoyaj nopa huapalme huan quinixcopintoyaj querubín ilhuicac ehuani, apachij cuame huan xochime cati cahuantoque. Quinixcopinque ica calitic huan ica calteno. ³⁰ Huan ipiso nopa ome cuartos cati Tatzejzeloltic quiajaltijque ica oro.

³¹ Huan campa calaquise ipan nopa cuarto cati Más Tatzejzeloltic quichijqui ome caltemit ica huapali cati monamiquiyaya ten nopa cuahuit olivo. Huan itencuayo nopa caltemit elqui yejyectzi huan quipixqui macuili ixayac. ³² Huan

ipan ni ome caltemit ten olivo cuahuit calijtic huan calteno quinixcopinqui nopa querubín ilhuicac ehuani, apachij cuame huan xochime cati cahuantoque. Huan nochí quinajalti ica oro. ³³ Huan quichihuili icalte para calaquis campa Tatzejzeloltic ica cuahuit ten olivo huan itencuayo nopa caltemit quipiyayaya nahui iesquinajyo. ³⁴ Pero nopa ome caltemit eliyaya ten cuahuit ciprés, huan sesen ten nopa ome caltemit quipiyayaya iixnamic cati mohuelpachohuayaya. ³⁵ Huan ipan nopa caltemit quinixcopinqui nopa querubines, apachij cuame huan xochime cati cahuantoque. Huan nochí quinajalti ica oro. ³⁶ Huan quichijchijqui nopa tamapamit cati calijtic ica eyi pamit ten tet tecpantoc huan teipa se pamit ten apechme ten tiocuahuit.

³⁷ Huan quema Tanahuatijquet Salomón yahuiyaya para nahui xihuit ipan itequi, quema pejqui metzti Zif ipan toisraelita calendario†, quitalijque itzinpehualtil nopa hueyi tiopamit para TOTECO.

³⁸ Huan quema Salomón yahuiyaya para 11 xihuit ipan itequi, ipan nopa metzti Bul, nopa chicueyi metzti ipan toisraelita calendario‡, quitamiltijque nochí nopa hueyi tiopamit ica nochí tamanti cati monequiyaya. Huajca tequitique quipano chicome xihuit para quichihuase nopa hueyi tiopamit para TOTECO.

† **6:37** 6:37 Ipan abril o mayo ipan tocalendario ten ama. ‡ **6:38**
6:38 Ipan octubre o noviembre ipan tocalendario ten ama.

7

Seyoc cali quichijchijqui Salomón

¹ Teipa Salomón mochijchihuili se hueyi cali para ipan itztos huan tequitis. Huan monejqui 13 xihuit para quisencahuas. ² Se cuarto ipan ichaj Salomón quitocaxti, “Cuatitamit ten Líbano”. Huan quipixqui 45 metros ihuehueyaca, huan 22 metros huan tajco ipatajca huan nechca 13 metros huan tajco ihuejcapanca. Huan quipixqui nahui pamit ten tojtomahuaque taquetzalme ten tiocuahuit. Huan ipani motalijtoya nopa apecchme ten tiocuahuit. ³ Quipixqui 45 apecchme cati momoyajtoyaj ipan eyi pamit. Sesen pamit quipixqui 15 apecchme. Huan nochí apecchme motalijtoyaj ipan nopa nahui pamit ten taquetzalme ten tiocuahuit cati tojtomahuaque. ⁴ Huan oncayaya eyi pamit ten ventanas huan sesen ventana eltoya iixmelac seyoc ventana ipan ne seyoc tepamit ten nopa cali.

⁵ Nochi caltemit huan ventanas eliyaya san se ica nahui iesquinajyo. Huan onca eyi caltemit ipan sesen lado huan sesen caltemit eltoya iixmelac se caltemit ipan ne seyoc tepamit. ⁶ Huan nojquiya iixmelac nopa cali, quichijqui seyoc cuarto cati quitocaxti Calijticti ten Taquetzalme. Huan elqui se hueyi cuarto cati quipiyayaya 22 metros huan tajco ihuehueyaca, huan nechca 13 metros huan tajco ipatajca. Huan calijtic oncayaya miyac taquetzalme cati tojtomahuaque. Huan iixmelac ni cali quichijqui se calixpamit

ica taquetzalme huan itzontzajca. ⁷ Huan nojquiya quichijqui se Cuarto Campa Tetajtolsencahuas para nopona mosehuis nopa tanahuatijquet para quintajtolsencahuas masehualme cati taixpanose. Huan nochí nopa cali quitzajque ica huapalme ten tiocuahuit ten talchi hasta huejcapá.

⁸ Huan iica nopa cali campa tetajtolsencahuas, Salomón quichijchijqui ichaj para ipan itztos huan quipixqui se calixpamit. Huan nojquiya elqui san se tamanti tequit ica ne sequinoc calme. Nojquiya quichijqui se cali para isihua cati eliyaya iichpoca Faraón. ⁹ Huan ipan nochí nopa calme hasta inintzinpehualtil quichijque ica tahuel huejhueyi tet cati nelía patiyo. Huan nochí quintejejque ica tepos serrucho ipan nochí lados huan tatamachihuali san quej monequiyaya para quinamiquis cuali campa monequiyaya calaquis ipan sesen cali. ¹⁰ Inintzinpehualtil nopa calme eliyaya senquisa tet cati pajpatiyo huan tahuel huejhueyi. Sequij quipiyayaya nahui metro huan tajco inihuehueyaca huan sequij eyi metro huan eyi mistit inihuehueyaca. ¹¹ Huan ten tatzinta hasta huejcapa nojquiya quitequihuijque teme cati pajpatiyo ipan nochí tepamit ipan nopa calme. Huan sesen tet quitejejque senquisa cuali campa monequi calaquis. Huan nojquiya quitequihuijque cuatetomit ten tiocuahuit. ¹² Huan nopa hueyi calixpamit nojquiya quipixqui eyi pamit ten tet cati quiyahualohuayaya. Huan sesen tet elqui cuali tatamachihuali huan cuali tecpantoc. Huan teipa ten nopa eyi pamit ten tet quipixqui se pamit ten apechme ten tiocuahuit

san se quej quipixqui nopa seyoc calixpamit cati eltoya tiopan calijtic ipan ichaj TOTECO para ipan calaquise masehualme.

*Salomón tatitanqui ma quicuitij Hiram
(2 Cr. 2:13-14; 3:15-17)*

¹³ Huajca Tanahuatijquet Salomón tanahuati ma quicuitij nepa ipan altepet Tiro se tacat cati itoca Hiram. ¹⁴ Hiram eliyaya tajco israelita pampa elqui iconse cahual sihuat ten nopa hueyi familia Neftalí. Huan itata cati ejqui Tiro quimatiyaya tequit ica bronce. Huajca Hiram nojquiya tahuel quimatiyaya quichihua noch tamanti tequit ica bronce. Huan yaya eliyaya se talnamijca tacat ica miyac tamachilisti huan miyac yajatili. Huajca Hiram hualajqui campa Tanahuatijquet Salomón huan pejqui quichihua noch nopa tequit. ¹⁵ Huan yaya quichijchijqui ome huejhueyi tepos taquetzalme ten bronce huan cati ijticacahuaxtique. Huan sesen quipiyayaya chicueyi metro ihuejcapanca huan macuili metro huan tajco sintamotamachihuas yahualtic.

¹⁶ Nojquiya quichijchijqui ome coronas ica bronce cati quitalijque ipan inintzonteco nopa tepos taquetzalme ma quipiyaca iniyejyejca. Huan ihuejcapanca sesen ten nopa coronas eliyaya 2 metros huan 25 centímetros. ¹⁷ Nojquiya para iyejyejca sesen corona ipan sesen nopa tepos taquetzali quichijchijqui chicome matat cati taxinepaloli, huan ipan nopa matat quipixqui tepos cadenas ten bronce. ¹⁸ Nojquiya quichijqui ome pamit ten granadas ten bronce cati

quiyahualohuayayaj nopa matat huan nopa tepos cadenas. Huan nochí ya ni quichijqui para ma eli nelpano yejyectzi icorona sesen ten nopa tepos taquetzalme. Huan nochí quichijchijqui ica senquisa bronce.

¹⁹ Huan ipan inintzonteco nopa coronas ten nopa tepos taquetzalme cati mopantiyaya ipan tamapamit nesiyayaj quej lirio xochime cati nechca ome metro inihuejcapanca. ²⁰ Nojquiya ipan nopa ome tepos taquetzalme huejcapa nechca nopa coronas huan nechca nopa matat quitalijtoya ome pamit ica 200 granadas ten bronce cati quiyahualo para elis nelpano yejyectzi.

²¹ Huan Hiram quinquetzqui nopa huejhueyi tepos taquetzalme campa icalixpa nopa hueyi tiopamit. Huan quitali se taquetzali ica sur huan quitocaxti Jaquín. Huan ne se quiquetzqui ica norte huan quitocaxti Boaz. ²² Huan inintzonteco nopa coronas nesiyaya quej lirio xochime. Huan quej nopa mocajqui nopa tequit ipan nopa taquetzalme.

*Tamantzitzi ten nopa tiopamit
(2 Cr. 4:1–5:1)*

²³ Hiram nojquiya quichijchijqui se tepos paila para at huan eliyaya nelpano hueyi. Huan quichijque ica senquisa bronce huan quitocaxti nopa paila “Hueyi At”. Eltoya malacachtic quej se hueyi huajcali. Huan ten se lado hasta seyoc lado icamacoyajca quipiyayaya 4 metros huan tajco huan 2 metros ihuejcatanca. Huan quiilpitoyaj yahualtic

ica se mecat cati quipiyayaya 13 metros huan tajco ihuehueyaca.

²⁴ Huan itejteno, quentzi tatzinta ten itenyacapa ome pamit ten cuatacti ten bronce quiyahualojtoya nopa hueyi tebos paila para quiyejyecchihuas. Quipixqui quej se 20 cuatacti ipan sesen metro yahaultic. ²⁵ Huan nopa hueyi tebos paila mosehuijtoya ipan 12 torojme ten senquisa bronce. Eyi torojme tachixtoyaj ica norte, eyi campa huetzi tonati, eyi ica sur huan eyi ica campa hualquisa tonati. ²⁶ Itilajca nopa hueyi paila elqui nechca tajco mistit. Huan itenyacapa nesqui quej iquejcho se lirio xochit huan nopa hueyi paila quicuiyaya 74 mil litros ten at.

²⁷ Nojquiya quichijqui majtacti tamanti quej carretillas ica senquisa bronce huan iixco sesen quipixqui se mesa. Ihuehueyaca huan ipatajca nopa mesa elqui se metro huan nahui mistit. Huan ihuejcapanca nopa mesa elqui se metro huan nechca ome mistit. ²⁸ Huan nopa tamanti quej carretillas quipiyayaya tebos huapalme ipan nahui ielchiqui cati mosalojtoya ipan taquetzali campa esquina. Huan nopa tebos huapalme ipan ielchiqui quipixqui tebos barras para quimacas tetili. ²⁹ Huan ipan nochí nopa huapalme oncayaya taixcopincayot ten tecuanime cati intoca leones, torojme huan querubín ilhuicac ehuani. Huan tatzinta ten nopa torojme huan nopa leones quinixcopintoyaj ipan nopa bronce sequij tamanti yejyectzitzí cati malacachtique cati nesiyaya para quichijtoya ica imacuayo xihuit ihuaya xochime. ³⁰ Sesen ten nopa tamanti quej carretillas quipiyayaya nahui ruedas ten sen-

quisa bronce huan nopa eje cati ipan momalacachohuaj nopa ruedas nojquiya elque senquisa bronce. Huan sesen quipixqui nahui esquinas huan ipan sesen iesquina nopa carretillas mote-tonijtoya nahui cuatetonme cati senquisa bronce para ipan mosehuis nopa tepos comit. Huan quiyecchijtoque nopa cuatetonme ipan sesen in-inquespa ica cati nesiyaya quej xochi yahualme huan tasencahuali ten teposti. ³¹ Huan icamac nopa comit eltoya ica calijtic ten nopa tatzacti cati quiyahualojtoc huan quisa hasta huejcapa 45 centímetros. Icamac eliyaya yahualtic, huan cati quipalehuijtoya nopa carretillas quipiyayaya 68 centímetros huan tajco ihuejcapanca. Nojquiya ipan icamac quipiyayaya taixcopinali, huan nopa taixcopinali amo eliyaya mimiltic, eliyaya xi-tahuac ica nahui iesquinajyo.

³² Nopa nahui iruedas eltoyaj itzinta ten nopa tencuayome campa quisalojtoque ipan ejes campa momalacachohua nopa ruedas motatzquilijtoya ipan nopa carretillas. Ihuejcapanca sesen rueda eliyaya 68 centímetros huan tajco. ³³ Huan inintachiyalis nopa ruedas eliyaya san quej irueda se tatehuijca carro. Huan nopa tepos ejes cati ipan momalacachohuaj nopa ruedas huan nopa tepos ejes cati yahui tatajco huan nopa cati ica moilpía nochí quichijque ica senquisa bronce taatili. ³⁴ Huan ipan sesen ten nopa nahui iesquina ten nopa carretillas quipixqui itaquetzalhua cati quichijtoya san se ica nopa carretillas. ³⁵ Huan iteno nopa mesa ipan nopa carretilla quiyecchijtoya ica se tamanti yahualtic cati quipiyayaya 22 centímetros huan

tajco ihuejcapanca. Huan nopa taquetzalme ica nopa tebos huapalme eliyaya tachijchihuali san se ica nopa carretilla.

³⁶ Hiram quichijchijqui taixcopinali ten querubín ilhuicac ehuani, leones huan apachij cuame. Quej nopa ipan nochí ielchiqui ten nopa tebos huapalme huan ipan nopa taquetzalme quiyejyecchijque campa hueli. Huan quipixqui xochit yahualtic quej coronas campa hueli.
³⁷ Huan san se quichijchijqui nopa majtacti carretillas, ica san se inihuejhuexca huan san se tachijchihuali pampa quiatalijtoya nopa bronce tepesti ipan san se molde.

³⁸ Nojquiya quichijqui majtacti tebos comit ten senquisa bronce, sesen tebos comit para se carretilla. Huan icamac sesen quipiyayaya se metro huan 80 centímetros ipatajca huan icoajca hueliyaya quicuis 880 litros ten at. Huan sesen tebos comit quitalijque ipan se carretilla. ³⁹ Huan Hiram quintali macuili carretillas ica inejmat nopa tiopamit huan macuili ica iarraves. Nopa tahuel hueyi paila cati itoca Hueyi At cati achto-hui quichijchijqui quitalijque campa monamiqui iesquinajtipa ica sur huan ica campa hualquisa tonati.

⁴⁰ Hiram nojquiya quichijchijqui tebos chachapalme, tebos palas huan vasos. Huan quej nopa quitamichijqui nopa tequit para Salomón ipan itiopa TOTECO. ⁴¹ Huajca ica nochí quichijqui:
 Nopa ome huejhueyi tebos taquetzalme,
 nopa coronas ica iyejca yahualtic ipan inintzon-teco nopa tebos taquetzalme,

huan ome matat cati quiyahualojtoyaj nopa
ome coronas ipan inintzonteco nopa tepos
taquetzalme,

⁴² nopa 400 granadas cati quinhuijconque ipan
nopa tepos cadenas cati eltoya huejcapa
ipan nopa ome coronas (sesen tepos ca-
dena quipixqui ome pamit ten granadas
cati quinhuijconque yahualtic ipan inint-
zonteco nopa tepos taquetzalme),

⁴³ nopa majtacti carretillas cati quipixque nopa
majtacti pailas,

⁴⁴ nopa paila para at cati tahuel hueyi cati itoca
nopa Hueyi At ihuaya nopa 12 torojme cati
ipan motali,

⁴⁵ huan nopa tepos chachapalme, palajme huan
huajcalme.

Nochi ni tamantzitzí Hiram quichijchihuili tanahuatijquet Salomón para nopa tiopamit para TOTECO. Huan nochi eliyaya senquisa bronce cati quialaxojoque hasta cahuaniyaya. ⁴⁶ Nopa tanahuatijquet quinahuati ma quichihua nopa moldes ten chachapali nepa ipan tamayamit nechca hueyat Jordán tatajco ten nopa altepet Sucot huan Saretán. ⁴⁷ Huan Salomón amo quitamachijqui quesqui ietica nochi tamanti ten bronce pampa tahuel miyac hasta amo aqui huelqui quimatis quesqui ietica.

⁴⁸ Nojquiya Salomón quichijchijqui nochi nopa tamanti para quitequihuese ipan nopa tiopamit huan nochi quichijchijque ica senquisa oro. Quichijqui:

nopa taixpamit ten oro,

nopa mesa ten oro cati ipan quitalíaj nopa pantzi
iixpa TOTECO,

⁴⁹ nopa taahuil quetzalme ten oro, macuili qui-
quetzqui ica inejmat huan macuili ica iar-
raves iixmelac nopa cuarto campa Más
Tatzejzeloltic,

nopa miyac xochime, taahuilme huan
huitzcucharas ica senquisa oro,

⁵⁰ nopa huajcalme, nochí cati elqui para ica
quitequise imechajyo nopa taahuilme,
huan nopa tazas, pilcucharajtzitzi huan
nopa ticomit ten oro,

nopa caltemit tencuayome para campa
calaquise ipan nopa cuarto campa Más
Tatzejzeloltic, huan nopa caltemit ten
nopa tiopamit. Huan nochí quialaxojque
ica senquisa oro.

⁵¹ Huajca quej ni tanqui nochí nopa tequit
cati nopa Tanahuatijquet Salomón tanahuati ma
quichihuaca ipan nopa tiopamit ten TOTECO.
Huan quihuicalac nochí nopa oro, plata huan
tamantzitzi ten oro cati motequihuía tiopan cali-
jtic cati David, itata, quiyocatalijtoya para ichaj
TOTECO. Huan nochí quihuicalc tiopan calijtic
campá quiajocuij tomi huan tamanti cati patiyo
cati iaxca nopa tiopamit cati ichaj TOTECO.

8

*Icaxa Toteco quihuicaque ipan nopa tiopamit
(2 Cr. 5:2-14)*

¹ Huajca Salomón quinnotzqui ma mosentilica
ipan altepet Jerusalén nopa huehue tacame ten

israelitame, huan nopa tayacanani ipan iixhuihua sesen ten nopa 12 huejhueyi tatame cati huejcajquiya eliyayaj itelpocahua Israel. Nojquiya quinnotzqui nochi tayacanani ipan sesen familias. Huan nochi hualajque campa Tanahuatijquet Salomón para quicuiquij icaxa TOTECO ten Ialtepe David cati nojquiya itoca Sion huan quitalise ipan nopa yancuic tiopamit.

² Huajca nochi tayacanani mosentilijque ihuaya Tanahuatijquet Salomón quema pehua nopa hueyi ilhuit para quichijchihuase pilxajcaltzitzti ipan nopa metzti Etanim, nopa chicome metzti ipan toisraelita calendario*. ³ Huan quema ajsicoj nochi tayacanca israelitame, nopa totajtzitzti quitananque icaxa TOTECO. ⁴ Huan nopa totajtzitzti inihuaya levitame quitananque nopa caxa, huan nopa yoyon tiopamit, huan nochi nopa cuamesas cati Tatzejtzelotic, huan nochi tepos cucharas huan tamanti cati quitequihúaj nopona huan quihuicaque ipan nopa yancuic tiopamit. ⁵ Huan Tanahuatijquet Salomón huan nochi nopa israelitame cati mosentilijtoyaj ihuaya iixpa nopa caxa quimacaque TOTECO tahuel miyac tacajcahualisti ten pilborregojtzitzti huan torojme hasta amo aqui hueliyaya quinpohua. ⁶ Huan teipa nopa totajtzitzti quicalaquiique nopa icaxa TOTECO campa monequi mosehuis ipan nopa cuarto campa Más Tatzejtzelotic ipan nopa hueyi tiopamit. Huan quitalijque inieltapaltantita nopa huejhueyi querubín ilhuicac ehuani cati quinchijchijtoyaj. ⁷ Nopa huejhueyi querubín

* **8:2** 8:2 Elqui ipan itamiya septiembre o ipejya octubre ipan tocalendario ten ama.

ilhuicac ehuani quipajpatajtoyaj inieltapalhua para quiecahuilise nopa caxa huan nopa cuahuit para ica quihuicase.

⁸ Nopa cuahuit para ica quihuicase eliyaya tahuel huehueyac hasta se cati itztoc ipan nopa cuarto cati Tatzejzelotic hueliyaya quiitas iye-capas nopa cuahuit. Pero se cati itztoc calteno amo hueliyaya quiitas. Huan quej nopa eltoc hasta ama. ⁹ Nopa caxa san quipixtoya nopa ome tepatacme cati Moisés quitali nopona quema nopa israelitame sanoc quistoyaj ipan tali Egipto huan itztoyaj nechca tepet Horeb†. Nopona TOTECO quichijqui se camanal sencahualli inihuaya israelitame, huan ipan nopa ome tepatacme ijcuilijtoc nopa tanahuatilme cati TOTECO quijito mon-equi israelitame ma quitepanitaca.

¹⁰ Huan quema nopa totajtzitzi ya quitalijtoyaj nopa caxa ipan nopa cuarto Cati Más Tatzejzelotic huan ya quisayayaj, se mixti quitemiti nochitioipa TOTECO. ¹¹ Huan nopa totajtzitzi amo huelque mocajque para quichihuase inintequi tiopan calijtic pampa tahuel tamixtenqui pampa itatanex huan ihueyitis TOTECO quitemitijtoya nochitioipa.

*Icamanal Salomón
(2 Cr. 6:1-7:10)*

¹² Huajca Salomón motatajti huan quijito: “TOTECO, ta tiquipijtojtoc para tiitztoc ipan se mixti cati tilahuac. ¹³ Huan ama tihualitztoc ipan ni tiopamit cati nijchijtoc para ipan xiitzto para nochipa.”

† **8:9** 8:9 Tepet Sinaí huan Horeb, san se tepet.

¹⁴ Huan sempa Tanahuatijquet Salomón moicancuetqui huan quinixnamijqui nopa israelitame cati ijcatoyaj nopona huan quintiochijqui. ¹⁵ Huan quinilhui:

“Ma tijhueyichihuaca TOTECO, yaya cati toDios tiisraelitame. Ama yaya quitamichijtoc cati quitencahuili notata David para quichihuas. Yaya quiilhui notata ¹⁶ para amo quema quitapejpenijtoya se altepet para ipan itztos ten quema quinquixti israelitame ipan tali Egipto huan hasta nopa tonali. Ipan nochí inintal israelitame amo cana quinilhui ma quichihuilica se tiopamit cati quihuicasquía itoca para masehualme nopona quitepanitasquíaj. Pero quitapejpeni notata David ma eli tanahuatijquet ipan imasehualhua.

¹⁷ “Huan notata David quipixqui ipan iyolo para quichijchihuas ni tiopamit para ipan quitepanitas itoca TOTECO cati toDios tiisraelitame. ¹⁸ Pero TOTECO quiilhui notata David para masque elqui cuali para quinequiyaya quichihuas ichaj para quitepanitas, ¹⁹ amo elisquía ya cati quichijchihuasquía nopa tiopamit. Quiilhui para se icone quichijchihuasquía nopa tiopamit.

²⁰ “Huan ama TOTECO quitamichijqui cati quitencahuili notata para quichihuas pampa yaya techtali na nitanahuatijquet. Huan na nijchijtoc ni tiopamit para nijtepanitas TOTECO toDios tiisraelitame. ²¹ Huan nopona nijtalijtoc nopa caxa cati quipyia nopa

ome tepatacme ica nopa camanal sencahuali cati TOTECO quichijqui inihuaya tohuejapan tatahua quema quinquixti ipan tali Egipto.”

Salomón motatajti huan quimacac Toteco nopa tiopamit

²² Teipa Salomón moquetzqui nechca nopa taixpamit ten TOTECO, iniixpa nochí israelitame huan momatananqui para ilhuicac. ²³ Huan motatajti huan quiijto:

“TOTECO, titoDios tiisraelitame, amo aqui seyoc Dios quej ta, yon nepa ipan ilhuicac, yon ipan ni taltipacti. Ta nochipa tijchihua cati tiquijtohua para tijchihuas. Huan tiquinnextilía moteicnelijcayo nochí cati mitztequipanohuaj huan mitzneltocaj ica nochí iniyolo. ²⁴ Ta tijtamichijtoc nochí cati tijtencahuili tijchihuas motequipanojca David, notata. Quena, ta moseltitzi tiquijto huan ta moseltitzi tijchijtoc quej nochí tojuanti tiquitaj ama ni tonali.

²⁵ “Huajca ama, TOTECO Dios, nojquiya xijchihua nopa seyoc tamanti cati tijtencahuili notata David para tijchihuas. Tiquilhui sintia iconehua huan iixhuihua teipa ehuani quitoquilise moojhui huan nejnemise xitahuac moixpa quej yaya quichijqui, huajca para nochipa se iixhui elis tanahuatijquet ipan israelitame. ²⁶ Huajca ama TOTÉCO, ta cati titoDios tiisraelitame, xijchihua cati tijtencahuili motequipanojca

David huan xijcahua para se iixhui nochipa tanahuatis nica.

- ²⁷ “Pero Toteco Dios, tijmatij para nelía ta amo hueli mitzcuis ni taltipacti para tiitztos san nica. Yon nopa ilhuicacti cati tiquitaj, yon nopa ilhuicacti cati más huejcpa cati amo hueli tiquitaj, amo hueli mitzcuis pampa tahuel tihueyi. Huajca ¿quenicatza mitzcuis ni piltiopantzi cati na nimitzchihuilitoc?
- ²⁸ Pero ama se favor, xijtacaquili nochí cati nimitzilhuía, TOTECO Dios. Xijchihua cuenta nochí cati na nimotequipanojca nimitztajtanía moixpa ipan ni netatajtili.
- ²⁹ “Xijtachili huan xijmocuitahui ni tiopamit tayohua huan tonaya pampa nica campa tiquijtojtoc para quihuicas motoca. Xijtacaquili ni netatajtili cati na, nimotequipanojca, nijchihua ama iixpa ni tiopamit. ³⁰ Quena, se favor xijtacaquili cati na, nimotequipanojca, nimitztajtanía huan cati nochí moisraelita masehualhua mitztajtanise quema motatajise nica campa ni tiopamit. Quena, ten ilhuicac campa ta tiitztoc, techtacaquili huan techtaopoipolhui.
- ³¹ “Quema se acajya quiixpanos seyoc masehuali huan monequis quihualicase nica iixpa ni taixpamit ipan ni tiopamit para tatestigojquetzas moixpa sintia nelnelía quichijtoc o amo, ³² xijtacaquili hasta nopona ilhuicac campa tiitztoc huan xijtajtolsencahua. Xijchihua ma quiajsi tatzacuiltli yaya cati tajtacolchijtoc. Huan xijmanahui nopa mase-

huali cati amo teno quichijtoc para ma nesi
amo quihuica tajtacoli.

- 33 “Huan sinta se tonali inincualancaitacahua
moisraelita masehualhua quintanise
pampa tajtacolchijtoque moixpa,
xi quintacaquili quema moyolcuepase.
Sinta mitzpohuilise inintajtacolhua
huan motatajtise moixpa nica campa ni
tiopamit huan mitztajtanise tapojpolhuili,
34 huajca xi quintacaquili ten nopona
ipan ilhuicac campa tiitztoc huan
xi quintapojojpolhui inintajtacolhua pampa
inijuanti momasehualhua. Huan xijchihua
para huelis mocuepase ipan ni inintal cati
tiquinmacac inihuejapan tatahua.
- 35 “Sinta tijtzacuas ilhuicacti para amo
taquiyahuis pampa momasehualhua
tajtacolchijtoque moixpa, huan
teipa motatajtise ipan ni tiopamit
huan mitzpohuilise inintajtacolhua,
xi quintacaquili huan xi quintapojojpolhui.
Sinta moyolcuepase ten inintajtacolhua
pampa ti quintaijyohuiltijtoc,
36 xi quintacaquili ten nopona ilhuicac
campa tiitztoc, huan xi quintapojojpolhui
inintajtacol motequipanojcahua.
Quena, xi quintapojojpolhui moisraelita
masehualhua huan xi quinnextili nopa
cuali ojti cati monequi quitoquilise. Huan
xijtitani at ipan ni tali cati techmacatoc
timomasehualhua para toaxca.
- 37 “Xijtacaquili sinta ipan ni tali oncas mayanti
o se hueyi cocolisti cati tamahua campa

masehualme, o campa tocti, o sintia hualase miyac oculime o chapolime. Xijtacaquili sintia hualase inincualancaitacahua huan quiyahualose inialtepehua para quintehuise o sintia hualas ten hueli tamanti cati más temajmati o cati más quintaijyohuiltis momasehualhua.³⁸ Sinta inijuanti motatajtise pampa quimachilíaj nopa tajtacoli cati eltoc ipan iniyolo huan quitananase inimax campa ni tiopamit, xijtacaquili cati mitztajtanise.³⁹ Quena, xiquintacaquili hasta nopona ipan ilhuicac campa ta tiitztoc, huan xiquintapoipolhui. Xijxitahua huan xijmaca sesen ten inijuanti quej quinamiqui ica quenicatza nejnentoc pampa san ta tiquixmati iyolo sesen masehuali.⁴⁰ Huan quej nopa mitzimacasise nochi momasehualhua nochi tonali cati itztose ipan nopa tali cati ta tiquinmacatoc tohuejcapan tatahua.

- ⁴¹ “Nojquiya xiquintacaquili nopa masehualme cati amo israelitame cati hualase ten huejca pampa quinequise mitzhueyichihuase.⁴² Huan motatajtise ipan ni tiopamit pampa quicaquise ten ta TOTECO, ipan sequinoc talme huan quicaquise quenicatza techmanahuijtoc timomasehualhua huan para tahuel hueyi mochicahualis. Huan sintia hualahuij huan motatajtise nica,⁴³ xijtacaquili hasta nopona ilhuicac campa ta tiitztoc huan xijchihua nochi cati nopa seyoc tali ejquet mitztajtanijtoc moixpa para nochi altepeme ipan nochi talme ma

mitzixmatica huan ma mitzicnelica. Nochi ma mitztepanitaca huan ma nemica quej ta tijnequi quej moaltepe Israel quichihua. Huan noch i ma quimachilica ni tiopamit quihuica motoca huan ta cati tojuanti timitzhueyichihuaj nica ipan ni tiopamit cati nimitzchihuilijtoc.

- 44** “Huan quema momasehualhua yase tatehuitij ica inincualancaitacahua campa tiquinnahuatis huan motatajtise ica ta, huan quiixnamiquise ni altepet cati ta tijtapejpenijtoc huan ni tiopamit cati nijchijqui para ta,⁴⁵ xiquintacaquili hasta nopona ilhuicac campa ta tiitztoc huan xiquinpalehui.
- 46** “Huan quema momasehualhua tajtacolchihuase moixpa ta, pampa amo aqui cati amo tajtacolchihua, huan sint a tahuel ticualantos por inintajtacolhua, huan tiquintemactilis ica inincualancaitacahua para ma quinitzquica o ma quinilpica huan ma quinhuicaca ipan inintal, masque huejca o nechca,⁴⁷ sint a ipan nopa tali o altepet campa quinhuicatose momasehualhua moyolcuepase, huan motatajtise moixpa huan quijtose: ‘Titajtacolchijtoque huan tijchijtoque cati amo cuali’,⁴⁸ xiquintacaquili. Quena, sint a moyolcuepase moixpa ica noch i iniyolo huan ica noch i inintonal ipan inintal inincualancaitacahua campa quinhuicase ilpitoque, xiquintacaquili sint a motatajtise moixpa huan tachixtose iixmelac ni altepet

cati ta tijtapejpeni huan ni tiopamit cati na nijchijqui para ta ipan ni tali cati ta tiquinmacac inihuejcapan tatahua.

⁴⁹ Quena, xiquintacaquilis ten nopona ilhuicac campa tiitztoc, huan xijchihua cati mitztajtanise huan cati xitahuac.

⁵⁰ Xiquintapojojhui momasehualhua intintajtacolhua huan nochi cati quichijtose cati amo cuali ica ta. Huan xijchihua para ma quipiryaca hueyi iniyolo nopa masehualme cati quinhuicatoque ipan inintal huan ma quintasojtaca. ⁵¹ Pampa nopa israelitame nelia momasehualhua huan moaxcahua pampa ta tiquinquixti ipan tali Egipto campa taijyohuiyaya quej ipan se horno ten teposti.

⁵² “Huajca nochipa xitacacto para quema na, nimotequipanojca, nimotatajtia moixpa huan quema moisraelita masehualhua mitztajtaniáj se tenijqui. ¡Techtacaquili TOTECO, quema timotatajtiaj ica ta! ⁵³ Pampa huecjajquiya tiquilhui motequipanojca Moisés, quema tiquinquixti tohuejcapan tatahua ipan tali Egipto para ta, tiTOTECO Cati Tijpiya Nochi Tanahuatili techiyocataliyaya para ta ten nochis sequinoc masehualme.”

Salomón quitajtani Toteco ma quintiochihua israelitame

⁵⁴ Teipa Salomón moquetzqui, pampa motancuaquetztoya iixpa itaixpa TOTÉCO huan momatanantoya para ilhuicac quema motatajtiyaya.

⁵⁵ Huajca ama moquetzqui huan quintiochijqui nochi israelitame huan quijito chicahuac:

⁵⁶ “Ma tijhueyichihuaca TOTECO cati techmacatoc tasehuilisti tiisraelitame quej quijitojtoya para quichihuas. Amo techpolohua yon se tamanti cati quitencahuili itequipanoja Moisés.

⁵⁷ “Ma itzto tohuaya TOTECO Dios, quej yaya itztoya inihuaya tohuejcapan tatahua. Ma amo quema techtahuelcahua. ⁵⁸ Ma techy-oltilana campa ya para ma tijnequica tinejnemise ipan iojhui. Ma quichihua para ma tijnequica tijneltocase nochi itanahuatilhua huan nochi cati icamanal techmachtía huan cati quijtohua nochi nopa leyes cati quinmacac tohuejcapan tatahua. ⁵⁹ Huan nochi ni nocamanal cati ica nijtajtanijtoc, TOTECO toDios, ma elto iixpa tonaya huan tayohua para yaya ma techpalehui na huan nochi anisraelitame ica nochi cati techpolohua mojmosta. ⁶⁰ Quej nopa nochi masehualme ipan nochi taltipacti quimatisse para TOTECO yaya Dios huan amo aqui seyoc quej ya. ⁶¹ Pero monequi ma tijpiyaca toyolo cati senquisa cuali iixpa TOTECO toDios. Huan monequi tinejnemise ipan itanahuatilhua huan tijchijtinemise cati ya quijito quej ama ni tonali anquichihuaj.”

*Quiiyocatali tiopamit para TOTECO
(2 Cr. 7:4-10)*

⁶² Huajca Tanahuatijquet Salomón huan nochi israelitame quimacaque tacajcahualisti TOTECO.

⁶³ Huan Salomón quitencahuili TOTECO 22 mil

torojme quej se tacajcahualisti para ma onca tayoltalili ica ya. Huan quimacac 120 mil pilborrego-jtzitz.

Huan quej nopa, nopa tanahuatijquet huan nochí israelitame quiyyocatalijque nopa tiopamit para TOTECO. ⁶⁴ Ipan nopa tonali nojquiya quiyyocatali para ya nopa tali tatajco ipan nopa calixpamit cati eltoc iixmelac nopa tiopamit. Huan nopona quitencajqui tacajcahualisti tatatili, tacajcahualisti ten harina huan nopa tachiyajcayot ten nopa tacajcahualisti para tayoltalili ica Toteco pampa nopa taixpamit ten bronce cati eltoya iixpa TOTECO eliyaya pisiltzi para nochí nopa tacajcahualisti. ⁶⁵ Huan teipa quema ajsic nopa tonali, Salomón quichijqui nopa Ilhuit ten Pilxajcaltzitz iixpa TOTECO Dios para chicome tonati. Itztoyaj nopona tahuel miyac israelitame cati mosentilijtoyaj ten se lado tali Israel hasta seyoc; ten campa calaquij ipan Hamat ica norte hasta nopa atenti ten Egipto. Huan nochí ilhuichijque para catorce tonati; chicome tonati para quiyyocatalijque nopa tiopamit huan seyoc chicome tonati para nopa ilhuit quema quichijque pilxajcaltzitz. ⁶⁶ Huan quema tanqui ilhuichihuaj, Salomón quinnahuatijtejqui nochí nopa israelitame. Huan inijuanti yajque ininchajchaj ica paquilsti. Huan quitascamatilijtiyajque TOTECO por nopa Tanahuatijquet Salomón huan por nochí cati cuali TOTECO quichijtoya ica itequipanojca David huan nochí israelitame.

*Toteco monexti iixpa Salomón
(2 Cr. 7:11-22)*

¹ “Huajca Salomón tanqui quichihua nopa hueyi tiopamit para TOTECO huan tanqui quichihua nopa seyoc cali cati ipan itztos huan tequitis huan para tanahuatiani cati quiselise inintequi. Huan tanqui quichihua nochí sequinoc tamanti cati quinequiyaya quichihuas. ² Huan teipa TOTECO sempa monexti iixpa Salomón quej monextijtoya achtohui nepa ipan tepet Gabaón. ³ Huan TOTECO quilhui:

“Na nijcactoc monetatajtilis huan nochí cati tech-tajtanijtoc. Na niquipiyocatalijtoc para elis tatzejzeloltic ni cali cati tijchijtoc cati qui-huicas notoca para nochipa. Nochipa nij-tachiliitos mojmosta huan nijmocuitahuis.

⁴ “Huan ta sintia tinemis noixpa quej nenqui motata David, huan tijchihuas cati xitahuac huan cati cuali ica nochí moyolo, tijchihuas nochí cati nimitznahuatía, huan tijnel-tocas nochí notanahuatilhua, ⁵ na nijchi-huas para tijpiyas se familia ten tanahuatiani cati tacajtiyase ipan moteipa ixhui-hua. Huan se moixhui elis tanahuatijquet ipan israelitame para nochipa san quej niquilhui motata David. Niquilhui para se ten iixhuihua elis tanahuatijquet para nochipa ipan israelita masehualme.

⁶ “Pero sintia ta o moconehua antechcahuase, o amo anquichihuase notanahuatilhua huan nocamanal cati nimechmacatoc, o sintia amojuanti anquinhueyichihuase teteyome huan anquinítase quej dios, ⁷ huajca

na niquinquixtis nochí israelitame cati itztoque ipan ni tali cati niquinmactilijtoc. Huan ni tiopamit cati niquiyocatalijtoc para na, nijtahuisos huan ayecmo nijchihuilis cuenta. Huan ni tali Israel elis se lugar cati masehualme quisosolose. Huan quihuetzquilise nochí altepeme.

⁸ Huan quema sosolihuis ni tiopamit huan quicajtose san tet montonijtoc, nochí masehualme cati panose nica quiitase huan quihuetzquilise. Huan motatzintoquilise para ten quej nopa niamotECO nijchijqui ica ni tali Israel huan ica ni tiopamit.

⁹ “Huan sequinoc quinnanquilise para quej nopa elqui pampa nopa israelitame quitahuelcajque ininTECO Dios cati quinquixti inihuejcapan tatahua ipan tali Egipto huan pejque quinhueyichihuaj taixcopincayome cati quinitayayaj quej dioses. Yeca ininTECO quichijqui ma quinajsi ni tamanti cati amo cuali.”

*Ichicahualis Salomón moixmatqui campa hueli
(2 Cr 8:1-18)*

¹⁰ Huan tanqui nopa 20 xihuit cati monequiyaya para Salomón ma quisencahua nopa ome calme. Quichijqui nopa tiopamit para TOTECO huan se caltanahuatili para nopa tanahuatijquet ma ipan itztos huan ipan tequitis. ¹¹ Huan Tanahuatijquet Salomón quimacac Hiram, nopa tanahuatijquet ten tali Tiro, 20 altepeme ipan tali Galilea pampa yaya quimacatoya nochí cuame ten tiocuahuit

huan ten ciprés huan nochí oro cati quinequiyaya para nopa calme. ¹² Pero quema Hiram yajqui quitachilito nopa altepeme cati quimacatoya Salomón, amo quipacti. ¹³ Huan quijito: “¿Taya ni altepeme cati techmacatoc, noicni?” ¡Amo teno ipati! Huajca quitocaxti nopa tali Kabul. (Cabul quinequi quijitos Amo Teno Ipati.) Huan hasta ama quej nopa itoca. ¹⁴ Huan Hiram quititanilijtoya nopa Tanahuatijquet Salomón miyac oro. Ietica nopa oro eliyaya quej 3 mil 960 kilos.

¹⁵ Huan Salomón quinchihualli miyac masehualme ma quichihuaca comun tequit para quichihuase nopa tiopamit para TOTÉCO huan para quichihuase nopa caltanahuatili huan ichaj. Nojquiya quichijque cati itoca Milo ya ni elqui seyoc tepamit para quitaquechis nopa tepamit nechca ichaj. Huan quitamilti nopa tepamit cati monequiyaya para quiyahualos Jerusalén huan quinchijchijqui nopa altepeme ten Hazor, Meguido huan Gezer. ¹⁶ Nopa Faraón cati eliyaya tanahuatijquet ipan tali Egipto quitantoya altepet Gezer. Huan teipa quitati nopa altepet huan quinmicti nochí nopa cananeos cati itztoyaj nopona. Huan quimacac quej se nemacti nopa iichpoca quema mochijqui isihua Salomón. ¹⁷ Huajca Salomón sempa quicualchijchijqui altepet Gezer. Huan nojquiya quicualchijchijqui altepet Bet Horón cati mocahua ica tatzinta. ¹⁸ Nojquiya quicualchijchijqui altepet Baalat huan Tamar cati eltoc ipan nopa huactoc tali ipan tali Judá. ¹⁹ Nojquiya Salomón quincualchijchijqui

nochi altepeme campa quiajocuiyaya tacualisti. Nojquiya quincualchijchijqui nopa altepeme campa quiajocuiyaya itepos carrojhua huan icahuayojhua. Nochi cati quinequiyaya quichihuas ipan ten hueli pilaltepetzitzit nechca altepet Jerusalén, o ipan nopa cuatitamit cati itoca Líbano campa hueli ipan nopa talme cati eltoya imaco, yaya quichijqui. ²⁰ Noja itztoyaj sequij masehualme ipan ital Salomón cati amo israelitame. Itztoyaj nopa amorreos, heteos, ferezeos, heveos huan jebuseos. ²¹ Inijuanti eliyayaj iniixhuihua nopa masehualme cati israelitame amo huelque quintzontamiltíaj. Huajca Salomón quinchihualti para ma quichihuaca tequit cati etic huan quej nopa noja quichihuaj hasta ama. ²² Pero Salomón amo quichihualti yon se israelita para ma tequiti chicahuac. Quinchijqui israelitame ma elica soldados, huejhueyi tequichihuani, tanahuatiani, tayacanani ten soldados huan quinchijqui ma yaca ipan itepos carrojhua huan ma elica cati nejnemij ipan cahuayoyme. ²³ Nojquiya Salomón quintali 550 israelitame cati quitachiliyayaj nochí nopa tamanti cati quichijchihuayayaj huan nopa miyac tacame cati tequitiyayaj ipan sesen lugar.

²⁴ Teipa Salomón quihualicac isihua cati elqui iichpoca Faraón ten campa itoca Ialtepe David hasta ipan nopa yancuic cali para tanahuatiani tatajco Jerusalén. Teipa quichijchijqui nochí cati itoca Milo cati quitaquechiyaya nopa cali.

²⁵ Eyi huelta ipan se xihuit, Salomón quimacayaya tacajcahualisti TOTECO quej monejqui ipan nopa taixpamit cati quichijtoya

para TOTECO. Nojquiya quitencajqui tacajcahualisti tatatili huan tacajcahualisti para ma onca tayoltalili ica TOTECO huan para quitascamatis. Nojquiya quitati copali iixpa TOTECO. Quej nopa quichijqui quema ya quisencajtoya nopa tiopamit.

²⁶ Teipa Tanahuatijquet Salomón nojquiya quichijchijqui huejhueyi cuaacalme nepa ipan altepet Ezión Geber cati eltoc inechca nopa pilaltepetzi Elot cati eltoc iteno nopa Chichiltic Hueyi At ipan tali Edom. ²⁷ Hiram quintitanqui tacame cati tahuel quimatiq quinejnemiltíaj cuaacalme para quinejnemiltise icuaacalhua Salomón ipan hueyi at inihuaya itequipanojcahua Salomón. ²⁸ Nejnenque huan ajsitej ipan tali Ofir campa quicuique nechca 14 toneladas ten oro, huan quihuiquilijque Tanahuatijquet Salomón.

10

*Se sihua tanahuatijquet quipaxaloco Salomón
(2 Cr. 9:1-12)*

¹ Nopa sihua tanahuatijquet ten tali Sabá quicajqui para nochí masehualme campa hueli camanaltiyayaj ten Tanahuatijquet Salomón pampa TOTECO tahuel quitiochijtoya ica miyac talnamiquilisti. Huajca yajqui ipan altepet Jerusalén para quiyejyecos italnamiquilis ica miyac tatzintoquili huan tamanti cati ohui. ² Huajca nopa sihua tanahuatijquet ajscico ipan altepet Jerusalén ica miyac itapalehuijcahua huan tahuel miyac camellos cati quimamajtihuayayaj miyac tamanti taajhuiyacayot huan tahuel miyac

oro huan piltetzitzi cati pajpatiyo. Huan quema nopa sihuat quiitac Salomón, quicamanalhui ten nochí cati moilhuijtoya ipan iyolo para quitatzintoquilis.

³ Huan Salomón quinanquili nochí cati quitatzintoquili. Huan ica nochí cati quitatzintoquili, amo teno elqui ohui para Salomón. ⁴ Huan nopa sihua tanahuatijquet ten tali Sabá quiitac nochí italnamiquilis Salomón, huan nopa hueyi cali cati quichijtoya para ipan itztos. ⁵ Nojquiya quiitac nochí nopa tacualisti cati eltoya ipan imesa huan nopa calme cati ipan itztoyaj itapalehuijcahua huan quenicatza inijuanti quimatiyayaj tequitij nelcuali huan iniyoyo nelyejyectzitzi cati moquentiyayaj. Quiitac nochí cati quitequipano huayayaj Salomón nojquiya tahuel yejyectzitzi iniyoyo. Huan quiitac nopa tacajcahualisti cati Salomón temacayaya ipan Ichaj TOTECO huan tahuel san quitetzaitac. ⁶ Huan nopa sihua tanahuatijquet quilhui Salomón: “Nelía melahuac cati nijcajqui ipan notal ten nochí cati tijchijtoc huan ten nochí motalnamiquilis. ⁷ Pero amo nijneltocayaya hasta quema nihualajqui. Huan ama, quena, nijneltoca pampa niquitztoc ica noixteyol. Nelía tahuel hueyi motalnamiquilis huan nochí nopa ricojyot cati tijpiya, huan cati nijcactoya eltoc nelquentzi ica cati niquitztoc. ⁸ Momasehualhua huan motequipanojcahua nochipa yolpactoque pampa itztoque nochipa moixpa huan quicaquij motalnamijcayo. ⁹ Ma tijhueyichihuaca TOTECO Dios cati mitztapejpeni huan mitztalijtoc para titanahuatis ipan tali Israel. TOTECO

tahuel quinicnelía israelitame huan para nochipa quinicnelis huan yaya mitztalijtoc tiinintanahuatijca para xitetajtolsencahua xitahuac huan para ma mochihua cati melahuac nica.”

¹⁰ Huajca nopa sihua tanahuatijquet ten tali Sabá quimacac Tanahuatijquet Salomón 3 mil 960 kilos ten oro, huan miyac taajhuiyacayot huan piltetzitzi cati tahuel patiyo. Amo quema ajsitoya imimaco israelitame miyac taajhuiyacayot quej nopa nemacti cati nopa sihua tanahuatijquet ten tali Sabá, quimacac Tanahuatijquet Salomón. ¹¹ Huan nopa huejhueyi cuaacalme cati quinemiltiyaya Tanahuatijquet Hiram quihualiquilijque Salomón miyac oro ten tali Ofir. Huan nojquiya qui-hualicaque miyac cuame cati itoca sándalo huan piltetzitzi cati yejyectzitzi. ¹² Ica nopa cuahuit ten sándalo Salomón quichijqui taquetzalme para nopa tiopamit huan para nopa sequinoc calme cati ipan itztos. Nojquiya quichijchijqui arpas huan salterios para nochí cati quimatiyayaj tat-zotzonaj. Nopa imiyaca cuahuit sándalo amo quema ajsitoya ipan Israel quej nopa. ¹³ Huan Tanahuatijquet Salomón quimacac nopa sihua tanahuatijquet ten tali Sabá nochí ten ya quine-jqui huan ten quitajtani iyoca ten cati ya quimacatoya quej se nemacti. Huan teipa nopa sihua tanahuatijquet tacuepili ipan itál inihuaya ite-quipanojcahua.

*Itomi huan iricojyo Salomón
(2 Cr. 9:13-24)*

¹⁴ Nopa oro cati quiseliyaya Salomón sesen xi-huit eliyaya 22 mil kilos. ¹⁵ Huan amo quipo-huayaya cati quiixtahuayayaj piso nopa tana-macani, huan cati nochí nopa huejhueyi tanahu-atiani ten tali Arabia taxtahuayayaj para panose ipan ital huan cati tequichihuani ten nochí ital-hua quiseliyayaj. ¹⁶ Nopa tanahuatijquet Salomón tanahuati ma quichihuaca 200 tepos yolixtzajcayome cati huejhueyi quej cati quitequihiúaj soldados para momanahuise. Huan quinilhui ma quichihuaca ica oro cati quitejtetzontoque. Huan ietica sesen tepos yolixtzajcayot eliyaya eyi kilos ten senquisa oro.

¹⁷ Huan tanahuati ma quichihuaca 300 yolixtzajcayome cati amo más huejhueyi nojquiya ica oro tatejtzonali huan sesen tepos yolixtzajcayot quipixqui ietica nechca ome kilos ten senquisa oro. Huan quintali nopa yolixtzajcayome ipan nopa hueyi cali cati itocayaya “Cuatitamit ten Líbano”. ¹⁸ Nojquiya Salomón tanahuati ma quichihuaca se tapechti huejcapa ihuaya se isiya huan ica leones huan nochí elqui senquisa tachijchihuali ica marfil. Huan tanahuati ma quiixaltica ica oro cati más cuali. ¹⁹ Huan para ajsis ipan nopa siyaj cati huejcapa quipiyayaya chicuase escalones. Huan icuitapa isiya eliyaya quentzi tolontic. Huan isiya quipixqui campa quitalisquía imax ipan sesen lado. Huan inechca imax nopa siyaj ica inejmat huan ica iarraves quichijque se tecuani cati itoca león cati ijcatoc. ²⁰ Huan nojquiya ipan nopa chicuase escalones quipixqui 12 leones cati ijcatoque, chicuase ipan sesen lado. Se león ipan sesen lado sese escalones. Huan yon

se siyaj cati ipan mosehuía se tanahuatijquet ipan ni taltipacti amo elqui nelyejectzi quej nopa cati quichijtoya Salomón. ²¹ Huan nochí nopa vasos ten ipan quiyaya se tenijqui nopa Tanahuatijquet Salomón eliyaya senquisa oro. Huan cati quitequihuiyayaj ipan nopa cali cati itocayaya “Cuati-tamit ten Líbano” nochí eliyaya senquisa oro. Amo teno ten plata quipixqui, pampa quema Salomón itztoya, nopa plata quiitayayaj quej amo teno ipati eliyaya. ²² Pampa ipan hueyi at Tanahuatijquet Salomón quipiyayaya huejhueyi cuaacalme cati nemiyayaj ica Hiram icuaacalhua ten Tarsis para tanamacase huan tacohuase. Huan sesen eyi xihuit ajsiyayaj huan quihualicayayaj oro, plata, marfil, monos huan pavos reales.

²³ Huajca quej ni Salomón quipixqui más talnamiquili huan más ricojyot que nochí sequinoc tanahuatiani ipan taltipacti. ²⁴ Huan nochí masehualme ten campa hueli ipan taltipacti quinequiyayaj quiitase Salomón huan quitacaquilise italnamiquilis cati Toteco Dios quimacatoya. ²⁵ Huan sesen xihuit nopa masehualme cati quipaxalohuayayaj quihuiquiliyayaj miyac nemacti. Quihualicaque miyac tamanti ten oro, plata, yoyomit cati yejectzitz, teposti para tatehuilisti, taajhuiyacayot, cahuayoyme huan mulas.

*Salomón quichijqui tanamaquisti ica carrojme
huan cahuayoyme*

(2 Cr. 1:14-17; 9:25-28)

²⁶ Huan Salomón quinsentili miyac tatehuijca carrojme huan cahuayoyme. Quipixqui mil 400

tatehuijca carrojme huan 12 mil cahuayojme. Huan quintali ipan altepeme para tatehuijca carrojme huan sequij quintali nechca ya ipan altepet Jerusalén. ²⁷ Huan nopa Tanahuatijquet Salomón quichijqui ma onca miyac plata quej elisquía san ten hueli teme ipan altepet Jerusalén. Huan cuahuit ten tiocuame cati patiyo quipixqui campa hueli ipan tali Judá hasta elqui quej amo teno ininpati quej nopa cuame sicómoro cati amo aqui huelis quitequiñuis pampa amo xitahuac. ²⁸ Nojquiya Salomón quincojqui cahuayojme ten tali Egipto huan ten tali Cilicia huan quiniscalti. Nopa tacohuani cati quitequipanohuayayaj Salomón yajque tali Cilicia para quincohuase quej ininpati eliyayaj. ²⁹ Ipan nopa tonali hueliyaya quincohuase tebos carrojme ten tali Egipto ica nechca 7 kilos ten plata tomi. Huan se cahuayo ipatiyaya nechca ome kilos ten plata tomi. Huan ni carrojme huan cahuayojme Salomón quinna-maquiltiyaya nochí nopa tanahuatiani ten nopa heteos huan nopa Siria ehuani.

11

Salomón quicajqui iojhui Toteco

- 1 Tanahuatijquet Salomón quinicneliyaya miyac sihuame cati campa hueli ehuani. Iyoca ten iichpoca Faraón, nojquiya mocuili sihuame cati ehuayayaj tali Moab, Amón, Edom, Sidón huan nojquiya mocuili sequij heteo sihuame.
- 2 Pero TOTECO quinilhuijtoya nopa israelitame ma amo motahuicaltica inihuaya sihuame ten seyoc tali. Quinilhui para nopa sihuame

quinchihuase ma quintoquilica ininteteyohua. Pero Salomón quinicneli huan motemacac para mosihuajtis inihuaya masque quimatiyaya cati quijtojtoya TOTECO. ³ Quinpixqui 700 sihuame cati inelsihuajhua huan 300 sihuame san itztoyaj ipan ichaj. Huan quej TOTECO quijito, inijuanti quiyolcuetque para ma quinhueyichihua ininteteyohua. ⁴ Huajca quema Salomón ya huehuejtxtoya, isihuajhua quichijque ma quicajtehua iojhui TOTECO Dios huan ma quintoquili cati nopa isihuajhua inindioses. Huan Salomón ayecmo motemachi san ipan TOTECO Dios quej quichijtoya itata David.

⁵ Salomón quihueyichijqui nopa fiero taixcopincayot Astoret cati quitequipanohuayayaj nopa Sidón ehuaní. Huan quihueyichijqui Moloc nopa tiotzi cati más fiero cati quitequipanohuayayaj nopa amonita masehualme. ⁶ Huan quej nopa, Salomón quichijqui cati amo cuali iixpa TOTECO. Ayecmo quinejqui senquisa quitoquilis TOTECO quej quichijtoya itata, David.

⁷ Ipan nopa tepet Olivos campa hualquisa tonati, Salomón quichijqui se pilcaltzi para nopa taixcopincayot cati itoca Quemos cati Toteco Dios tahuel quicualancaita. Quemos eliyaya se taixcopincayot cati quihueyichihuayayaj moabita masehualme. Huan nojquiya ipan nopa tepet Salomón quichijqui se pilcaltzi para nopa taixcopincayot cati itoca Moloc cati Toteco Dios tahuel quicualancaita. Moloc eliyaya se teteyot cati quihueyichihuayayaj nopa amonitame. ⁸ Huan nojquiya Salomón quichijqui taixpame huan pilcaltzitzi campa nochí isihuajhua cati

seyoc tali ehuani hueliyaya quitatise copali huan
quitencahuase tacajcahualisti ica ininteteyohua.

Icualancayo huan itatzacuiltylis Toteco

⁹ Huan TOTECO tahuel cualanqui ica Salomón pampa ipan iyolo quitahuelcajitoya TOTECO to-Dios tiisraelitame cati moixnextijtoya iixpa ome huelta. ¹⁰ Huan quema monexti iixpa, quiilhui Salomón ma amo quinhueyichihua teteyome. Pero Salomón amo quitacaquili cati TOTECO quinahuatijtoya. ¹¹ Huajca TOTECO quiilhui Salomón: “Pampa quej ni motalnamiquilis huan amo tijchijqui cati nimitzilhuijtoc xijchihua, huajca na nimitzcuilis motequiticayo para titanahuatis huan njimacas se cati mitztequipanohua. ¹² Pero amo nijchihuas quema noja tiitztoc san pampa niquicnelía David, motata. Pero, quena, nijquixtilis mocone. ¹³ Pero amo nijquixtilis nochí itequiticayo. Na nijcahuilis mocone ma eli tanahuatijquet ipan se hueyi familia san pampa niquicnelía motata David huan niquicnelía ní altepet Jerusalén cati na nijtapejpenijtoc para elis nopa altepet cati qui-huicas notoca.”

Salomón huan icualancaitacahua

¹⁴ Huajca TOTECO quichijqui ma motanana Hadad cati elqui icono nopa tanahuatijquet ten tali Edom. Huan Hadad mochijqui icualancaitaca Salomón. ¹⁵ Quipiya miyac xihuit David yajqui ipan tali Edom ihuaya Joab, nopa tayacanquet ten isoldados quema yajque para quintalpachotij sequij israelita soldados cati mictoyaj ipan tatehuilisti. Huan quema noja itztoyaj nepa,

quinmictijque nechca nochí tacame huan oquich-pilme ten tali Edom. ¹⁶ Huan Joab mocajqui no-pona chicuase metzti inihuaya iisraelita soldados huan quinmictijyahuiyayaj nopa tacame ipan Edom. ¹⁷ Pero Hadad cati noja eliyaya se pilo-quichpiltzi cholojtoya inihuaya sequijitequipano-jahua itata. Huan inijuanti quihuicaque ipan tali Egipto. ¹⁸ Teipa quistejque ipan altepet Madián huan ajsitoj ipan altepet Parán campa quinpan-tijke sequinoc tacame cati nopona ehuani huan mosentilijque inihuaya. Teipa ajsitoj ipan tali Egipto huan moixnextitoj iixpa Tanahuatijquet Faraón huan yaya quinmacac se cali. Nojquiya quinmacac tacualisti huan tali.

¹⁹ Huan Faraón huan Hadad mohuamppojchi-jque, huan Faraón quimacac se ihuejpol para elis isihua. Ihuejpol eliyaya iicni nopa sihua tanahuatijquet Tahpenes cati eliyaya isihua Faraón. ²⁰ Teipa iicni Tahpenes quimacac Hadad se icone cati quitocaxti Genubat. Huan nopa sihua tanahuatijquet Tahpenes quiiscalti ipan ichaj Faraón ihuaya ya iconehua. ²¹ Pero quema ajsic camanali ipan tali Egipto para ya mictoya David huan nojquiya ya mictoya Joab nopa tayacanquet ten isol-dados, Hadad quimatqui huan yajqui quiilhuito Faraón:

—Techcahua nitacuepilis ipan notal.

²² Huan Faraón quinanquili:

—¿Para ten tijnequi titacuepilis ipan motal?

¿Taya mitzpolohua nica cati tijpantis nepa?

Huajca Hadad quinanquili:

—¡Amo! Amo teno techpolohua nica, pero mon-equi techcahuas ma niya.

²³ Huan Toteco Dios nojquiya quitananqui seyoc tacat para ma mochihua icualancaitaca Salomón huan itoca eliyaya Rezón. Rezón eliyaya icona Eliada cati cholojtoya imaco iteco, nopa Tanahuatijquet Hadad Ezer ipan tali Soba. ²⁴ Huan Rezón quinsentili miyac tacame cati mosisiniáj huan mochijqui inintayacanca. Huejcajquiya quema David quintanqui Soba ehuani, Rezón huan ihuampoyohua yajque ipan altepet Damasco huan nopona yaya motananqui huan mochijqui tanahuatijquet. ²⁵ Rezón tanahuati nopona ipan tali Siria huan quimacac tequipacholi Salomón quej nojquiya quichihuayaya Hadad pampa Rezón nelía mochijqui inincualancaitaca israelitame hasta mijqui Tanahuatijquet Salomón.

²⁶ Seyoc cati mosisini ica Salomón elqui Jeroboam, icona Nabat. Jeroboam tacatqui ipan nopa hueyi familia Efraín ipan altepet Sereda huan inana elqui se cahuali itoca Zerua. Jeroboam eliyaya se itequipanojca Salomón pero teipa pejqui mosisiniá huan quiixpano. ²⁷ Nimitzilhuis quenicatza Jeroboam mochijqui icualancaitaca Salomón. Ipan nopa tonali quema Salomón quichihuayaya cati itoca Milo ipan Jerusalén huan quitaltemiyayaj imajcajya nopa ome tepame cati quiyahualohuayaya nopa altepet ipan nopa colonia cati itoca Ialtepe David, Jeroboam nopona tequitiyaya. ²⁸ Huan Jeroboam eliyaya se tacat ica miyac yajatili huan tahuel tequitic chicahuac. Huan quiitac Salomón para yaya se telpocat cati nelía tequití cuali, huajca quitequimacac ma quinyacana nochí tacame cati

eliyayaj iteipa ixhuihua José ten nopa familias ipan tali Efraín huan Manasés cati quichihuayabaj comun tequit nopona.

²⁹ Huan se tonali quema Jeroboam quisayaya ten altepet Jerusalén, quinamijqui ipan ojti nopa tajtolpanextijquet Ahías cati ehua Silo. Huan Ahías mohuijcontoya ica se yancuic iyoyo huehueyac huan nopa ome itztoyaj iniselti ipan ojti. ³⁰ Huan Ahías moquixtili nopa iyoyo yancuic huan quitzayanqui huan quichijqui 12 tacotonti. ³¹ Huan quiilhui Jeroboam: “Xijcui majtacti tacotonti para ta pampa TOTECO Dios, yaya cati toDios tiisraelitame, quipiya ni camanali para ta. Quej ni quijtohua TOTECO Dios: ‘Nijquixtilis ihueyi tequiticayo Salomón huan nimitzmacas ta majtacti huejhueyi familias. ³² Pero nijcahuilis san se hueyi familia para icono Salomón ma quinahuati pampa niquicnelía notequipanojca David huan nopa altepet Jerusalén cati njitapejpenijtoc ten nochí altepeme ipan tali Israel. ³³ Nijquixtilis itequiticayo Salomón pampa yaya techtahuelcajtoc huan quihueyichijtoc nopa taixcopincayot Astoret cati inindios nopa Sidón ehuani. Huan quihueyichijtoc nopa taixcopincayot Quemos cati quitequipanohuaj nopa tali Moab ehuani. Huan quihueyichijtoc Moloc inintaixcopincayot nopa amonitame. Nijquixtilis itequiticayo pampa Salomón amo nejnentoc ipan noojhui. Amo quichijtoc cati xitahuac noixpa. Amo quineltocatoc notanahuatilhua huan notamachtilhua quej quichijqui David, itata. ³⁴ Pero amo nijquixtilis itequiticayo Salomón amantzi quema noja yoltoc san

pampa niquicnelía notequipanojca David cati ni-jtapejpeni. David quichijqui nochí notanahuatil-hua huan nochí catí niquilhui.³⁵ Pero nijquixtilis ihueyi tequiticayo itelpoca Salomón quema yaya pehuas tanahuatis huan nimitzmacas ta. Quena, nimitzmacas nopa majtacti huejhueyi familias para tiquinnahuatis.³⁶ Huan san se hueyi familia ten israelitame nijcahuilis imaco itelpoca Salomón para quinahuatis. Yeca para nochipa notequipanojca David quipiyas se iixhui para tanahuatis ipan altepet Jerusalén, nopa altepet cati njtapejpeni para quihuicas notoca.³⁷ Huan ta nimitzehuis ipan tequicali campa tali Israel ica norte. Huan nimitzmacas tequiticayot para titanahuatis ipan nochí cati mitzyolpactis para xijnahuati.

³⁸ “ ‘Huan sintá tijtacaquilis nochí cati nimitzilhuis huan tinemis ipan noojhui huan tijchihuas cati xitahuac noixpa, huan tijneltocas nochí notanahuatilhua quej quichijqui David, notequipanojca, huajca na niitztos mohuaya. Huan nijchihuas para se moixhui nochipa quipiyas tequiticayot quej tanahuatijquet quej nijchijqui ica David. Huan nimitzmacas tali Israel.’³⁹ Huan na niquintatzacuiltis iixhuihua David por nochí cati quichijtoc Salomón, pero nopa tatzacuilti amo huejcahuas para nochipa.’” Quej nopa, Ahías, nopa tajtolpanextijquet, quimacac Jeroboam nopa camanali ten Toteco.

⁴⁰ Huan por cati quiilhui, Salomón quinequiyaya quimictis Jeroboam, pero Jeroboam cholo huan yajqui ipan tali Egipto

campa itztoya Tanahuatijquet Sisac. Huan nopona mocajqui hasta quema mijqui Salomón.

Imiquilis Salomón

(2 Cr. 9:29-31)

⁴¹ Nopa sequinoc tamanti cati quichijtoya Salomón huan quenicatza nelhueyi italnamiquilis, nochi eltoc ijcuilijtoc ipan nopa amatapohuali cati itoca Cati Quichijqui Salomón. ⁴² Salomón tanahuati ipan altepet Jerusalén huan quipixqui tequiticayot ipan nochi israelitame para 40 xihuit. ⁴³ Huan quema Salomón mijqui, quitalpachojque ipan Jerusalén ipan nopa colonia cati itoca Ialtepe David. Teipa pejqui tanahuatía iconē cati itoca Roboam quej tanahuatijquet.

12

Roboam pejqui tanahuatía

(2 Cr. 10:1-11:4)

¹ Roboam yajqui ipan altepet Siquem campa nochi israelitame mosentilijtoyaj para quitequimacase ma eli inintanahuatijca. ² Pero Jeroboam, iconē Nabat, noja itztoya ipan tali Egipto quema quicajqui para mijqui nopa tanahuatijquet pampa mochololtijtoya ten Salomón. ³ Huan nopa tayacanani ten tali Israel ica norte tatitanque ma quinotzatij Jeroboam huan yaya hualajqui. Teipa nochi inijuanti sentic yajque quicamanalhuitoj Roboam huan quiilhuijque:

⁴ —Motata, Salomón, techchijqui ma titequiteca tahuel chicahuac. Huajca timitztajtaníaj ama techquixtili se quentzi nopa tequit cati más ohui.

Huan techquixtili se quentzi nopa miyac impuestos cati monequi timitztaxtahuise huan timitztequipanose ica cuali.

⁵ Huan Roboam quinnanquili:

—Ama xiaca amochajchaj huan techcahuilica ma nimoyolilhuis quentzi taya nijchihuas. Teipa ximocuepaca ica eyi tonati huan nimechilhuis.

Huan nopa tacame yajque. ⁶ Huajca nopa tanahuatijquet Roboam quintajtani nopa huehue tacame cati quiconsejomacayayaj itata quema ya noja itztoya. Huan quintatzintoquili:

—¿Quenicatza antechconsejomacaj para ma niquinilhui nopa tacame?

⁷ Huan nopa huehue tacame quiilhuijque:

—Sinta ama tijchihuas cati ni tacame mitzilhuijque huan tiquinnanquilis ica cuali camanali, injuanti mitztequipanose para nochipa.

⁸ Pero Roboam amo quitacaquili cati quiilhuijque nopa huehue tacame. Yaya yajqui quintajtanito consejo nopa telpoca tacame cati inihuaya moscalti huan cati ama quipalehuiyayaj. ⁹ Huan quinilhui:

—¿Quenicatza antechconsejomacaj para ma niquinanquili nopa tacame cati quinequij ma niquinquixtili achi inintaohuijcyo cati notata quinmacac?

¹⁰ Nopa telpocame cati inihuaya moscaltijtoya quinanquiljque:

—Xiquinilhui nopa tacame sintia motata quichijqui ma tequitica chicahuac, ta tiquinchihuas ma tequitica más que ya. Xiquinilhui setzi momacpil quipiyas más chicahualisti que nochí imax motata. ¹¹ Huan sintia ohui cati motata quinmacac ma

quichihuaca, noja más ohui elis cati tiquinmacas ma quichihuaca. Huan sintia yaya quinhuitejqui ica se cuarta ten cuetaxti, ta tiquinhuitequis ica nopa huehueyac cuarta cati itoca ‘colome’ pampa iyecapa quipiyas piltepostzitzit cati tajtatequi. Quej nopa xiquinanquili.

¹² Huajca ica eyi tonati hualajqui Jeroboam ica nochí israelitame moixnexticoj iixpa Roboam, quej nopa tanahuatijquet quinilhuijtoya. ¹³ Huan Tanahuatijquet Roboam quinnanquili chicahuac. Amo quitacaquili inincamanal nopa huehue tacame cati quinequiyaya j quitalnamictise. ¹⁴ Quinnanquili ica inincamanal nopa telpoca tacame. Quinilhui:

—Anquijtohuaj para notata amechmacac tequit cati etic, huajca na nimechmacas tequit cati noja más etic. Anquijtohuaj para notata amechhuitequiyaya ica cuarta ten cuetaxti, pero na nimechhuitequis ica se cuarta cati iyecapa quipiyas piltepostzitzit.

¹⁵ Huajca nopa tanahuatijquet amo quichijqui cati quinequiyaya nopa israelitame. Quej ni elqui pampa TOTECO quej nopa quinequiyaya. Ica ya ni TOTÉCO quichihuayaya ma mochihua nochí cati quihilhuijtoya Jeroboam, icono Nabat, quema nopa tajtolpanextijquet Ahías, cati ehua ipan altepet Silo, quicamanalhui ipan ojti. ¹⁶ Quema nochí nopa israelitame quiitaque para Tanahuatijquet Roboam amo quitacaquili cati quitajtanijque, quijtojque: “Amo teno tijpiyaj tojuanti ica nopa mijcatzi David huan ica ni cati iixhui. Amo tijselise yon se achi tali nica ica ni Tanahuatijquet cati iteipa ixhui Isaí. Nochi tiisraelitame ma tiyaca

tochajchaj huan ma tijcahuaca ni tanahuatijquet. Ni iixhui David ma quinmocuitahui san ten ya ichaj ipan ya ital.”

Huajca ipan nopa hora nochí tali Israel ehuani yajque ininchajchaj. ¹⁷ Pero Roboam noja quipixqui tequiticayot ipan nopa israelitame catí ehuani ipan altepeme ten tali Judá. ¹⁸ Huajca Roboam quititanqui Adoram catí quiyacana nochí comun tequit para ma yahui nopena ipan norte campa itoca tali Israel para ma quinchihualtiti nopa masehualme ma quineltocaca itanahuatilhua, pero nopa israelitame nopena quimictijque ica tet. Huajca quema quimatqui Tanahuatijquet Roboam, moisihuili huan tejcoc ipan itatehujca carro huan cholojtejqui ten campa itztoya hasta altepet Jerusalén. ¹⁹ Huajca quej nopa moiyoquaquixtijque nopa tali Israel ehuani ten itequiticayo iixhui David huan quej nopa eltoc hasta ama.

²⁰ Huan quema nochí tali Israel ehuani quimatque para nelía mocuectoya Jeroboam ipan inintal, quitatitanijque ma huala. Huan yaya moixnexti iniixpa nochí Israel ehuani ipan nopa hueyi tasentilsti huan inijuanti quitequitalijque ma eli inintanahuatijca. Huan san nopa israelitame catí itztoyaj ipan altepeme ipan tali Judá mocajque ihuaya Tanahuatijquet Roboam catí eliyaya se iixhui David.

²¹ Huajca quema Roboam sempa ajsito ipan altepet Jerusalén, quinsentili nochí isoldados catí más quimatque tatehuíaj ten nopa hueyi familia Judá huan nopa hueyi familia Benjamín. Ica

nochi mochijque 180 mil soldados cati más tapejpenilme para ma yaca quintehuitij nopa sequinoc israelitame cati ehuani tali Israel ica norte para quinchihualtise ma sempa mocuepaca ipan itanahuatilis Roboam, icono Salomón. ²² Pero Toteco Dios quicamanalhui nopa tacat cati elqui se itajtolpanextija huan itoca Semaías. Quiilhui: ²³ “Xiquilhui, Roboam, icono Salomón, cati itztoc tanahuatijquet ipan tali Judá huan xiquinilhui nochí iniixhuihua Judá huan Benjamín huan nochí masehualme cati itztoque inihuaya ni camanali. ²⁴ Ya ni cati niininTECO niquinnahuatía: ‘Amo xiquintehuitij amo israelita icnihua. Xitacuepilica nochí ipan amochajchaj pampa quej nopa na nopaquilis.’ ”

Huan quema quicajque cati quinilhuijtoya TOTECO, mocuetque ininchajchaj quej quinnahuatijtoya.

Jeroboam motatajtía ica sequinoc teteyome

²⁵ Huajca Tanahuatijquet Jeroboam sempa quicualchijchijqui altepet Siquem cati eltoc ipan nopa cuatitamit ipan tali Efraín huan nopona yajqui para itztos. Teipa quisqui nepa huan yajqui para quisencahuato nopa altepet cati itoca Penuel. ²⁶ Huan Tanahuatijquet Jeroboam moyolilhui ipan iyolo: “Sinta na amo nijpiyas cuidado, nochí israelitame sempa quinequise mosejcotilise ica Roboam cati iixhui David. ²⁷ Pampa sintá ni masehualme yase ipan altepet Jerusalén para quitencahuase tacajcahualisti ipan itiopa TOTECO quej nochipa quichijtoque, moyolcuepase huan sempa mosejcotilise ica

Tanahuatijquet Roboam ten tali Judá. Teipa inijuanti techmictise huan sempa itztose ihuaya ya.”

²⁸ Huajca Tanahuatijquet Jeroboam quintatz-intoquili cati quipalehuiyaj taya quichihuas huan teipa quinchijqui ome pilhuacaxtzitzi ten oro huan quinilhui nochí Israel ehuani: “Ayecmo xiycaca ipan altepet Jerusalén para antahueyichi-huatij pampa nelía ohui. Nica anquinpixtoque amodioses para xiquinhueyichihiuaca. Inijuanti cati techquixtijque tiisraelitame ipan tali Egipto.”

²⁹ Huajca Tanahuatijquet Jeroboam quitali se pilhuacaxtzti ipan altepet Betel huan se ipan altepet Dan. ³⁰ Huan ya ni quinchijqui ma tajtacolchihuaca nopa masehualme pampa sequij israelitame yahuiyaj nepa altepet Betel huan sequinoc hasta altepet Dan para quihueyichihiuase Toteco Dios iniixpa nopa taixcopincayome ten pilhuacaxtzitzi. ³¹ Huan Jeroboam nojquiya quichijqui calme ipan huejcapantic tepeme. Huan quintequitali totajtzitzi nopona cati amo eliyayaj levitame. ³² Huan nojquiya Jeroboam quipehualti se ilhuit ipan Betel ipan 15 itequi nopa metzti chicueyi ipan toisraelita calendario*, quej cati Judá ehuani quichihuaj pero nopa ilhuit amo elqui quema quiijto tanahuatili para ilhuichihuase. Huan ipan nopa ilhuit nopona ipan Betel, Jeroboam iseltitzi quitencajqui tacajcahualisti ipan nopa taixpamit. Nojquiya ipan Betel quintequitali totajtzitzi para tequitise ipan nopa calme cati quisencajtoya ipan tepeme

* **12:32** 12:32 Ipan itamiya octubre o ipejya noviembre ipan tocalendario ten ama.

campa hueli. ³³ Huajca ipan 15 itequi nopa metzti chicueyi, se tonali cati yaya iseltitzi quiixquetzqui pampa yaya quiyolpacti, Jeroboam, quitencajqui tacajcahualisti ipan nopa taixpamit cati ya quichijchijtoya ipan Betel. Yaya quipehualti nopa ilhuit para nochí israelitame huan yaya iseltitzi tejcoc huan quitati copali ipan taixpamit.

13

Se tajtolpanextijquet quiajhuac Jeroboam

¹ Quema Tanahuatijquet Jeroboam moquetztoya nechca taixpamit huan quitatiyaya copali, ajisco ipan Betel se tajtolpanextijquet cati ehua tali Judá cati TOTECO quititantoya. ² Huan ica itequiticayo TOTECO nopa tajtolpanextijquet quijito chicahuac: “TOTECO quijtojtoc para teipa tacatis se pilconetzi cati elis se iteipan iixhui David huan itoca elis Josías. Huan yaya quinmictis nopa totajtzitzi cati tequitij ipan ni huejcapantique tepeme cati amo quej TOTECO quijtojtoc. Yaya quintatis nopa totajtzitzi cati nica quitatíaj copali. Quena, nica ipan ni taixpamit tatas iniomiyó.”

³ Huan ipan san se nopa tonali, nopa tajtolpanextijquet quinilhui taya tanextili oncas nimantzi para quimatise teipa nochí panos quej quijtojtoc. Quinilhui: “Ya ni se tanextili cati TOTECO quijtojtoc nimantzi mochihuas. Ni taixpamit tajco tapanis huan nopa cuajnexti cati eltoc ipani tepehuis talchi.”

⁴ Huan quema nopa tanahuatijquet quicajqui nopa camanali cati quijtojtuya nopa tajtolpanextijquet ten nopa taixpamit ipan Betel, cuanqui

huan momatananqui ten campa itztoya nechca taixpamit huan quimanexti nopa tacat huan quiijto: “¡Xiquitzquica!” Pero nopa imax cati ica quimanextijtoya nopa tajtolpanextijquet, mocajqui huactoc huan amo huelqui quiolinía.⁵ Huan ipan nopa talojtzi nopa taixpamit tajco tapanqui huan nopa cuajnexti cati eltoya ipan taixpamit tepejqui talchi senquisa quej Toteco Dios quijijtojtoya ica nopa tajtolpanextijquet para panos.⁶ Huajca nopa tanahuatijquet quiilhui itajtolpanextijca Toteco:

—Nimitztajtanía ximotatajti ica moTECO Dios para ni nomax ma mochicahua.

Huajca itajtolpanextijca TOTECO motatajti para ma mochicahua imax huan imax nopa tanahuatijquet mochijqui cuali quej ipa eltoya.⁷ Huan nopa tanahuatijquet quiilhui nopa tajtolpanextijquet:

—Xihuala nohuaya huan ma tiyaca nochaj para titacuas, huan nimitzmacas se tamanti.

⁸ Pero nopa tajtolpanextijquet quinanquili nopa tanahuatijquet:

—Masque techmacas tajco ten nopa hueyi cali cati tijpiya, amo niyas mohuaya, yon amo nitacuas, yon amo niatis ipan ni lugar.⁹ Pampa TOTECO technahuatijtoc para ma amo nijchihua. Techilhui: ‘Amo xijcua pantzi, yon amo xiati noppa, yon amo xitacuepili ipan nopa ojti cati ipan tiyajqui.’

¹⁰ Huajca nopa tajtolpanextijquet yajqui ipan seyoc ojti, huan amo mocuetqui ipan nopa ojti cati ipan yajqui Betel.

¹¹ Ipan altepet Betel itztoya se huehuentzi tajtolpanextijquet. Huan iconehua quipohuilitoj nochí

cati nopa tajtolpanextijquet ten tali Judá quichijqui ipan nopa tonali nepa ipan Betel. Nojquiya quipohuiliijque intatata taya nopa tacat quiilhuijtoya nopa tanahuatiijquet. ¹² Huan intatata quintatzintoquili:

—¿Ipan catijqui ojti yajqui nopa tacat?

Huan iconehua quinextilijque nopa ojti cati ipan quisqui nopa tacat ten Toteco Dios cati ehua tali Judá. ¹³ Huajca quinilhui iconehua:

—Xipejpechtica noburro para ipan niyas.

Huan inijuanti quipejpechtijque iburro, huan nopa tajtolpanextijquet cati huehuentzi tejcoc, ¹⁴ huan yajqui itepotzco nopa tajtolpanextijquet ten tali Judá cati elqui itequipanojca Toteco Dios. Huan quipantito mosehuijtoc itzinta se ahua cuahuit huan quitatzintoquili:

—¿Ta tiitequipanojca Toteco Dios cati tihualajtoc ten tali Judá?

Huan yaya quinanquili:

—Quena, na.

¹⁵ Huan nopa huehuentzi quiilhui:

—Ma tiyaca nochaj titacuati nohuaya.

¹⁶ Pero nopa tajtolpanextijquet ten tali Judá quinanquili:

—Amo nihuelis niyas mohuaya. Amo hueli nitacuas, yon niatis nica. ¹⁷ Pampa Toteco Dios techilhuijtoc ma amo nitacua yon ma amo niati nica, yon ma amo nitacuepilis ipan nopa ojti cati ipan niajsico.

¹⁸ Pero nopa huehuentzi tajtolpanextijquet quichihuaulti huan quiilhui:

—Na nojquiya se nitajtolpanextijquet quej ta, huan se iilhuicac ejca TOTECO technahuatijtoc ma nimitzhuica nochaj huan ma nimitztamaca.

Pero nopa huehue tacat quiistacahuiyaya.
¹⁹ Huajca nopa tajtolpanextijquet ten tali Judá yajqui ihuaya huan tacuajqui huan atic ipan ichaj. ²⁰ Huan quema mosehujtoya nechca mesa, TOTECO quicamanalhui nopa huehue tajtolpanextijquet cati quicuepaltijtoya, ²¹ huan yaya quilhui nopa tajtolpanextijquet cati ehua tali Judá:

—TOTECO quijtohua para ta amo tijnealto-quilijtoc cati mitzilhui huan amo tijtepanitztoc nopa tanahuatili cati mitzmacac. ²² Ta timocuetqui huan titacuajqui huan tiatic campa TOTECO mitznahuati amo xijchihua. Huajca ama timquis huan amo mitztalpachose campa motatahua quintalpachojque.

²³ Quema nopa tajtolpanextijquet ten tali Judá tanqui tacua huan ati, nopa tajtolpanextijquet cati huehuentzi, quipejpechtili iburro, ²⁴ huan tejcoc ipan iburro huan yajqui. Pero ipan ojti quisqui se león huan quimicti. Huan itacayo mocajqui huetztoc ipan ojti. Huan nopa burro huan nopa tecuani mocajque san sejco nechca nopa mijcatzi.

²⁵ Huan teipa panoque sequij masehualme huan quiitaque nopa mijcatzi huetztoc ipan ojti huan nopa tecuajquet noja itztoya iiexteno. Huan quema ajsitej ipan nopa altepet campa ehua nopa tajtolpanextijquet cati huehuentzi, tepohuilijque cati quiitztoyaj ipan ojti. ²⁶ Huan quema quicajqui nopa tajtolpanextijquet cati quicuepaltijtoya

ipan ojti, quijito: “Yaya itajtolpanextijca TOTECO cati amo quineltocac cati TOTECO quinahuatijtoya. Yeca TOTECO quitemactili imaco nopa león, para ma quimicti quej Toteco Dios quiilhui para panos.”

²⁷ Huajca quinilhui iconehua ma quipejpechtica ipilburro. Huan inijuanti quipejpechtilijke. ²⁸ Huan nopa tajtolpanextijquet cati huehuentzi yajqui huan quipantito nopa mijcatzi huetztoc ipan ojti huan inechca itztoya nopa burro huan nopa león. Huan nopa león amo quicuajtoya nopa mijcatzi, yon amo teno quichihuilitoya nopa burro. ²⁹ Huajca nopa tajtolpanextijquet cati huehuentzi quitananqui itacayo itajtolpanextijca Toteco Dios huan quitali ipan iburro. Huan mocuetqui ipan ialtepe nopa huehuentzi para quichoquilise huan quitalpachose. ³⁰ Huan quitalpacho ipan nopa ostot cati quichijtoya para ya. Huan chocac por ya huan quijito: “¡Titeicnelti tinoicni!”

³¹ Huan quema ya quitalpachojtoyaj, quinilhui iconehua:

—Quema na nimquis, techtalpachoca campa tijtalpachoque nopa tacat ten Toteco Dios. Xijtalica noomiylo campa eltoc ya iomiyohua. ³² Pampa melahuac mochihuas nochí cati yaya quijito ica itequiticayo TOTECO ten nopa taixpamit ipan Bettel huan ten nopa taixcopincayome cati eltoque ipan tepeme campa hueli ipan altepeme nica ipan tali Samaria.

³³ Pero masque nochí ya ni panoc iixpa Jeroboam, yaya amo moyolcuetqui, yon amo quicajqui cati amo cuali quichihuayaya. Quisehuiquili

quintalía totajtzitzi ten hueli masehualme cati amo quinamiqui mochihuase totajtzitzi. Huan cati hueli cati quinequiyaya mochihuas totajtzitzi quiyocataliyaya para ma mochihua totajtzitzi ipan nopa tepeme campa quinnextiliyaya ma quihueyichihuaca TOTECO ica taixcopincayome. ³⁴ Huan ya ni elqui se hueyi tajtacoli para Jeroboam huan iconehua. Huan yeca Toteco Dios teipa quitamilti itequiticayo Jeroboam huan quinmicti nochí ichaj ehuani por ni tajtacoli cati quichijqui.

14

Ahías tepohuili para tamis itequiticayo Jeroboam

¹ Ipan nopa tonali, Abías, icone Jeroboam, huetzqui ipan se hueyi cocolisti. ² Huan Jeroboam quihilhui isihua:

—Ximopata para ma amo mitzixmatica sinta tinosihua huan xiya ipan altepet Silo. Nopona itztoc Ahías, nopa tajtolpanextijquet cati techtali ma nieli nitanahuatijquet ipan ni tali Israel. ³ Xijhuica majtacti pantzi huan nopa tortas cati quipiya miyac tamanti cuali iijtic huan se soqui xarro ica necti. Huan xiquitati para ma mitzilhui taya panos ica ni conet.

⁴ Huan quej nopa quichijqui isihua Jeroboam. Mocualchijchijqui huan yajqui nepa ipan Silo huan ajsito ipan ichaj Ahías. Huan Ahías amo hueliyaya tachiya, pampa tahuel ya huehuejtixtoya. ⁵ Pero TOTECO ya quimachiltijtoya Ahías para hualayaya, quihilhui: Isihua Jeroboam hualas

mitztatzintoquili taya panos ica icone, pampa tahuel mococohua. Hualas cuali mopatatos para amo xiquixmatica. Huan monequi tijnanquilis ica nopa camanali cati nimitzmacas. ⁶ Huan quema Ahías quicajqui se tanojnotza campa icalte, quiijto:

—Xicalaqui, ta tiisihua Jeroboam. ¿Para ten timochihua quej tiseyoc? Na nijselijtoc se tanahuatili para nimitzcamanalhuis chicahuac. ⁷ Xiya huan xiquilhuiti Jeroboam nopa camanali cati TOTECO toDios tiisraelitame techmacatoc para ya. TOTECO quijto: ‘Na nimitzquixti ten tatajco ni masehualme huan nimitzchijqui titanahuatijquet ipan ni noisraelita masehualhua. ⁸ Na nijcuili tequiticayot iixhui David huan nimitzmacac ta. Pero ta amo tielqui quej David, notequipanojca, cati quichijqui nochí notanahuatihuá, huan techtoquili ica nochí iyolo huan quichijqui cati xitahuac noixpa. ⁹ Ta achi más tijchijqui cati amo cuali que nochí sequinoc cati itztoyaj achtohuiya. Pampa timochihuilijtoc taixcopincayome ten teposti huan tiquinita quej modioses para techcualancamacas. Huan pampa timoicancuectoc ica na, ¹⁰ nijtamtillis motequiticayo para amo huelise tanahuatise moconehua. Huan nijchihuas ma miquica nochí oquichpilme huan telpocame cati moaxcahua ipan tali Israel masque moconehua ica moxinach o tiquincojtoc para mitztequipanose. Amo aqui mocahuas para itztos. Niquintamtillis nochí moteixmatcahua quej nicochpanas huacax cuitat hasta amo teno mocahuas.

¹¹ “ ‘Chichime quincuase moteixmatcahua cati

miquise ipan altepet. Huan cati miquise ipan cuatitamit quincuase totome cati nacacuaj pampa quej nopa na niamoTECO niquijtojtoc.’”

¹² Huan teipa nopa tajtolpanextijquet Ahías quiilhui isihua Jeroboam: “Ximoquetza huan xiya mochaj. Huan quema tijtalis se moicxi ipan nopa altepet, nopa piloquichpiltzi miquis. ¹³ Huajca nochí tali Israel ehuani chocase huan quitalpachose pampa san ya ten nochí ichaj ehuani Jeroboam quinpiyas cati quitalpachose huan pampa san ya ipan nochí iteixmatcahua Jeroboam quiyolpactía TOTECO toDios tiisraelitame. ¹⁴ Teipa TOTECO quitananas ipan tali Israel seyoc tanahuatijquet huan yaya quintzontamiltis nochí ichaj ehuani Jeroboam quema tanahuatis. Quena, nimantzi quichihuas.

¹⁵ TOTECO quintzejtzelos Israel ehuani san quej se hueyi hueyat quintzejtzelohua nochí acacuame. Huan quej se quimacui xihuit cati amo quinequi ma elto ipan imila, quinquixtis israelitame ten ni cuali tali cati quinmacac inihuejapan tatahua, huan quinmajcahuas más para neca ten nopa hueyat Eufrates, pampa quinchijchijtoque nopa taquetzalme cati ipan quinpiyaj nopa fiero taixcopincayome para nopa tiotzi cati itoca Asera huan quinhueyichijtoque huan quicualancamacatoque TOTECO. ¹⁶ Toteco Dios quintahuelcahuas israelitame pampa tajtacolchijtoc Jeroboam huan quinnextilijtoc israelitame nojquiya ma quichihuaca quej ya.”

¹⁷ Huajca isihua Jeroboam moquetzqui huan yajqui huan ajsito ipan altepet Tirsa. Huan quema ya calactiyahuiyaya ipan icalte nopa alte-

pet, nopa piloquichpiltzi mijqui. ¹⁸ Huan quitalpachojque huan quichoquilijque nochí israelitame quej quiijtojtoya TOTECO ica nopa tajtolpanextijquet Ahías cati elqui itequipanojca.

¹⁹ Huan nochí sequinoc tamanti cati quichijqui Jeroboam, huan nopa hueyi tatehuilisti cati quichijqui, huan quenicatza tanahuati, nochí eltoc ijcuillijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ²⁰ Huan Jeroboam tanahuati 22 xihuit. Huan quema mijqui, pejqui tanahuatía icone cati itoca Nadad.

*Roboam tanahuati ipan tali Judá
(2 Cr. 12:1-16)*

²¹ Ipan tali Judá tanahuatiyaya Roboam cati eliyaya icone Salomón. Quipiyayaya 41 xihuit quema pejqui tanahuatía, huan tanahuati 17 xihuit nepa ipan altepet Jerusalén, nopa altepet cati TOTECO quitapejpeni ipan nochí altepeme ten israelitame para quihuicas itoca para nopona itztos. Inana Roboam itoca Naama huan elqui se amonita sihuat. ²² Huan quema Roboam tanahuatiyaya ipan tali Judá, nopa Judá ehuani quichijque cati amo cuali iixpa TOTECO huan más quicualancamacaque. Inintajtacol elqui más que cati inintatahua quichijtoyaj. ²³ Inijuanti quichijchijque pilcaltzitzí para teteyome huan quimontonojque teme cati quinitayayaj para tatzejzeloltique huan nojquiya quinchijchijque taquetzalme ica nopa fiero taixcopincayome para nopa tiotzi cati itoca Asera huan quintalijque campa hueli ipan tepeme

huan inintzala huejhueyi cuame. ²⁴ Huan nojquiya ipan nopa tali itztoyaj tacame cati tequitiyayaj campa quinhueyichihuayayaj inintaixcopincayohua. Inintequi elqui para quinselise tacame huan quichihuase cati fiero inihuaya. Huan quintocaxtiyayaj sodomitame. Huan nopa sodomitame quichijque nochí nopa tamanti tajtacoli cati quichihuayayaj nopa sequinoc xinachti masehualme cati TOTECO quinquixtijtoya iniixpa israelitame.

*Sisac quitehuico Jerusalén
(2 Cr. 12:2-12)*

²⁵ Huan quema Tanahuatijquet Roboam yahuiyaya para macuili xihuit para tanahuatis, hualajqui Sisac ica isoldados para quitehuicoj altepet Jerusalén. Yaya elqui nopa tanahuatijquet ten tali Egipto. ²⁶ Huan Sisac quincuili miyac tomi huan tamanti ten oro huan ten patiyo ipan ichaj TOTECO. Nojquiya quicuili iricojyo ipan nopa cali ten tanahuatijquet. Senquisa nochí quiichtequilijque. Huan quihiuicaque nochí tepos yolixtzajcayot ten oro cati Salomón quisencajtoya para quitequihuise isoldados para ica momanahuise ipan tatehuilisti. ²⁷ Huajca quej ipataca nopa tepos yolixtzajcayot ten oro, tanahuatijquet Roboam quichijchijqui ten bronce huan quinmacac nochí tayacanani ten soldados cati tamocuitahuíaj inechca nopa caltemit ten ichaj. ²⁸ Quema nopa tanahuatijquet yajqui ipan ichaj TOTECO, itamocuitahuijcahua quihiucayayaj nopa tepos yolixtzajcayome.

Huan quema mocuetqui ichaj, quitalijque ipan inincuarto nopa tamocuitahuiani.

²⁹ Huan nochí sequinoc tamanti cati panoc ipan itequi Roboam eltoc ijcuilijtoc ipan nopa amat-apohuali cati itoca Cati Quichijque Nopa Tanahuatiani Ten Tali Judá.

³⁰ Huan talojtzitzí oncayaya miyac tatehuilisti ica Roboam huan Jeroboam. ³¹ Huan teipa mijqui Roboam huan quitalpachojque ica ihuejcapán tatahua ipan Ialtepe David. Inana itoca eliyaya Naama huan ehua tali Amón. Teipa pejqui tanahuatía iconé cati itoca eliyaya Abíam.

15

Abíam tanahuati ipan tali Judá (2 Cr. 13:1-22)

¹ Abíam pejqui tanahuatía ipan tali Judá quema Tanahuatijquet Jeroboam, iconé Nabat, yahuiyaya para 18 xihuit tanahuatis ipan tali Israel. ² Huan Abíam tanahuati ipan altepet Jerusalén eyi xihuit. Inana itoca eliyaya Maaca cati elqui iichpoca Absalón. ³ Abíam quichijqui san se tajtacoli quej itata quichijtoya quema tanahuatiyaya. Amo quipixqui iyolo xitahuac iixpa TOTECO Dios cati elqui iTETO quej eliyaya iyolo David, ihueyi tata. ⁴ Pero pampa TOTECO quiicneli David, noja quinmacac tanahuatili iixhuihua para tanahuatise ipan caltanahuatili ipan Jerusalén. Huan TOTECO quimacac Abíam se iconé para tanahuatis ipan altepet Jerusalén quema yaya miquisquía. ⁵ Huan TOTECO quiicneli David pampa quichijqui nochí cati cuali iixpa

TOTECO. David amo moiycatali ten TOTECO, yon amo quema quitahuelcajqui cati TOTECO quinahuatijtoya ipan nochí tonali ten inemilis. San ipan nopa tamanti ten Urías nopa heteo tacat, amo quipacti TOTECO cati quichijqui.

⁶ Huan oncayaya tatehuilisti ica Abíam, icone nopa mijcatzi Roboam, huan Jeroboam nochí tonali ten ininemilis. ⁷ Huan sequinoc tamanti cati panoc ipan itequi Abíam huan nochí cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Judá. ⁸ Huan quema Abíam mijqui, quitalpachojque campa itoca Ialtepe David. Huan tanahuati icone cati itoca Asa.

*Asa tanahuati ipan tali Judá
(2 Cr. 14:1-5; 15:16-19)*

⁹ Huan Asa pejqui tanahuatía ipan tali Judá quema Tanahuatijquet Jeroboam yahuiyaya para 20 xihuit tanahuatis ipan tali Israel. ¹⁰ Huan Asa tanahuati 40 xihuit ipan altepet Jerusalén. Itoca ihueyi nana eliyaya Maaca iichpoca Absalón. ¹¹ Asa quichijqui cati cuali iixpa TOTECO quej ihueyi tata David quichijtoya. ¹² Quinquixti nopa tacame cati quintocaxtiyayaj sodomítame para ayecmo ma quichihuaca ten hueli. Huan quini-jcueni nochí taixcopincayome cati itata quinchichijtoya. ¹³ Huan nojquiya quiqxintili ihueyi nana, Maaca, itequiticayo cati quipiyayaya quej nopa tenan sihua tanahuatijquet pampa quichijtoya se taquetzali ten nopa fiero taixcopincayome para nopa teteyot Asera. Huajca Asa quitzon-tejqui nopa taquetzali huan quitati nechca

nopa atajti cati itoca Cedrón. ¹⁴ Pero campa te-peme amo senquisa quinijcueni nochí nopa taix-pame cati amo eltoya quej quiijtohua tanahuatili campa quihueyichihuayayaj TOTECO huan taix-copincayome san sejco. Pero Asa nejnенqui ica iy-olo cuali iixpa TOTECO nochí inemilis. ¹⁵ Nojquiya Asa quitali ipan itiopa TOTECO nopa oro, plata huan tamanti cati tahuel patiyo cati itata huan ya quiyyocatalijtoya para quimacas TOTECO.

*Asa huan Ben Adad mohuampojchijque
(2 Cr. 16:1-10)*

¹⁶ Huan ipan nochí inemilis Tanahuatijquet Asa oncayaya tatehuilisti ica Baasa, nopa tanahuati-jquet ipan tali Israel. ¹⁷ Huan Tanahuatijquet Baasa calajqui ipan tali Judá huan quichijqui nelía cuali tachijchihuali nopa altepet Ramá para no-pona mocahuase isoldados para quimocuitahuise nopa ojti. Huan quitzajqui nopa ojti para amo aqui huelis quisas, yon calaquis ten ital Tanahuatijquet Asa ipan tali Judá. ¹⁸ Huajca quema Baasa ya calactoya ipan tali Judá, Tanahuatijquet Asa quicuic nochí plata huan oro cati eltoya ipan itiopa TOTECO huan ipan ichaj, huan quitali nochí inimaco itequipanojcahua. Huan quintitanqui ma quiitatij Tanahuatijquet Ben Adad ipan alte-pet Damasco ipan tali Siria, cati eliyaya icone Tabrimón huan iixhui Hezión. Huan quiihui:

¹⁹ “Ma tijchihuaca se camanal sencahualli san se-jco quej totatahua quipixque. Xiquita, nim-itztitanilía se nemactí ten oro huan plata. Xijosolo ama nopa camanal sencahualli ica nopa tanahuatijquet Baasa ten tali Israel

para yaya ma techtalcahui huan ayecmo techcuatotonis.”

20 Huan Ben Adad quiseli nochí ten quiilhuij-toya nopa tanahuatijquet Asa huan quintitanqui nopa tayacanani ten soldados para ma quintehuitij se quesqui altepeme ipan tali Israel. Huan quintanqui nopa altepeme ten Ijón, Dan, Abel Bet Maaca huan Cineret huan nochí altepeme ten tali Neftalí. **21** Huan quema Baasa quimatqui ya nopa, ayecmo quicualchijchijqui altepet Ramá. Huan mocuetqui ipan altepet Tirsa ipan ital.

22 Huajca Tanahuatijquet Asa tatitanqui ma quinnotzatij nochí Judá ehuani para ma mosentilica huan para ma amo polihui yon se. Huan quintequimacac ma quisosoloca nochí teme huan nochí cuame cati Tanahuatijquet Baasa quitequihuiyaya para quichihuas más cuali nopa altepet Ramá. Huan Tanahuatijquet Asa quitequihui ya nopa para quincualchijchihuas altepeme Gebá huan Mizpa ipan inintal iixhuihua Benjamín.

*Asa mococo huan mijqui
(2 Cr. 16:11-14)*

23 Nopa sequij tamanti cati panoc ipan itequi Asa, huan nochí ichicahualis huan nochí cati quichijqui, huan nopa altepeme cati quincualchijchijqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Judá. Quema eliyaya huehuentzi, quipixqui se cocolisti ipan iicxi.

24 Huan teipa mijqui huan quitalpachojque campa ihuejcapan tatahua quintalpachojtoyaj ipan Jerusalén ipan nopa colonia cati itoca Ialtepe

David. Teipa pejqui tanahuatía icone cati itoca Josafat.

Nadab tanahuati ipan tali Israel

²⁵ Quema Asa yahuiyaya para ome xihuit tanahuatis ipan tali Judá, Nadab, icone Jeroboam, pejqui tanahuatía ipan tali Israel. Huan Nadab tanahuati para ome xihuit. ²⁶ Pero quichijqui cati amo cuali iixpa TOTECO, huan quichijqui tajtacoli quej itata quichijtoya. Huan nojquiya quinchijqui nochí israelitame ma tajtacolchihuaca. ²⁷ Pero Tanahuatijquet Baasa, icone Ahías, cati huala ipan ihueyi familia Isacar, motananqui inihuaya sequinoc ihuampoyohua huan quimicti Nadab nepa ipan Gibetón, se altepet ten filisteo masehualme pampa Nadab huan nochí iiisraelita soldados quiyahualojtoyaj nopa altepet Gibetón para quitehuis.

²⁸ Baasa quimicti Nadab quema Asa yahuiyaya para eyi xihuit tanahuatis ipan tali Judá. Huan teipa Baasa mochijqui tanahuatijquet ipan tali Israel. ²⁹ Huan nima quema Baasa pejqui tanahuatía, quimicti nochí iteixmatcahua Jeroboam quej TOTECO quijitojtoya ica itequipanojca Ahías cati ehua ipan altepet Silo para panos. Huan amo aqui quicajqui ma itzto. ³⁰ Quej ni elqui pampa Jeroboam tahuel tajtacolchijtoya huan quichijqui para ma tajtacolchihuaca nochí israelitame. Huan tahuel quicualani TOTECO ininDios israelitame.

³¹ Nochi sequinoc tamanti cati panoc ipan itequi Nadab huan nochí cati quichijqui eltoc ijcuilijtoc

ipan nopa amatapohuali cati itoca Cati Quichijque Nopa Tanahuatiani Ipan Tali Israel.

³² Huan nochí tonali ipan inintanahuatilis oncayaya tatehuilisti ica Tanahuatijquet Asa ipan Judá huan Baasa tanahuatijquet ipan tali Israel.

Baasa tanahuati ipan tali Israel

³³ Huan quema Tanahuatijquet Asa yahuiyaya para eyi xihuit tanahuatis ipan tali Judá, pejqui tanahuatía Baasa, icone Ahías, ipan tali Israel nepa ipan altepet Tirsa. Huan Baasa tanahuati 24 xihuit. ³⁴ Huan quichijqui cati amo cuali iixpa TOTECO huan quisehuiquili quitoquili ifiero ojhui huan itajtacol Jeroboam pampa quinmacayaya israelitame taixcopincayome para ma ica quihueyichihuaca Toteco huan yeca quinchijqui ma tajtacolchihuaca.

16

¹ Ipan nopa tonali nopa tajtolpanextijquet Jehú quimacac Tanahuatijquet Baasa se camanali ten se taijyohuilisti cati TOTECO quititaniyaya. Huan quiilhui: ² “Na nimitztananqui ipan taltepocти para nimitzchihuas titanahuatijquet campa noisraelita masehualhua, pero ta tinejnentoc ipan ifiero ojhui Jeroboam. Ta tijchijtoc ma tajtacolchihuaca noisraelita masehualhua. Huan tijchijtoc ma nicualani miyac por motajtacol. ³ Yeca ama nimitztzontamiltis ta huan nochí mochaj ehuani quej nijchijqui ica nochí iteixmatcahua Jeroboam cati elqui icone Nabat. ⁴ Huan moteixmatcahua cati miquise ipan altepet quincuase chichime,

huan cati miquise ipan cuatitamit, quincuase nopa totome cati nacacuaj.”

⁵ Huan nopa sequinoc tamanti cati panoc ipan itequi Baasa huan nochí cati quichijqui huan nopa chicahualisti cati quipixqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ⁶ Huan quema mijqui Tanahuatijquet Baasa, quitalpachojque ipan altepet Tirsa. Teipa tanahuati iconē cati itoca Ela.

⁷ Huajca ni camanali ten TOTECO cati quimacatoya Jehú nopa tajtolpanextijquet cati iconē Hanani, elqui para Tanahuatijquet Baasa huan para ichaj ehuani pampa yaya quichijtoya nochí cati amo cuali iixpa TOTECO. Huan ica nochí cati quichijqui tahuel quicualancamacac TOTECO. Yeca TOTECO quinixpolihultí quej quichijqui ica Jeroboam.

Ela huan Zimri tanahuatijque ipan Israel

⁸ Quema Tanahuatijquet Asa yahuiyaya para 26 xihuit tanahuatis ipan tali Judá, pejqui tanahuatía Ela, iconē Baasa, ipan tali Israel. Huan mosehui para tanahuatis ipan altepet Tirsa huan tanahuati ome xihuit. ⁹ Pero Zimri, se itapalehuijca Ela, cati quimocuitahuiyaya tajco imiyaca itepos carrojhua para tatehuilisti, motananqui inihuaya sequinoc ihuampoyohua para quitehuise Ela. Huajca se tonali quema taiyaya Ela ipan altepet Tirsa ipan ichaj Arsa cati eliyaya se itapalehuijca nojquiya huan imaco eltoya nopa icaltanahuatil, Ela taic hasta cuali moihibunti. ¹⁰ Huan nimantzi ajxito Zimri huan quimicti para ya quipatas ipan

itanahuatilis. Ni tamanti panoc quema Tanahuatijquet Asa yahuiyaya para 27 xihuit tanahuatis ipan tali Judá.

¹¹ Huan nima quema pejqui tanahuatía Zimri ipan nopa caltanahuatili ipan tali Israel, quinmicti nochí iteixmatcahuá huan ichampoyohua Baasa. Amo quicajqui ma itzto yon se tacat ten ichaj ehuani, iteixmatcahuá o ihuampoyohua cati huelisquía momacuepasse. ¹² Huan quej ni Zimri quintzontamilti nochí iteixmatcahuá Baasa quej TOTECO quiyolmelajtoya Baasa ica nopa tajtolpanextijquet Jehú. ¹³ TOTECO quintatzacuilty por nochí itajtacolhua Baasa huan iconé, Ela. Pampa injuanti quinchijque ma tajtacolchihuaca nochí israelitame pampa quinchihuáltijque ma quinhueyichihuaca taixcopincayome ten sequinoc altepeme, huan yeca TOTECO ininDios israelitame tahuel cualanqui inihuaya por inintajtacolhua.

¹⁴ Nochí sequinoc tamanti cati panoc ipan itequi huan nochí cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

¹⁵ Huan quema Tanahuatijquet Asa yahuiyaya para 27 xihuit tanahuatis ipan tali Judá, pejqui tanahuatía Zimri, huan tanahuati san chicome tonati ipan altepet Tirsa. Huan nochí israelita soldados itztoyaj nechca nopa filisteo altepet cati itoca Gibetón pampa quitehuiyayaj. ¹⁶ Huan nopa soldados cati mochijtoyaj nechca altepet Gibetón, quimatque para Zimri quimicti Tanahuatijquet Ela. Huajca nochí nopa israelitame quitapejpenijque Omri para ma eli tanahuatijquet ipan tali

Israel. Omri eliyaya se hueyi tayacanquet ten soldados. ¹⁷ Huajca Omri huan nochí nopa israelita soldados quicajtejque altepet Gibetón huan ya-jque quitehuitoj altepet Tirsa.

¹⁸ Huan quema Tanahuatijquet Zimri quiitac para nopa israelita soldados ya quiitzquitoyaj nopa altepet, motzajqui ipan nopa caltanahuatili. Huan quilemenalti nopa cali campa hueli huan npona calijtic mijqui. ¹⁹ Mijqui por nopa tajtacoli cati quichijtoya pampa quichijqui nochí cati amo cuali iixpa TOTECO. Nejnenqui ipan ifiero ojhui Jeroboam huan ica nopa tajtacoli cati quichijqui para ma quinhueyimatica teteyome ihuaya Toteco, quinnextili israelitame ma tajtacolchihuaca. ²⁰ Huan nochí cati quichijqui Zimri huan quenicatza quisencajqui para quimictis Tanahuatijquet Ela eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel.

Omri tanahuati ipan tali Israel

²¹ Huajca nopa israelita masehualme motaj-coxelojque ica ome talnamiquilsti. Tajco injuanti quinequiyayaj para Tibni, icone Ginat, ma elis tanahuatijquet. Huan nopa seyoc tajco quinequiyayaj Omri. ²² Pero nopa tajco israelitame cati quitoquilijque Omri huelque más que cati quitoquilijque Tibni, icone Ginat. Huajca quimictijque Tibni, huan Omri mochijqui tanahuatijquet.

²³ Quema Asa yahuiyaya para 31 xihuit para tanahuatis ipan tali Judá, pejqui tanahuatía Omri ipan tali Israel huan tanahuati 12 xihuit ica nochí.

Chicuase ten nopa xihuit, yaya tanahuati ipan altepet Tirsia. ²⁴ Huan Omri quicohuili Semer nopa cuatitamit campa ama eltoc nopa altepet Samaria san ica 66 kilos ten plata. Huan nopona quichijqui se altepet huan quitocaxti Samaria por nopa tacat cati achtohuiya eliyaya iaxca.

²⁵ Nochi cati quichijtiyajqui Omri elqui amo cuali iixpa TOTECO. Yaya quichijqui cati eliyaya más fiero que nopa sequinoc tanahuatiani cati tanahuatijque achtohui que ya. ²⁶ Nejnenqui ipan nochi iojhui Jeroboam, icone Nabat, huan quinhueyichijqui taixcopincayome huan quinchihualti nopa israelitame ma nojquiya tajtacolchihuaca. Yeca Omri tahuel quicualancamacac TOTECO Dios.

²⁷ Nopa sequinoc tamanti cati panoc ipan itequi Omri huan nochi cati quichijqui eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ipan Tali Israel. ²⁸ Huan Omri mijqui huan quitalpachojque ipan altepet Samaria, huan teipa pejqui tanahuatía icone cati itoca Acab.

Acab tanahuati ipan tali Israel

²⁹ Tanahuatijquet Acab, icone Omri, pejqui tanahuatía ipan tali Israel quema Asa yahuiyaya para 38 xihuit para tanahuatis ipan tali Judá.

³⁰ Huan Acab mosehui ipan altepet Samaria huan tanahuati ipan tali Israel para 22 xihuit. Huan Acab quichijqui cati amo cuali iixpa TOTECO. Quichijqui más amo cuali que cati quichijque nochi sequinoc tanahuatiani achtohui que ya.

³¹ Yaya moilhui para amo quenijqui sintajtacolchihuas huan motatajtis ica taixcopincayome quej quichijqui Jeroboam, icone Nabat. Huan Acab nojquiya mosihuajti ica Jezabel, iichpoca Et Baal nopa tanahuatijquet ipan tali Sidón. Huan pejqui motatajtía huan quinhueyitalía nopa teteyome ten Baal. ³² Huan quichihuili Baal se tiopamit huan taixpamit ipan altepet Samaria. ³³ Huan nojquiya quiquetzqui se taquetzali fiero para nopa taixcopincayot Asera. Huan quej nopa Acab quichijqui noja más fiero huan más quicualanca-macac TOTECO inindios nopa israelitame huan amo quej quichijke nopa sequinoc tanahuatiani cati tanahuatijque achtohui que ya. ³⁴ Ipan nopa tonali quema tanahuatiyaya Acab; Hiel, cati ehua Betel, sempa pejqui quicualchijchihua nopa altepet Jericó. Huan quema quitali itzinpehualtil, mijqui iachtohui cone cati itoca Abiram. Huan quema quitamilti huan quitali nochí nopa caltemit, mijqui icone teipa ejquet cati itoca Segub. Nochi ya ni mochijqui quej TOTECO huejcajquiya quillhuijtoya Josué, icone Nun, ma teyolmelahuas para paños.

17

Elías teyolmelahua para oncas tahuaquisti

¹ Huan nopa tajtolpanextijquet Elías ten altepet Tisbe ipan tali Galaad quiilhui Acab: “Temachti nimitzilhuía amo taquiyahuis para se ome xihuit, yon amo huetzis ajhuechti ipan tali Israel hasta quema na niquijtos para oncas.”

² Huan TOTECO quiilhui Elías: ³ “Xiquisa nica huan xiya ica campa hualquisa tonati huan ximotati nechca nopa atajti cati itoca Querit cati mocahua ica campa hualquisa tonati ten hueyat Jordán. ⁴ Nopona huelis tiatis ipan nopa atajti huan niquinnahuatijtoc totome ma mitzhuiquilda motacualis.”

⁵ Huajca Elías quichijqui cati TOTECO quinahuati huan yajqui para itztotl nechca nopa atajti Querit, cati eltoc iixmelac nopa hueyat Jordán. ⁶ Huan nopa totome quihuiquiliyaya pantzi huan nacat mojmosta ica ijnaloc huan ica tiotac, huan quiyyaya at ten nopa atajti Querit. ⁷ Huan panoc miyac tonali huan teipa huajqui nopa atajti Querit pampa amo taquiyajtoya ipan tali Israel.

Elías yajqui altepet Sarepta

⁸ Huajca TOTECO quiilhui Elías: ⁹ “Ximoquetza huan xiya ipan altepet Sarepta ipan tali Sidón huan xiitzto ipan nopa altepet. Niqualhuijtoc sihuat cati icnotzi cati itztoc ipan nopa altepet ma mitztamaca.”

¹⁰ Huajca Elías moquetzqui huan yajqui nepa altepet Sarepta. Huan quema ajsito ipan icalte nopa altepet, quipanti se sihuat cuapejpenayaya, huan ya quinojnotzqui huan quiilhui:

—Na nimitztajtanía techhualiquili se quentzi at ipan se vaso para niquis.

¹¹ Huan quema nopa sihuat yahuiyaya para quicuiliti nopa at, Elías sempa quinojnotzqui huan quiilhui:

—Nojquia nimitztajtanía techhualiquili se achi pantzi.

¹² Huan nopa sihuat quinanquili:

—Temachti na amo nijpiya yon se quentzi pantzi ipan tochaj. Pero nijpixtoc se achi harina huan se quentzi aceite huan ama njsentilía se ome cuahuit para niquicxitis para nocone huan na para tijcuase huan teipa timiquise ica mayanti.

¹³ Huan Elías quinanquili:

—Amo ximajmahui. Xiya xijsencahuati quej tiquijtojtoc. Pero achtohui ica nopa harina cati tijpiya xijchihua se torta pisiltzi huan techhualiquili. Huan teipa xijsencahua seyoc para ta huan para mocone. ¹⁴ Pampa TOTECO toDios nochí israelitame quijito para amo tamis nopa harina, yon nopa aceite hasta nopa tonali quema TOTECO quichihuas ma huetzi at ipan ni tali Israel.

¹⁵ Huajca nopa sihuat cati icnotzi yajqui huan quichijqui cati Elías quiilhuijtoya huan tacuajqui Elías, huan nopa sihuat huan iconé. Huan quipixque tacualisti para miyac tonali. ¹⁶ Amo tanqui nopa harina campa quiajoctoya, yon nopa aceite cati eltoya ipan se soqui xarro, san quej TOTECO quijitojtoya ica Elías.

¹⁷ Huan se tonali, huetzqui ipan se cocolisti iconé nopa sihuat cati icnotzi huan icocolis eliyaya tahuel chicahuac. Ayecmo quipixqui pajti huan mijqui. ¹⁸ Huajca nopa sihuat cati icnotzi quiilhui Elías:

—¿Taya nijpiya ica ta tiitequipanojca Toteco Dios? ¿Tihualajtoc para techelnamiquiltis notajtacolhua huan tijchihuas ma miqui nocone?

¹⁹ Huan ya quiilhui:

—Techmaca mocone.

Huajca Elías quicuic nopa piloquichpiltzi huan quihuicac campa ya mocahua huan quitali nopa piloquichpiltzi ipan ten ya itapech.

²⁰ Huan nima motatajti ica TOTECO huan quiilhui: “NoTECO Dios, ¿para ten tijchijtoc ma mocueso nopa sihuat cati icnotzi cati ipan ichaj nimocajtoc, huan tijchijtoc ma miqui icone?”

²¹ Huan teipa motejqui ipan nopa piloquichpiltzi eyi huelta, huan quitzajtzili TOTECO huan quiilhui: “NoTECO Dios, nimitztajtanjá se favor, xijmaca itonal ni piloquichpiltzi para itztos.”

²² Huan TOTECO quitacaquili cati tajtanqui Elías huan quichijqui para nopa piloquichpiltzi ma moyolcui. ²³ Huan Elías nimantzi quitananqui nopa piloquichpiltzi huan quihuicac campa itztoya inana huan quiilhui:

—Xiquita mocone itztoc.

²⁴ Huan nopa sihuat quinanquili:

—Ama nelía nijmati cuali para ta tiitequipanojca Toteco Dios huan cati tiqijtohua nelía melahuac pampa huala ten TOTECO.

18

Elías sempa moixnexti iixpa Acab

¹ Huan panoc miyac metzti huan ya yahuiyaya para eyi xihuit amo huetzi at quema TOTECO quinojnotzqui Elías huan quiilhui: “Xiya huan ximoixnextiti iixpa Tanahuatijquet Acab huan xiquilhui para na nijchihuas ma huetzi at ipan nitali Israel.”

² Huajca Elías yajqui para moixnextiti iixpa Acab. Huan ipan nopa tonali nelía oncayaya se hueyi mayanti ipan estado Samaria campa

itztoya Acab. ³ Huan Acab quinotzqui itaya-canca tequipanojca cati itoca Abdías catí imaco el-toya icaltanahuatil. Huan Abdías nelía quitoquili TOTECO ica nochí iyolo. ⁴ Se huelta quema Jezabel quinequiyaya quinmictis nochí itajtolpanextijc-ahua TOTECO, Abdías quintati 100 itajtolpanextijc-ahua ipan ome huejhueyi ostome; 50 quintati ipan se ostot huan seyoc 50 ipan seyoc ostot. Huan quinmacayaya at huan tacualisti. ⁵ Huan Acab quilhui Abdías:

—Monequi ma tijtachilica nochí tali Israel campa onca amelme ipan atajti huan tiquitase sintá hueli tijpantise xihuime para tiquintamacase masque san se ome tocahuayojhua huan tomulas para amo nochí miquise.

⁶ Huajca quixelhuilijque nopa tali ica ome para sesen yas ipan se tajco huan quitemos xihuime huan seyoc yas ipan ne se tajco. Huan Acab yajqui ipan se ojti iseltitzi huan Abdías yajqui ipan seyoc ojti iseltitzi. ⁷ Huan quema nejnentiyahuiyaya Abdías ipan ojti, monamijqui ihuaya Elías. Huan quema quiixmatqui, motancuaquetzqui iixpa huan quiilhui:

—¿Nelía ta, tinoteco Elías?

⁸ Huan Elías quiilhui:

—Quena, na.

Huan teipa quiilhui:

—Xiya, xiquilhuiti moteco Acab para na niitztoc nica.

⁹ Huan Abdías quinanquili:

—¿Taya tajtacoli nijchijtoc na para techtemactilis ica Acab para ma techmicti?

¹⁰ Nopa Tanahuatijquet Acab mitztemojtoc ipan nochí talme huan nochí ipan pilaltepetzitzí campa hueli. Huan nochí tanahuatiani quiilhuijtoque para amo mitzitztoque. Huan Acab quinchihualtijtoc nochí tanahuatiani ma tatestigojquetzaca sinta melahuac amo mitzitztoque. ¹¹ ¡Huan ama techtajtanía ma niya huan ma niquilhui para tiitztoc nica!

¹² Quema na ya niyajtos, huelis Itonal TOTECO mitzhuicas sejcoyoc campa na amo njmati. Huan quema na niquilhuis Acab tiitztoc nica, yaya mitztemoqui huan sinta amo mitzpantis, techmictis. Huan na niquicnelijtoc huan njtequipanojtoc noTECO hasta quema nitelpocat.

¹³ ¿Amo aqui mitzpohuilijtoc cati njchijqui quema Jezabel quinmictiyaya itajtolpanextijcahua TOTECO? Na niquintati se ciento tajtolpanextiani ipan ome ostot huan niquinmacac at huan tacualisti. ¹⁴ ¿Huan ama ta techilhuía ma niya niquilhuiti noteco Acab para tiitztoc nica? Sinta niyas, temachti techmictis.

¹⁵ Huan Elías quinanquili:

—Nijtestigojquetza iixpa TOTECO Cati Quinyacana Iilhuicac ejcahua Ma Tatanitij, ama na noseltitzi nimoinxnextis iixpa Acab.

¹⁶ Huajca Abdías yajqui quitemoto Acab huan quiyolmelahuato. Huan Acab hualajqui huan quinamiquico Elías.

Elías mopanti ihuaya Acab

¹⁷ Huan quema Acab quiitac Elías, quiilhui:

—¿Ta cati tiquincuesolmacatoc israelitame?

¹⁸ Huan Elías quinanquili:

—Na amo niquinmacatoc israelitame tequipacholi, pero ta quena, inihuaya mochaj ehuani anquincuesolmacatoque pampa anquicajque itanahuatilhua TOTECO para anquinhueyichihuase nopa taixcopincayome ten Baal. ¹⁹ Huajca ama xiquinnahuati motequipanojcahua ma quinsentilica nochis israelitame ipan nopa tepet cati itoca Carmelo, ica nochis nopa 450 itajtolpanextijcahua Baal huan nopa 400 itajtolpanextijcahua Asera, cati Jezabel quintamaca.

Elías ihuaya itajtolpanextijcahua Baal

²⁰ Huajca Acab quinnotzqui nochis israelitame huan nochis tajtolpanextiani ipan nopa tepet Carmelo. ²¹ Huan monechcahui Elías iniixpa nochis israelitame, huan quinlhui:

—¿Hasta quema tamis anquipiyase ome amotanamiquilis? Sinta TOTECO yaya Dios, xijtoquilica. Huan sintia Baal yaya Dios, ya xijtoquilica.

Huan nopa israelitame amo teno tananquili-jque. ²² Huan Elías sempa quinlhui nopa israelitame:

—San na noseltitzi nimocajtoc niitajtolpanextijca TOTECO, pero nopa tajtolpanextiani ten Baal itztoque 450 tacame. ²³ Huajca ama xiquinhualicaca ome torojme. Huan amojuanti ximocuilica se, huan xijhuejhueloca huan xijtalica iixco nopa cuahuit ipan nopa taixpamit. Pero amo xijtalica tit ita. Huan na nijcualtalis nopa seyoc toro huan nijtalis iixco nopa cuahuit ipan itaixpa noTeco Dios, pero amo nijtalis tit itantita. ²⁴ Huan nimantzi ximotatajtica ica amotaixcopincayohua,

huan na nimotatajtis ica Toteco Dios. Huan yaya cati tananquilis huan quititanis tit para quitatis nopa cuahuit, yaya nopa cati quinextía para melahuac Toteco Dios. Huan nochí nopa israelitame quiilhuijque para, quena, cualtitoc.

²⁵ Huajca Elías quinilhui nopa itajtolpanextijcahua Baal:

—Xijtapejpenica se ten nopa ome torojme huan xijcualtalica achtohui amojuanti, pampa amojuanti anmiyaqui. Huan ximotatajtica ica amodios, pero amo xijtalica tit itantita.

²⁶ Huajca inijuanti quicuique se toro huan quisencajque, huan pejque motatajtíaj ica Baal. Huan quitzajtzilijque ten ijnaloc hasta tajctona. Huan quijitohuayayaj: “¡Baal, technanquili!” Pero amo aqui quinnanquili yon amo aqui quitoscacaque. Huan inijuanti pejque huitonij chicahuac inechca nopa taixpamit cati quichijchijtoyaj. ²⁷ Huan ica tajctona Elías pejqui quinpinajtía huan quinilhui:

—Xitzajtzica más chicahuac pampa yaya se dios. Huelis se tenijqui moyolilhuía, o huelis quipiya se tequit, o huelis yahui ipan se ojti, o huelis cochtos huan monequi anquiixitise.

²⁸ Huan inijuanti tzajtziyayaj más chicahuac huan mohuasaniyayaj ica cuchillos huan ica cutataminti cati huehueyac hasta quisqui inieso quej momajtoyaj quichihuaj. ²⁹ Huan quej nopa panoc tajctona huan inijuanti quisehuiquilijque cutzajtzij, huan huitonij quej locojme hasta ajsic hora para quitencahuase nopa tacajcahualisti ica tiotac para TOTECO. Pero amo aqui quitoscacaque, yon amo aqui quinnanquili, yon amo aqui

quinchihuili cuenta. ³⁰ Huajca Elías quej ni quinilhui nochí nopa israelitame:

—Technechcahuica na.

Huan nochí israelitame monechcahuijque campa ya. Huan Elías quicualtali nopa taixpamit ten TOTECO cati tahuel sosolijtoya. ³¹ Huan Elías quicuic 12 teme cati quinnextiyaya sesen iconehua Jacob cati TOTECO quitocaxpatatoc huan quitocaxti Israel. ³² Huajca ica nopa teme quichijchijqui se taixpamit para TOTECO. Huan teipa quichijqui se aojti patahuac yahualtic ten nopa taixpamit huan nopa aojti quicuisquía se 20 litros ten cuayoli. ³³ Huan nimantzi quicualtali nopa cuahuit, huan quihuejhuelo nopa toro huan quitali iixco nopa cuahuit. ³⁴ Huan quinilhui:

—Xijtemitica nahui huejhueyi comit ica at huan xijtoyahuaca ipan nopa tacajcahualisti huan nopa cuahuit.

Huan inijuanti quichijque huan teipa sempa quinnahuati:

—Xijchihuaca sempa.

Huan sempa quichijque quej quichijtoyaj achtohui. Huan quinilhui:

—Sempa xijchihuaca ica expa.

Huan quichijque ica expa. ³⁵ Huan huajca nopa at hasta motalohuayaya yahualtic campa nopa taixpamit, huan temitoya nopa aojti. ³⁶ Huan quema ajsic hora para quitencahuase nopa tacajcahualisti ica tiotac para TOTECO, nopa tajtolpanextijquet Elías monechcahui campa taixpamit huan motatajti ica TOTECO huan quijito: “TOTECO Dios, ta cati tiiTeco tohuejcapan tatahua, Abraham, Isaac huan Israel, xijchihua ama ma

quimatica para ta tiToteco huan toDios tiisraelitame huan para na nimotequipanojca. Xijpanexti para na nijchijtoc nochi ya ni pampa technahuatijtoc.³⁷ TOTECO, technanquili, para nopa masehualme ma quimatica para ta nelia tiDios huan para ama tiquinnotza ma mocuepaca ica ta.”

³⁸ Huajca ipan nopa talojtzi, huetzqui se tit ten TOTECO, huan quitamitati nopa tacajcahualisti, nopa cuahuit, nopa teme, nopa taltepocti huan hasta quitamihuatzqui nochi nopa at cati oncayaya ipan nopa aojti. ³⁹ Huan quema quiitaque nopa tamanti, nochi nopa israelitame motancuaquetzque huan quijtojque: “¡TOTECO yaya Dios! ¡TOTECO yaya Dios!”

⁴⁰ Huajca Elías quinilhui:

—Xiquinitzquica itajtolpanextijcahuá Baal para amo ma cholo yon se.

Huan injuanti quinitzquijque huan Elías quinhuicac ipan nopa atajti cati itoca Cisón huan nopona quinmicti.

Elías motatajtía para ma huetzi at

⁴¹ Huajca Elías quiilhui Acab:

—Xiya xitacuati huan xiatiti pampa ya nijcaqui para monechcahuía at huan huetzis at tahuel chicahuac.

⁴² Huajca Acab yajqui tacuato huan atito. Huan Eliás tejcoc hasta itzompac nopa tepet Carmelo, huan motancuaquetzqui huan ixayac ajsic hasta itancuaco. ⁴³ Huan quiilhui itequipanojca:

—Xiya huan xitachiya para campa hueyi at sintia tiquita mixti.

Huajca ya yajqui huan tachixqui. Huan teipa mocuetqui huan quiilhui:

—Amo teno niquita.

Huan chicome huelta Elías quiilhui:

—Xiya sempa xijtachiliti.

⁴⁴ Ica chicome huelta yajqui huan teipa mocuetqui huan quiilhuico:

—Na niquita se mixti pisiltzi san quej imax se tacat cati motanana ipan hueyi at.

Huan Elías quiilhui:

—Xiya xiquilhuiti Acab ma tejco ipan itepos carro huan ma quisa nimantzi para ichaj para nopa at amo quitzacuilis.

⁴⁵ Huajca Acab tejcoc ipan itepos carro huan yajqui hasta nopa altepet Jezreel. Huan il-huicacti mochijqui yayahuic ica mixti huan hualajqui miyac ajacat huan huetzqui at nelchicahuac.

⁴⁶ Huan TOTECO quimacac miyac chicahualisti Elías huan yaya quiilpi iyoyo huan quicalaqui ipan itzinquechilpica huan matalojtejqui. Huan matalo chicahuac huan quiyacanqui Acab ipan itepos carro ica cahuayojme hasta ajsito ipan altepet Jezreel.

19

Elías mochololti huan yajqui hasta Horeb

¹ Huan Acab quipohuili isihua Jezabel nochí cati Elías quichijtoya huan quenicatza quinmictijtoya nochí itajtolpanextijcahua Baal. ² Huajca Jezabel quinahuati se tayolmelajquet ma quiilhuiti Elías: “Ma techmictica nopa dioses sintá para mosta

ipan ni hora amo nimitzmictijtoc, ta tiElías, quej tiquinmicti itajtolpanextijcahua Baal.”

³ Huajca quema Elías quimatqui para quinequiyaya quimictise, motanantejqui huan cholojtejqui para quimanahuis inemilis. Huan yajqui ipan altepet Beerseba ipan tali Judá, huan nopona quicajtejqui itequipanojca. ⁴ Teipa Elías nejnenqui semilhuit hasta nopa huactoc tali, huan mosehuito itzinta se cuahuit cati amo quipiya miyac ixihuiyo huan quinequiyaya ma miqui. Quiilhui TOTECO: “¡Ya cuali noTECO! ¡Techquixtili nonemilis! ¡Pampa na amo más nicuali que notatahua!”

⁵ Huan Elías motejqui itzinta nopa cuahuit cati amo quipiya miyac ixihuiyo. Huan quema cochtoya, se iilhuicac ejca TOTECO quiojolini huan quiilhui: “Ximijquehua huan xitacua.”

⁶ Huajca Elías isac, huan quiitac nechca itzonta eltoya se pantzi cati taicxitili ipan teme cati totonic huan ihuaya eltoya se comit temitoc ica at. Huajca mijquejqui, huan tacuajqui huan teipa sempa cochqui. ⁷ Pero nopa iilhuicac ejca TOTECO ica ompa quiojolini huan quiilhui: “Ximijquehua huan sempa xitacua huan xiati pampa tahuel hueyi ojti mitzpolohua noja.”

Elías ipan Horeb

⁸ Huajca mijquejqui huan tacuajqui huan atic. Huan nopa tacualisti quimacac fuerza para nejne-
mis 40 tonati huan 40 yohuali hasta ajsito ipan
nopa tepet Horeb*, nopa tepet ten Toteco Dios.
⁹ Huan quema ajsito nopona, calajqui ipan se ostot

* **19:8** 19:8 Tepet Horeb nojquiya itoca tepet Sinaí.

huan nopona panoc nopa yohuali. Pero se camanali ten TOTECO ajsic campa ya huan quiilhui: “¿Taya tijchihua nica, Elías?”

¹⁰ Huan Elías quinanquili: “Tahuel nimitzta-somajtoc TOTECO, ta Cati Tiquinyacana Nochi Moilhuicac Ejcahua Ma Tatanitij. Huan nopa israelitame quitahuelcajtoque nopa camanal sencahuali cati tijchijqui inihuaya, huan quisosolojtoque motaixpahua huan quinmictijtoque ica macheta nochi motajtolpanextijcahua. Huan san na noseltizi nimocajtoc para nimitztequipanos. Huan ama techtemohuaj para techmictise nojquiya.”

¹¹ Huan TOTECO quiilhui: “Xiquisa calteno huan ximoquetza noixpa ipan ni tepet.”

Huajca Elías moquetzqui nopona. Huan TOTECO panoc huan se chicahuac ajacat quitzohuitejqui nopa tepet hasta tapantejque huejhueyi teme iixpa TOTECO. Pero TOTECO amo itztoya ipan nopa ajacat. Teipa quema ya panotoya nopa ajacat mojmolini nopa tali. Pero TOTECO amo itztoya ipan nopa mojmolinilisti ten tali. ¹² Huan quema ya mojmolinijtoya nopa tali, teipa oncac se hueyi tit, pero TOTECO amo itztoya ipan nopa tit. Huan quema ya panotoya nopa tit, Elías quicajqui quej elisquía acajya quiichtaca camanalhuiyaya ica yolic. ¹³ Huan quema Elías quicajqui, moixtzajqui ica iyoyo, panquisqui huan moquetzqui campa calajqui ipan nopa ostot. Huan teipa quicajqui se cati quiilhui: “¿Taya tijchihua nica Elías?”

¹⁴ Huan ya quinanquili: “Tahuel nimitzta-somatí TOTECO, ta Cati Tiquinyacana Nochi Moil-

huicac Ejcahua Ma Tatanitij. Huan israelitame quitahuelcajtoque nopa camanal sencahuali cati tijchijqui inihuaya, huan quisosolojtoque motaix-pahua huan quinmictijtoque ica macheta motajtolpanextijcahua. Huan san na noseltitzi nimo-cajtoc para nimitztequipanos huan techtemohuaj para techmictise nojquiyu.”

¹⁵ Huan TOTECO quiilhui: “Ximocuepa ica campa tihualajqui huan xiya ipan huactoc tali ipan tali Damasco. Huan quema tiajsis nopona, xijzonalti ica aceite Hazael para ma eli tanahuatijquet ipan tali Siria. ¹⁶ Huan Jehú, iixhui Nimsi, ticaltis para ma eli tanahuatijquet ipan tali Israel. Huan Eliseo, icone Safat, cati ehua Abel Mehola, xijzonalti ica aceite para ma eli se tajtolpanextijquet quej mopataca ta. ¹⁷ Huan cati mochololtis ten imacheta Hazael, Jehú quimictis huan cati mochololtis ten imacheta Jehú, Eliseo quimictis. ¹⁸ Huan noja niquinpiya seyoc 7 mil masehualme ipan tali Israel cati amo motancuaquetzque iixpa Baal, yon amo quitzoponijque itaixcopincayo.”

Elías quinotzqui Eliseo

¹⁹ Huajca Elías yajqui huan quipanti Eliseo, icone Safat, talpoxoniyaya ipan se milcahuali ica 12 pares torojme cati tapoxoniyayaj ica se tepos arado huan yaya yahuiyaya iniica quintequihuiyaya. Huan Elías yajqui campa itztoya Eliseo huan quitalili iyoyo cati huehueyac ten se tajtolpanextijquet. ²⁰ Huajca Eliseo quincajtejqui nopa torojme cati quintequihuiyaya huan motalo-jtihualajqui iica Elías, huan quiilhui:

—Nimitztajtanía techcahuili ma nijtzoponiti notata huan nonana, huan teipa nimitztoquilis.

Huan Elías quiilhui:

—Xiya, pero ximoyolilhui cati nimitzchihuilijtoc.

²¹ Huajca Eliseo quicajqui Elías huan mocuetqui. Huan quinitzqui ome itorojhua, huan quinmicti, huan quicacatzo ininacayo huan quintamacac nopa masehualme cati itztoyaj nopona. Teipa yajqui ihuaya Elías huan mochijqui itemach.

20

Acab quintehui nopa Siria ehuani

¹ Teipa Tanahuatijquet Ben Adad ten tali Siria quinsentili nochis isoldados, huan 32 tanahuatiani ten sequinoc talme ica inintepos carrojhua huan inincahuayojhua. Huan yajque ipan nopa altepet Samaria, nopa tayacanca altepet ipan tali Israel huan quiyahualotoj huan quitehuitoj. ² Huan quinahuati se tayolmelajquet ma quiitati Acab cati elqui tanahuatijquet ipan tali Israel huan ma quiilhui: ³ “Quej ni quijjohua Ben Adad: ‘Noaxca nochis moplata huan mooro huan nopa mosihuajhua huan moconehua cati achi más yejyectzitzí.’”

⁴ Huan Tanahuatijquet Acab ten tali Israel quinanquili huan quiilhui: “Cualtitoc, elis san quej ta tiquijtohua, tinoteco. Nochi cati nijpiya ta moaxca.”

⁵ Huan teipa nopa tayolmelahuani sempa hualajque quiitacoj Acab huan quiilhuijque: “Ben Adad quej ni quijjohua: ‘Na nitatitanqui

ma mitzilhuitij para techmaca nochí moplata, mooro, mosihuajhua, mocone hua huan nochí cati tijpiya. ⁶ Mosta ipan ni hora niquintitanis notequipanojcahua campa tiitztoc, huan inijuanti tajtachiyase cuali ipan mochaj huan ininchajchaj motequipanojcahua. Huan quicuisse huan quihualicase nochí cati ipati anquipixtoque.’

⁷ Huajca nopa tanahuatijquet ten tali Israel quinnotzqui nochí huehue tacame ipan ital huan quinlhui:

—Xiquitaca, nopa tacat quitemohua cualanti. Na ya niquilhuijtoc huelis quinhuicas nosihuajhua, nocone hua, noplata huan nooro.

⁸ Huan nochí nopa huehue tacame huan tayacanca israelitame quinanquilijque:

—Amo xijtacaquili, yon amo xijchihua ten mitztajtanía.

⁹ Huajca Acab quinlhui itayolmelajcahua Ben Adad:

—Xiquilhuica noteco, nopa tanahuatijquet para nijchihuas nochí cati technahuati achtohui, pero amo hueli nijchihuas cati ama techtajtanía.

Huan itayolmelajcahua mocuetque huan quiyolmelahuatoj Ben Adad ica cati quinlhuijtoya Acab. ¹⁰ Huan Ben Adad tanahuati ma quiilhuiti Acab: “Na nitatestigojquetza para ma techmictica nopa dioses sintia amo nijtamisosolos altepet Samaria hasta amo mocahuas yon se tamojtzoli ten taltepocli para niquinmacas notequipanojcahua para quielnamiquise nopa altepet.”

¹¹ Huan nopa tanahuatijquet ipan tali Israel tananquili huan quiilhui: “Amo ximohueyichi-hua amantzi quema ayemo titatani. Ximo-hueyichihuas quema ya titatantos.”

¹² Huan quema Ben Adad quicajqui nopa camanali, yaya taiyaya inihuaya nopa sequinoc tanahuatiani ipan iniyoyoncalhua. Huajca quinlhui itequipanojcahua: “¡Ximonemilica para titatehuitij!” Huan nochí mocualtalijque para quiyahualotij nopa altepet.

¹³ Huajca hualajqui se tajtolpanextijquet huan monextico iixpa tanahuatijquet Acab ipan tali Israel huan quiilhui:

—Quej ni quijjtohua TOTECO: ‘Masque tiquita tahuel miyaqui mocualancaitacahua, ama na niquintemactilis momaco. Huan huajca tijmatis para melahuac na niTOTECO.’

¹⁴ Huan Acab quiilhui:

—¿Quenicatzá quichihuas?

Huan nopa tajtolpanextijquet quijjto:

—Quej ni quijjtohua TOTECO: ‘Nopa tayacanca soldados cati neltepcame cati hualahuij ipan nopa sequinoc estados ipan motanahuatilis, ini-juanti quichihuase.’

Huan Acab quiilhui:

—¿Ajquiya quipehualtis nopa tatehuilisti?

Huan nopa tajtolpanextijquet quinanquili:

—¡Ta!

Acab quintani nopa Siria ehuani

¹⁵ Huajca Acab quinsentili nopa 232 tayacanca soldados cati telpocame huan hualayayaj campa hueli ipan itanahuatilis huan nojquiya quinsentili

nochi sequinoc israelita soldados huan ica nochimochijque 7 mil tacame. ¹⁶ Huan quisque tajcottona quema Tanahuatijquet Ben Adad huan nochinopa seyoc 32 tanahuatiani ten sequinoc talmetaiyayaj ipan iniyoyoncalhua. ¹⁷ Huan quisque achtohui nopa tayacanca soldados cati telpocame huan campa hueli ehuayaya ipan tali Israel. Huan quema Ben Adad quiyolmelajque itayolmelajcahua para hualahuij sequij tacame ten altepet Samaria, ¹⁸ yaya quiijto: “Sinta hualahuij ica cuali o ica cualancayot, xiquinitzquica yoltoque.”

¹⁹ Huajca quisque nochimochijque nopa tayacanca soldados cati telpocame huan nochimochijque más soldados iniica. ²⁰ Huan sesen israelita soldado pejqui quiimictía sesen soldado ten tali Siria. Huan nimantzi cati huelque ten nopa sirio soldados cholojtejque. Huan nopa israelita soldados quintepotztocaque para quiqmictise. Pero Tanahuatijquet Ben Adad ten tali Siria mochololti ipan se cahuayo huan se ome más tacame cati tejcotoyaj ipan cahuayojme. ²¹ Huan yajqui Tanahuatijquet Acab ten tali Israel huan quintamimicti nochimochijque nopa tali Siria ehuani huan inincahuayojhua masque yahuiyayaj cahuajtipa o ipan tatehuijca carrojme. Huan nechca nochimochijque nopa sirios mijque ipan nopa tatehuilisti.

Toteco quiilhui Acab para mocuepas Ben Adad

²² Huan teipa nopa tajtolpanextijquet moixnexitito iixpa nopa tanahuatijquet Acab ten tali Israel huan quiilhui:

—Xiya huan ximocualtalica huan ximochihuaca más antetique para antatehuise pampa ne

seyoc xihuit quema moseliltíaj cuame nopa tali Siria tanahuatijquet sempa hualas mitzehuiqui.

Ica ompa Acab quintani nopa Siria ehuani

²³ Huan itapalehuijcahua Tanahuatijquet Ben Adad ipan tali Siria quiilhuijque:

—Nopa israelitame techtanque pampa inin-Dios, itztoc se Dios cati iaxca nochí tepeme. Pero sintá tiquintehuise campa tamaya, tiquintanise. ²⁴ Huajca xiquintali tayacanani ten soldados ipan inilugar nopa tanahuatiani cati tiquinpixqui. ²⁵ Huan xiquinsentili miyac tacame para mochihuase soldados san quej cati mijque. Techmaca san se imiyaca cahuayojme, carrojme huan tacame cati tiquinpiyayabaj huan tiyase para timotehuise inihuaya ipan tamayamit. Huan temachti tiquintanise.

Huajca Ben Adad quintacaquili huan quej nopa quichijqui. ²⁶ Huan seyoc xihuit quema moseliltíaj cuame, Ben Adad quinsentili nochí isoldados ipan tali Siria huan yajque ipan se altepet itoca Afec para motehuise ica israelitame. ²⁷ Nojquiya nopa israelitame quinsentilijque inisoldados huan quisque para tatehuitij ica nopa sirios huan mochijque iniixmelac. Pero nopa israelitame nesiyayaj quej ome pamit ten pilborrego jtzitzitzi huan nopa Siria ehuani eliyayaj tahuel miyaqui hasta temitoya nopa tamayamit.

²⁸ Huajca moixnexti itequipanojca Toteco Dios iixpa Tanahuatijquet Acab ipan tali Israel huan quiilhui:

—Quej ni quijto TOTECO: ‘Nopa tali Siria ehuani quijtojtoque para na san nise Dios

ten tepeme huan amo ten tamayame, huajca na niquintemactilis momaco para xiquintani masque nelía inijuanti tåhuel miyaqui inisoldados. Huan quej nopa tijmatis para melahuac na niamoTECO.'

²⁹ Huajca para chicome tonati mosehuijque nopa israelitame campa mochijtoyaj iniixmelac nopa Siria ehuani huan nopa sirios itztoyaj iniixmelac israelitame. Huan ipan nopa chicompa tonali pejque motehuíaj. Huan nopa israelitame quinmictijque 100 mil tali Siria soldados cati san icxinejnemiyayaj san ipan se tonal. ³⁰ Huan nopa sequij cholojque huan motatitoj ipan altepet Afec, pero nopa tepamit cati ica quiyahualojtoyaj nopa altepet huetzqui ininpani nopa 27 mil tacame cati mochololtijtoyaj. Huan Ben Adad nojquiya cholo huan ajsito ipan nopa altepet huan motati ipan se cuarto cati nelcalijtic.

³¹ Huan nopa itapalehuijcahua quiilhuijque:

—Tijcactoque para nopa tanahuatiani ten tali Israel quipiyaj hueyi iniyolo. Huajca ma timoyoyontica ica yoyomit ten cuesoli, huan tech-talili se lazo ipan toquechcuayo huan tiquitatij nopa tanahuatijquet Acab para ma techcahuaca tiyoltoque.

³² Huajca moquentijque yoyomit ten cuesoli huan lazos ipan ininquechcuayo huan yajque quiitatoj Tanahuatijquet Acab ten tali Israel huan quiilhuijque:

—Motequipanojca Ben Adad mitztajtanía, se favor, xijcahuili ma itzto.

Huan Acab quinilhui:

—¿Noja itztoc? ¡Yaya noicni!

³³ Huan nopa tacame quicualcajque ni camanali huan nimantzi quinanquilijque:

—Quena, moicni, Ben Adad, noja itztoc.

Huan Acab quinilhui:

—Xiyaca huan techhualiquilica.

Huajca Ben Adad moixnextito iixpa Acab, huan Acab quitejcolti ipan itepos carro quej ihuampo.

³⁴ Huan Ben Adad nimantzi quiilhui:

—Nimitzcuepilis nopa altepeme cati notata quicuilijtoya motata. Ta huelis tijpiyas tali para tianquis campa titanamacas ipan altepet Damasco san quej notata quichijqui ipan altepet Samaria.

Huan Tanahuatijquet Acab quiilhui:

—Huajca tijchihuase se camanal sencahualli huan nimitzcahuas para tiyas.

Huajca Acab quichijqui nopa camanal sencahualli ihuaya Ben Adad huan quicahuili mayahui.

³⁵ Huan TOTECO quiilhui se itajtolpanextijca ma quiilhui se ihuampo para Toteco Dios quijjtoyota:

—Techcoco ica momacheta.

Pero nopa ihuampo amo quinejqui quicocos.

³⁶ Huajca ya quiilhui:

—Pampa amo tijneltocac Icamanal TOTECO, ama quema techcajtehuas, mitzmictis se tecuani.

Huan quena, quema quicajtejqui nopa ihuampo, quipanti se tecuani ipan ojti huan nopa tecuani quimicti.

³⁷ Teipa nopa tajtolpanextijquet quipanti seyoc tacat, huan quiilhui: “Techcoco ica momacheta.” Huan nopa tacat, quena, quitejqui ica imacheta

huan quicoco. ³⁸ Huajca nopa tajtolpanextijquet yajqui quichiyato Tanahuatijquet Acab ipan ojti, moixtzactoya ica se yoyomit ipan iixteyolhua para amo quiixmatis. ³⁹ Huan quema Tanahuatijquet Acab ajsico, nopa tajtolpanextijquet quitzajtzili huan quiilhui:

—Na niitztoya ipan tatehuilisti huan se soldado techhualiquili se tocualancaitaca cati quitzquitoya huan techilhui ma njmocuitahui huan sintal cholos huajca nimquis o nitaxtahuasquía 30 kilos ten plata. ⁴⁰ Huan quema na nimotequihuiyaya ipan sequinoc tamanti, tocualancaitaca san poli.

Huajca nopa tanahuatijquet ipan tali Israel quinanquili:

—Huajca ta motajtacol huan ya tiquijtojtoc para monequi timquis.

⁴¹ Huan nopa tajtolpanextijquet nimantzi moquixtili cati ica moixtzactoya, huan nopa tanahuatijquet ten tali Israel quiixmatqui para eliyaya se ten nopa tajtolpanextiani ten TOTECO. ⁴² Huan yaya quiilhui:

—Quej ni quiijtohua TOTECO: ‘Nopa huicalot mitznextilía ta huan pampa tijcrajqui ma yahui Ben Adad cati na nimitzilhuijtoya ma miqui, ama monequi ta timquis quej ipataca huan momasehualhua miquise quej ininpataca cati ya imasehualhua.’

⁴³ Huajca Acab, nopa tanahuatijquet ipan tali Israel yajqui ichaj ipan altepet Samaria, mocueso-jtoc huan cualantoc.

21

Acab quiixtocac ixocomecamil Nabot

¹ Itztoya se tacat itoca Nabot ten altepet Jezreel huan quipixtoya se xocomeca mili nechca nopa altepet huan nechca campa Tanahuatijquet Acab ten altepet Samaria quipixtoya seyoc icaltanahuatil. ² Huan se tonali Acab quiilhui Nabot:

—Technamaquilti moxocomecamil para nijtocas quilit pampa eltoc nechca nochaj. Nimitztaxtahuis ica tomi o sintatijnequi nimitzpatilis ica seyoc xocomeca mili.

³ Huan Nabot quinanquili Acab:

—TOTECO techtatzacuiltis sintatijnequi nimitzmacas cati notatahua nechcahuilijtejque, huajca amo quema njchihuas.

⁴ Huajca Acab yajqui ichaj mocuesojtoc huan cualantoc por cati quiilhuijtoya Nabot, pampa quiilhui para amo quimacas cati quicahuilijtejque itatahua. Huan Acab ajsito ichaj, huan motejqui ica ixayac campa tapepecholi huan amo quinejqui tacuas. ⁵ Huajca Jezabel, isihua, monechcahui campa Acab huan quiilhui:

—¿Para ten tahuel timocuesojtoc huan amo tijnequi titacuas?

⁶ Huan Acab quiilhui:

—Pampa njcamanalhui Nabot cati ehua nica Jezreel, huan niquilhui ma technamaquilti nopa ixocomecamil, o sintatijnequi niquisquia nijpatilisquia ica seyoc xocomeca mili. Pero ya amo quinejqui technamaquiltis, yon amo quinejqui ma titapataca.

⁷ Huajca Jezabel, isihua quinanquili:

—¡Ta titanahuatijquet ipan ni tali Israel! ¡Ximiquehua huan xitacua huan amo xijchihuili cuenta cati mitzpanotoc! Na nimitzmacas ixocomecamil Nabot.

⁸ Huajca Jezabel quijcuilo amatajcuilolme quej elisquía Tanahuatijquet Acab quinijcuilojtoya huan quinsellojhui ica isello. Huan quintitanili nochí huehue tacame huan tayacanani ten altepet Jezreel campa itztoya Nabot. ⁹ Ipan nopa amatajcuiloli quijtohuayaya:

“Xiquinyolmelahuaca nochí tacame ma mosentilica huan ma mosahuaca. Huan nojquiya xijnotzaca Nabot huan xijsehuica iniixpa nopa tacame ten nopa altepet. ¹⁰ Huan xi quintemoca ome fiero tacame cati quitatelhuise Nabot para quitelchihuayaya Toteco Dios huan nopa tanahuatijquet. Huan teipa xijquixtica huejca ten nopa altepet huan xijtepachoca hasta miquis.”

¹¹ Huan nopa masehualme, huehue tacame, huan tayacanani ten nopa altepet, quichijque san quej Jezabel quinnahuatijtoya ipan nopa amame cati quintitanilitoja. ¹² Huan tanahuatijque ma mosahuaca nochí cati ehuani ipan nopa altepet huan ma mosentilica huan quisehuijque Nabot iniixpa nopa masehualme ten nopa altepet.

¹³ Huajca hualajque ome tacame cati fiero ininemilis huan quitatelhuijque Nabot para quitelchijtoya Toteco Dios huan nopa tanahuatijquet Acab. Huajca teipa qui quixtijque calixpa ten nopa altepet huan quitepachojque hasta quimictijque.

¹⁴ Teipa tatitanque ma quiilhuitij Jezabel para

Nabot ya quitepachojque huan ya mictoc san quej ya quijtojtoya.

¹⁵ Huan quema Jezabel quimatqui, quiilhui Acab:

—Nabot amo quinejqui mitznamaquiltis ixocomecamil, pero ama, quena, huelis timoaxcatis yon amo tijtaxtahuis pampa ya mictoc.

¹⁶ Huan quema Acab quicajqui para Nabot ya mictoc, moquetzqui huan yajqui moaxcatito ixocomecamil.

Elías tayolmelajqui taya ipantis Acab

¹⁷ Huajca TOTECO quinojnotzqui Elías cati ehua Tisbe huan quiilhui: ¹⁸ “Xiya huan xiquitati nopa tanahuatijquet Acab ten tali Israel. Ama yaya itztoc ipan tali Samaria campa ixocomecamil Nabot pampa yajtoc quiitati nopa xocomeca mili para moaxcatis. ¹⁹ Huan tiquilhuis para niamoTECO niquijtohua: ‘Tijmicti Nabot huan tijcuili cati eliyaya iaxca, huajca nopona ipan nopa lugar campa nopa chichime quipipitzoque ieso, nojquiya quipipitzose ta moeso.’ ”

²⁰ Huan Elías yajqui quiitato Acab huan Acab quiilhui:

—¿Ya techpantijtoc, tinocualancaitaca?

Huan Elías quiilhui:

—Quena, nimitzpantijtoc para nimitzyolmelaahuas nopa tatelchihualisti cati mitzajsis pampa timotemacatoc para tijchihuas cati amo cuali iixpa TOTECO. ²¹ Yeca TOTECO quijtohua quihualicas ipan ta noch tamanti cati amo cuali. Quintzontamiltis noch moteixmatcahuas, huan amo quicahuilis ma itzto yon se ten moixhuihua.

²² Quintzontamiltis mochaj ehuani san se quej quichijqui ica Jeroboam, icone Nabat, huan quej quichijqui ica ichaj Baasa, icone Ahías. Pampa tijcualancamacatoc TOTECO huan tiquinchijtoc ma tajtacolchihuaca nochi israelitame. ²³ Huajca TOTECO quijjtojtoc: ‘Nopa chichime quicuase Jezabel nechca campa eltoc nopa tepamit cati ica quiyahualojoque ni altepet Jezreel.’ ²⁴ Huan nochi moteixmatcahua cati miquise ipan ni altepet, quincuase chichime, huan cati miquise ipan cuatitamit, quincuase nopa totome cati nacacuaj.

²⁵ Amo oncac seyoc masehuali quej Acab cati monamacac para quichihuas cati amo cuali iixpa TOTECO, pampa isihua, Jezabel, tahuel quichihaulti ma quichihua ya nopa. ²⁶ Nojquiya quichijqui cati nelía fiero iixpa TOTECO pampa quinhueyichijqui taixcopincayome san quej quichihuayaya nopa amorreos masehualme cati TOTECO quinquixti ten inintal quema calajque nopa israelitame.

²⁷ Huan quema Acab quicajqui nochi ni camanali ten Elías, quitzayanqui iyoyo, huan motalilij yoyomit ten tequipacholi huan mosajqui. Cochiyaya ica nopa fiero yoyomit, huan tahuel mocuesohuayaya. ²⁸ Huajca TOTECO quiilhui Elías: ²⁹ “¿Tiquitztoc quenicateza Acab moechcapanojtoc noixpa? Huajca pampa moechcapanojtoc noixpa, amo nijhualicas taijyohuilisti ipan ichaj ehuani quema noja itztos, pero quena, teipa quema miquis ni quintzontamiltis nochi iconehua.”

22

*Siria huan Israel ayecko motehuijque
(2 Cr. 18:1-34)*

¹ Huan para nechca eyi xihuit amo oncac tatehuilisti ica tali Siria huan tali Israel. ² Pero ipan nopa expa xihuit, Josafat, tanahuatijquet ten tali Judá, yajqui quipaxaloto nopa tanahuatijquet ten tali Israel. ³ Huan quema itztoya nopona Tanahuatijquet Acab ten tali Israel quinilhui itapalehuijcahua:

—¿Amo anquijitaj para nopa Siria ehuani que jipa moaxcatijtoque toaltepe Ramot cati mopantía ipan tali Galaad, huan amo teno tijchijtoque para tiquinquixtilise?

⁴ Huan Acab quiilhui Tanahuatijquet Josafat:

—¿Tijnequi tihualias nohuaya para tiquintehuise nopa tali Siria ehuani para sempa timoaxcatise altepet Ramot ten tali Galaad?

Huan Josafat quinanquili:

—Quena, ta huan na tiitztoque tiicnime. Nomasehualhua huan nocahuayos itztoque momaco para mitzpalehuise.

⁵ Pero nojquiya Josafat quiilhui Acab:

—Pero nimitztajtanía achtohui ma tijtemoca sintia TOTECO ipaquilis ica se itajtolpanextijca.

⁶ Huajca nopa tanahuatijquet ten tali Israel quinsentili nopa 400 itajtolpanextijcahua cati ya iaxcahua huan quintajtanili:

—¿Cuali para nijtehuis altepet Ramot ipan tali Galaad o amo?

Huan inijuanti quiilhuijque:

—Xiyaca pampa TOTECO quintemactilis amomaco.

⁷ Pero Josafat quijito:

—¿Amo aqui se tajtolpanextijquet ten TOTECO para nimotatzintoquilis ica ya?

⁸ Huan nopa tanahuatijquet ten tali Israel quinanquili Josafat:

—Quena, itztoc se nica. Yaya itoca Micaías huan yaya icone Imla, pero na tahuel nijcualancaita pampa amo quema techilhuía cati cuali.

Pero Josafat quiilhui:

—Amo xiquijto ya nopa.

⁹ Huajca nopa tanahuatijquet ten tali Israel quinotzqui se itapalehuijca huan quiilhui:

—¡Techhualiquili nimantzi Micaías, icone Imla!

Micaías quiilhui Acab para miquis

¹⁰ Huan Tanahuatijquet Acab ten tali Israel huan Tanahuatijquet Josafat ten tali Judá mosehuijtoyaj ipan sese inisiya, nechca nopa caltemit campa plaza campa calaquiip ipan altepet Siria. Nochi inijuanti moquentijtoyaj iniyoyo cati más yejyectzi para tanahuatiani, huan itajtolpanextijcahua Acab camanaltiyayaj iniixpa quej elisquía quiselíaj camanali ten TOTECO. ¹¹ Huan se tajtolpanextijquet cati itoca Sedequías huan cati elqui icone Quenaana, mochihuilijtoya tepos cuacuajti huan cuatzajtziyaya: “Quej ni quijtojtoc TOTECO: ‘Ica ni cuacuajti tiquintompojhuis nopa Siria ehuani hasta tiquintzontamiltis.’ ”

¹² Huan nochi nopa sequinoc tajtolpanextiani san se quijtohuayayaj quej quijtohuayaya Sedequías. Quiilhuiyayaj nopa tanahuatijquet: “Xiya ipan Ramot huan xi quintehuiti huan titatanis

pampa TOTECO quitemactilis momaco nopa altepet."

¹³ Huan nopa tayolmelajquet cati yajqui quinotzato Micaás, quiilhui:

—Nochi nopa tajtolpanextiani, san se camanali quiilhuiáj nopa tanahuatijquet. Quiilhuiáj camanali cati cuali huan para tatanis. Huajca ta nojquiya xiquilhui san se camanali quej inijuanti huan xiquilhui nopa tanahuatijquet para tatanis.

¹⁴ Huan Micaás quinanquili:

—Temachti niquijtos san cati noTECO techilhuis para niquijtos.

¹⁵ Huajca Micaás ajsico campa nopa tanahuatijquet Acab huan nopa tanahuatijquet quiilhui:

—Micaás, ¿tiyase tijtehuitij altepet Ramot ten tali Galaad o tiquincahuase ma itztoca nopona?

Huan ya quiilhui:

—Quena, huelis tiyas huan titatanis pampa TOTECO quitemactilis momaco.

¹⁶ Huan nopa tanahuatijquet quiilhui:

—¿Hasta quesqui huelta nimitzilhuis para techilhui san cati melahuac cati TOTECO quiijtohua?

¹⁷ Huajca Micaás quiilhui:

“Ipan se tanextili ten TOTECO niquitac quenicatza elis.

Niquinitac nochí nopa israelita soldados cati mosemantoyaj,

ipan cuatitamit campa hueli,

quej pilborrego jitzitzi cati amo quipiyaj inintamocuitahuijca.

Huan TOTECO techilhui:

‘Ni masehualme ya mijqui ininteco,

huajca xiquintitani ininchajchaj ica tasehuilisti.’ ”

¹⁸ Huajca nopa tanahuatijquet ten tali Israel quiilhui Tanahuatijquet Josafat:

—¿Amo nimitzilhuijtoc para ni tacat amo quema techilhuía se tamanti cati cuali? Yaya nochipa techilhuía cati amo cuali.

¹⁹ Huajca Micaías quiilhui:

—Xitacaquili ni seyoc camanali ten TOTECO. Na niquitac TOTECO mosehuijtoc ipan isiya nepa ilhuicac ica noch iilhuicac ejcahua huan cati itztoque nopona quiyahualojtoyaj ipan inejmat huan iarraves.

²⁰ “Huan TOTECO quiijto: ‘¿Ajquiya yas quichihualtiti Acab para ma yahui tatehuiti ipan altepet Ramot ten tali Galaad huan quimictise nopona?’ Huan sequij quiijtohuayayaj se tamanti huan sequinoc quiijtohuayayaj seyoc tamanti.

²¹ “Huan teipa se ajacat moixnexti iixpa TOTECO, huan quiilhui: ‘Na nijchihualtis para yas.’

“Huan TOTECO quiilhui: ‘Huan ¿quenicateza ti-jchiwas?’ ²² Huan yaya quiijto: ‘Na niyas huan nielis se ajacat cati niistacatis huan nicamanaltis ica inincamac nopa tajtolpanextiani.’

“Huan TOTECO quiijto: ‘Cualtitoc. Huajca xiya xijchihuati.’ ²³ Huan ama tiquita, Tanahuatijquet Acab, para TOTECO quitalijtoc se ajacat cati istacati ipan inincamac noch i motajtolpanextijcahua pampa TOTECO quichijtoc para ma huetzi ipan ta noch cati amo cuali.”

²⁴ Huajca Sedequías, icono Quenaana, monechc ahui campa Micaías huan quitejzonili ica imax huan quiijto:

—¿Hasta quema Itonal TOTECO techtahuelca-jqui para ayecmo nechcamanalhuis huan san ta mitzcamanalhuis?

²⁵ Huan Micaás quinanquili:

—Tijmatis ipan nopa tonali quema timotati-jtinemis tahuel calijtic ipan se cali para amo mitzmictise.

²⁶ Huajca Tanahuatijquet Acab ten tali Israel tanahuati:

—Xiquitzquica Micaás huan xijhuicaca ilpitoc iixpa Amón, nopa tequitquet ipan nopa altepet huan iixpa Joás, nocone. ²⁷ Huan xiquinilhuica ma quicalaquica ipan tatzacti huan xijtamacaca ica san pantzi huan at cati monequi para ma yolto hasta quema nimocuepas ica paquilsti.

²⁸ Huan Micaás quiilhui:

—Sinta timocuepas ica cuali huan ica paquilsti, huajca nesis para TOTECO amo mitzcamanalhuij-toc ica na.

Huan teipa Micaás quiijo:

—Nochi amojuanti xijtacaquilica cati niquijtoj-toc.

²⁹ Huan quej ni, nopa tanahuatijquet ten tali Israel huan Josafat, tanahuatijquet ten tali Judá yajque inihuaya inisoldados nepa ipan altepet Ramot ten tali Galaad. ³⁰ Huan nopa tanahuatij-quet ten tali Israel quiilhui Josafat:

—Ximotalili moyoyo ten tanahuatijquet cati ipa timoquentía, pero na nimoquentis seyoc tacat iy-yoyo para amo aqui techixmatis sinta na.

Huajca Acab calajqui ipan nopa tatehuilisti moixtzactoc huan moquentijtoc seyoc yoyomit quej cati moquentía se soldado. ³¹ Pero nopa tanahuatijquet ten tali Siria quinnahuatijtoya

nopa 32 itayacancahua cati quihuicayayaj inintepos carrojhua ya ni: “Amo aqui xijtehuica yon cati hueyi o cati pisiltzi. San xijtehuica nopa tanahuatijquet ten tali Israel.” ³² Huan quema nopa tayacanani ten nopa tepos carrojme quiitaque Josafat ica iyoyo cati cuali, quiijtojque:

—Ya ni nopa tanahuatijquet ten tali Israel cati tijtemohuaj.

Huajca quiyahualojque para quimictise. Pero Josafat cuatzajtzic. ³³ Huajca nopa tayacanani quiitaque para amo yaya nopa tanahuatijquet ten tali Israel, huajca quicajque.

³⁴ Pero se soldado tamotac ica icuahuitol san quej hueli huan quiajsic nopa tanahuatijquet ten tali Israel campa sasalijtoc nopa itepos yolixtzajca. Huajca Acab quiilhui nopa cati quihuicayaya itepos carro para ma quicuepalti huan ma quiqxisti ten nopa tatehuilisti pampa tahuel cocojtoya.

³⁵ Pero nopa tatehuilisti mochijqui más chicahuac ipan nopa tonali. Huajca Tanahuatijquet Acab, quipalehuijque para mocajqui ijcatoc ipan itepos carro iniixmelac nopa sirios cati quinlehuiyayaj. Huan ieso cati quisayaya campa cocojtoc motalohuayaya ipan nopa tepos carro huan ica tiotac yaya mijqui. ³⁶ Huan quema calactiyahuiyaya tonati quinyolmelajque nopa israelita soldados: “¡Nochi tantoc! ¡Xitacuepilica nochi amochajchaj!”

³⁷ Huajca quej nopa mijqui nopa tanahuatijquet. Huan quihuicaque itacayo ipan altepet Samaria huan nopona quitalpachojque. ³⁸ Huan quipajpajque itepos carro ipan nopa acomoli ten

Samaria campa maliyyayaj nopa ahuilneca si-huame. Huan nopa chichime quipipitzojque ieso Acab san quej TOTECO quijitojtoya.

³⁹ Nochi cati panoc ipan itequi Acab huan nopa cali cati quichijqui senquisa ica marfil huan nochi altepeme cati quinchijchijqui, eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Israel. ⁴⁰ Huan Acab mijqui, huan teipa tanahuati icona cati itoca Ocozías.

*Josafat tanahuati ipan tali Judá
(2 Cr. 20:31-37)*

⁴¹ Huan Josafat, icona Asa, pejqui tanahuatía ipan tali Judá quema Acab yahuiyaya para nahui xihuit tanahuatis ipan tali Israel. ⁴² Huan Josafat quipiyayaya 35 xihuit quema pejqui tanahuatía. Huan tanahuati 25 xihuit ipan altepet Jerusalén. Inana itoca eliyaya Azuba huan eliyaya icone Silhi.

⁴³ Huan Josafat nejnenqui senquisa quej itata Asa. Quichijqui nochi cati xitahuac iixpa TOTECO. Pero nochi nopa taixpame para taixcopincayome cati eltoyaj ipan tepeme amo quinijcueni huan masehualme noja quitatiyayaj copali huan noja quitencahuayayaj tacajcahualisti nopona.

⁴⁴ Huan Josafat quichijqui se camanal sencahualti para ma onca tasehuilisti ihuaya nopa tanahuatijquet ten tali Israel. ⁴⁵ Huan nopa sequinoc tamanti cati panoc ipan itequi Josafat huan nopa hueyi chicahualisti cati quipixqui, huan nochi tatehuilisti cati quichijqui, nochi eltoc ijcuilijtoc ipan nopa amatapohuali cati itoca Cati Quichijque Nopa Tanahuatiani Ten Tali Judá.

⁴⁶ Huan Tanahuatijquet Josafat nojquiya quin-quixti nochí nopa tacame cati quichijque tamanti ica sequinoc tacame para se taxtahuili huan quej nopa quihueyichihiuayayaq inindios. Quej nopa quichijtoyaj ten quema tanahuatiyaya itata, Asa. ⁴⁷ Ipan nopa tonali amo oncayaya tanahuatijquet ipan tali Edom, pero itztoya se tequitiquet no-pona.

⁴⁸ Huan Josafat quinchijchijqui miyac hue-jhueyi barcos para yasquíaj ipan hueyi at huejca huan quitemotij oro nepa ipan Ofir, pero amo quema quistejque. Tami sosolijque nopa barcos nepa ipan Ezión Geber. ⁴⁹ Ipan nopa tonali, Ocozías, icone Acab, quiilhuijtoya Josafat: “Ma yaca notequipanojcahua inihuaya motequipanojcahua ipan nopa huejhueyi barcos.” Pero Josafat amo quinejqui.

⁵⁰ Huan Tanahuatijquet Josafat mijqui huan quitalpachojque ipan Ialtepe David, ihuejcapan tata. Teipa Joram cati eliyaya icone pejqui tanahuatiá.

Ocozías tanahuati ipan tali Israel

⁵¹ Huan Ocozías pejqui tanahuatiá ipan altepet Samaria ten tali Israel quema Josafat yahuiyaya para 17 xihuit tanahuatis ipan tali Judá. Huan Ocozías tanahuati ome xihuit ipan tali Israel.

⁵² Pero Ocozías quichijqui nochí cati amo cuali iixpa TOTECO. Nejnenqui ipan ifiero ojhui itata, Acab, huan inana, Jezabel, huan Jeroboam, icone Nabat, cati quichijqui ma tajtacolchihuaca nopa israelitame. ⁵³ Pampa yaya nojquiya quihueyichihiuayaya nopa taixcopincayot Baal san quej itata

1 REYES 22:53

cxxx

1 REYES 22:53

quichijtoya. Huan quej nopa quicualancamacac
TOTECO cati toDios tiisraelitame.

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e